

L wai n be,
l nyind g be



ATAPEB

2024

L wai n be, l nyind g be

(Le jour vient)

KOABIKE Bedouma

ATAPEB

(Association pour la Traduction,
l'Alphabétisation et la Promotion des Ecritures
en Ben)

Dapaong, 2024

Un roman en langue moba (ben)

L wai n be, I nyind g be

(Le jour vient)

L'auteur : **M. KOABIKE Bedouma**

© 2024, ATAPEB

1ère édition 1er tirage 2024:4 (200 exemplaires)

Mayula yen lan be naan kadaaɔg n ninɔ

Cincinnati mayul : Cabl jakund	4
Mayula nle po: Cabl n cind g kua lol	9
Mayula nantaa po: Yam-nyie san g naa Cabl Gulbad naag Tanmal	14
Mayula nanna po: Cabl kua kalaatu	31
Mayula nanmu po: Cabl gad Akra kpinkpeonɔ yen ligcodl kalaatu.	58
Mayula nanluob po: Naayiga pign Gulbad.....	69
Mayula nanlile po: Cabl la tuonn Akra banɔciɛɔnɔ n ninɔ	78
Mayula nanniin po: Cabl n cind g kua luopil g saa bitɔa doug.	94
Mayula nanwai po: Jilnd bitɔa naag jedinu	118
Mayula piig po: Gaana gobna tien jaanm g gaal Cabl	121
Mayula piig yen yenn po: Cabl yen Kan-baa kuan lieb	127
Mayula piig yen nanle po: Cabl guan g kpen Togo g fiin u baa naag	138

Cincinnati mayul : Cabl jakund

Puo nne n bo be k b yi'ug Cabl. Ama sidg yen mōni, Yendu cab'o bonn kul. Puo ne n l fiil g tie big o, u g ban g bign k wan tien siel k l paad'o. Baa wan daa bo tie sanpandg, g kan fid g maad mōno, u naa gii gad dikpielu g ḡaa'ōg, puob nba tenn baa l gabn'o i nyan jenn nyan, g sua kul kpaan k wan ḡaan'o biil. U naa yen u baa mōno bo ḡanm g bua wano i g cie u ninjanm yen u niipuob kul, g nyaan k l biε yen g mabnd sua. Wano yen u lieb buol mō, lann n nyan. U gii tōgn nne, « Cabl baal nii g tan gaal ne », u gii guan ne po, « Cabl baal nii g tan gaal ne. » Wan tan fiil jōl jōl nne, g ji tuond baa, baal g diid, u bo ḡan g nyili t tuud i, k u sipaanlieb nyuad'o g naasem kpenn u po k u yen daa g tie siel. U ḡanu po kukua kaa bo te g niib kul bua'ōg. U bo suun tuonn g g jie fala, g cōln nikpela yen bid, k u pal sied nil kul po. K l ji tan tie nyan u naa Sōḡḡanu yen u baa Jaluog bo tuod g ban i g pul'o l sann nyan. Yen mōni, sann nuan g gbie k l puul kaa, l bo mōg niimn i, k b pul'o nnyan.

Jaluog yen Sōḡḡanu bo kuan lieb g daa tie naasenbig yen sipaanbig i. Jaluog n yaan bo tie u baa bijakpel k u waali kul biε tie bipuobi nyan po n bo te k u bo tuod g kuan puo. Sōḡḡanu nuan, u

yual-nba n bo tug'o g kpend g gaal Jaluog niipuoyend g kuan. Jaluog yen Sɔnɔnɔnu kuan lieb g mal bijabi banmu i, b ninɔ baa yend g bad. L bo tie pamancienn i bidanm yen ɔaag yab kul po. Ama Sɔnɔnɔnu nuan bo miɛd u Yendu k wan te'b bipuobg i k wan gii tod'o ɔapuotuona n ninɔ. U puolieb bo joi'ug k l maa ɔapuotuona bo yabd'o o. U sal kpaab mɔ bo yab hal boncienn g biɛ fag yen ɔaag. Sɔnɔnɔnu bo g jie fala g dugn b ɔaag n ninɔ wano kukua n bo tie bipuobg, g sun sun tuona k l maan'o. Yen l kul, tuona bo tu tan paad'o i. L po n te wan mal bipuobg yaa daal, k u pal manɔ g pend k u maad u sal k wan pul'o Cabl-ɔan. K u sal maad g mɔni, k u cabl kon ɔan. G Yendu bo tag'o diɔann daal i g gaal'o mɔgaalɔani. Lann i g pul big Cabl-ɔan. K b ji yi'ug Cabl Cabl k l tan gad.

Cabl bo mɔg u waali banle k b mɔ tie bipuobi. Wano n ɔmiɛ b kul hal k b tan sonm. U tuod g sun ɔapuotonbuolu kul g daa g tuond biil. U yual-nba n bo tie bijabi nyan, sua bo g tignd muad g bual wan cand tied lann i kaa wan luun nyum. G ɔmaa ji maad kpingunnu yen naal yen jetienu po mɔ i? L tuona kul bo tua Cabl yen b naa po i. B naa mɔ n bo sun sun k l maan nyan, l gii fann, kinkaanu g be. L gii tie siɛɔg u yaa, bid tu tan fiil nyan g sua k b naa gad sankpagannu u. U bu nya

muacɔg n g kpen yo, g fid g tien jied g tug gii nua
u sal kpaab n ninɲ. L gii tie fal mɔ lann n nyan.
Bid bu fiil b kan la b naa. L gii g sua k u gad g bu
gbiil yɔug, l yen bu sua k u gad dulalu lann i kaa
dikpiɛlu. U bu nya l po g kpen yo, g diid ɲaag
tuona n ninɲ. Cabl n yaan bo mɔg nyan bina
ɲanna nyan i k u cil g tod u naa. U naa gii fiil, u
tu fiin'o i, g son muu wan gii tiig g sua k u gad g
luun nyum g guan. Wan tan la bina ɲanmu g ji
saa ɲanluob nyan, k u mɔ ji ciend u naa bɔɲɲ, g
tignɔ muad, g saa kpingunnu, g cand tied, g
bignd naal mɔ waam waam. Cabl g la yaam g jeln
nyan bilei nyan. U jinjelug kul bo tie tuonn i.
Yenn youg b naa bo tu gad dikpiɛlu g ɲaa'ɔg yen
u waali yentunmunn, g siɛl yaa jijeɪ g be g dugn u
ban g Cabl ɲman b naa i.

Mɔni, Cabl n tan fiil g ji tie sipaan, naasenm
cadb u po. Naasenm nyankpana n fid u naa luolu.
U baa bo yie k wano kan te'og jua, k u gii faad
naasen nba wan gad g kun'o. Nikpela mɔ yen pua
kpanjam g talg Yendu baa yensikpikpalg n i. Big
nba bo tie nimɔn, g niib kul pagl u po, k u
ninjanm bo sun g man ne k b g taa buolu i, k
banm mɔno n bo bu kuan'o nyan, tan jiln jiln g
gad g kun niyuyouug nne i, k u waa Gaana g nyuu
tabbiid g yul kpe. U mɔb bo man boncienn, lann n
te k u bo dag Cabl k u tuo. Yaalm mɔ k b kuad

daag n o, a bu di be g bann naayig yaalm yen
nimɔn yaalm i? Cabl n gad g kun u sal Yam-nyie,
ɲaag sua g ban. L tien daa ɲanle yo, l sua g ɲaag
yab kpaan'o g la fala o, g Yam-nyie baa-nba baal
g maad k ban daa kpaan, k banm n die b bipuo.
Cabl naa buud nyan u bu kpe nyan. Cegdkab
nuan bo tuod g ban g Yam-nyie g tie nimɔn kaa.
Lanjelg cend u lua jinjelbaaɔg n i. Bid waa,
bibaa-nba g ɲua'b kaa, b bu tien nle g bann ban
cend yab nba kul i? Yam-nyie bie g ban g baal
Jaluog ɲaag baa diyenn. Yua nba kul l gbad g
Cabl gad g kun Yam-nyie, l tu yaa g lid'o i. K l big
tu tie nimɔn nnyan g be n tan kua u yul n k u sun
yaa tudm tuonn ne i? ɲaag, cegli g pɔd'o, siel yen
siel kul l g pɔd'o kaa k b tan baa tua k b bɔnd'o
yen jied i. U naa g dii siel Yam-nyie nuu n ning.
Yua nba l gbad l laabaal kul, u tu yed g ne nuan
tie kuutubug u, g fam kaa.

Jaluog fiil g tɔgn baad g pad padbuolu kul, g
pug tanpugbuolu kul, muug big n kpe i, dig dig
dig. B gad bad ɲaag, g big yie k wan bua yua nba
i k u kun'o, k ban ɲaa l maam. Bad n yaan bo ban
g Yam-nyie tie yukpienn nyan, k u fiel big g
ɲmien'o u danm. L g tien daa nle g big san g guan
Yam-nyie buol. U baa-nba ban k b bu gad yen l
maam Sandalmeli i k ban yiin Yam-nyie g jien'o k
wan ɲmien big. B g ban k b ji ɲanm g tod'o n

nyan. Nil nba waa dingbana kul g daan tii, g sun tuonbibuolu kul k b suol'o dansalg, l g luol taal piig yen munmu, yin tan gii mali g sijenm bu jien l daan wan ηmien puo oo? Buud daal baal k u maad maad g buud tan suol binaa yen bibaa i, k b suol bibaa g luon g ηaa binaa k u lebd g kun yen ninsiid yen pabɔnn. Jaluog tien daa ηanmu i dansaldieog n, k b luod g ηaa'ɔg. U kun ηaag, u g fid g suol u kua. Fai yal n nyan l mɔ ii? U bid bo yed k wan ηaa k ban gad g pign Yam-nyie yen u baa-nba g tien'm fam i. K u yie k ban ηaa l kul, k b g pind cugl g pinη jonn.

Jangangand kun belug. Cabl kun u Gaana dinyuyukpienn, k b fiil g tug lieb walb k b saa Kumaad.

Mayula nle po: Cabl n cind g kua lol

Cabl n fiil g tie big, u bo g ban g kal pipebl po kaa yo g bual k wan kua lol baa yenm. Cicie mɔno, u naa n yaan bo be yen big dogda i, k u yual bo maan'o cicie k b baal Daapaaɔnɔ Tantiug dogda ɲaag. Cabl yen u sal n fiil yaa daal g saa Gaana, b kua lol jounɔ u nyieɔg, g tɔgn Baɔug po. B kua g kal lol n ninɔ k u fiil g daa saa bal bal nne i, g sua kul kal suoo. Wan daan nyie dopienu n ninɔ g gbenn yaa youg, k u ɲmigd. Cabl bo g mali k u bu di miɛ l nyieɔg. U nunɔ po kul bo fu i, k u pal po do, u gii yed k wan diid cincann po, g bona pend lilb lilb, wan guan g tibn. G lieb nuan yen guand g fuul gɔmuna. Cabl l cagn cagn nnyan i k l tan fann, u g ɲub ninbinn. Ban bo kua lol nba nyan, b bo tie niib piinle yen bantaa i, k l lol n yen bo mɔg kinkaani piig yen ɲanmu kua i. B bo ɲman g kal kal lieb po i. Cabl bo kal g kpiɛ puogbenɲl nne i, u gii tien wan ɲmagb ɲmagb g tien nyan u bu fiil nyan, g tug u sikpidyenn g nyagn Cabl po. Siind n bo mɔg'o k u biɛ jie jiwaani nyan, u bo kan fid g maad siɛl. Lan fann g lol sed g sua kul daa bu nya g nyann, g la jied g di u, k ban fid g pend nyan, Cabl nuan g fid g fiil. U nuuganɔ tital nuan bo tad i canyiin, g dugn puogbenɲl ɲano n bo kal l tital po nyamunɔ nyan po. Nyieɔg n ninɔ siind n bo g ɲaa'ɔg nyan,

k u tan gbal g yid u yucabl g siin l n ninᅇ g ji pɔbn g kal g diε. L kul ne biε bo ᅇanm g pugn fai i u po. U sal bual'o yal kul, u g jiin baa lanbonn. U bo kal lol n ninᅇ gbadl i, u ji bo g yen u kua. Nyinnyannu bo mɔg'o, g binniinu mɔg'o, k u mɔb n to, k u tital tad. K u mali mali g tan maad u kua k u bu mind i, k b daan gii pund muaɔg n o wan nya g nyann. U g ban k b ji daa bu ᅇanm g kua dopienu n ninᅇ n nyan.

Lieb nyiε g dii g guan g kua lol n ninᅇ k u fiil g gad g gaal sand g wogd g maan. L youg u g Cabl fala ᅇanm g pugn. U gii yed k wan diid cincann, u sua g tiidi pend filb filb, g tinᅇ jiln, g niib sonm tuntuna. K u maad u pal n ninᅇ g ne baa tie tinkpiiug po i. U gii gbeg g diid lieb, wan sua g yua kul kal suo, g yenm kal g pag mɔno nyan l g maad'b siεl nyan. L kul ne bo suol'o yaalidug boncienn. K u tan mali k u sal baa bo kpe Gaana i g nɔd g kpen g tug'o g ji kuan'o tinkpiib lol g leb yen'o tinkpiiug n ninᅇ. L maalm bo kuan'o jiwaani boncienn. K u ji kal g jegl, k u nunᅇ po fu. U sal maad yen'o yal kul, u g jiind siεl. B tan sua ninsijena kukua n ji kal kal kal. U sal g laabaal i? U yed k wan yaad g diid u sal, u sua k u sal mɔb n ninᅇ mɔn kpeonᅇ. U sal bo ᅇman guol i. Ama Cabl n bo tug maalm k u sal baa tie tinkpiil nyan, u ji g mali guol po nuan

palb, u ji mali g tanmɔnd n gbie u sal mɔb n. Wan l la nnyan yaa youg k u bad g yign bag bag, g lu u siind yen yucabl, g yug g daan lagn niib po lol n ninɔ. G niib kul fiil yen lol g kai kai, laabaal i, laabaal i? G dɔlb sed, k b kul te yanyiin g yad g nyie g mali k u waad i. L sua g Cabl tital nba bo tad nyan guan lan tu tie nand o, k u mɔ nyie g te bugb g san. K u sal yen naasenm banle nne nyan g bel bel g daan pua u titala po k u baa k b baal g bud g nyii g lol, g guan yen'o lol buol. G niib nba bo be lol n nyan yie k banm ji kan kua lol yen waad nuan. Dɔlb nyuand g sua u gii nyan niib banle g nmiɛn'm b ligjenn n su yen b kul r̄ yie k b ji kan kua u lol g gaal b ligli. K u nmiɛn Yam-nyie yen u n̄aapuo b ligjenn g pend yen lieb. Yal nba bo n̄anm g yaan Cabl yam bo tie maam buol i. U sal n bo maad yen niib mabuolu nba nyan, u bo g ban g gbad palb. U bo l g ban baa mabuolsaɔg kaa yo. Wano bo mali k b maad tinkpiib maam i.

Lol n bo sed naan buol nyan bo tie n̄manpuld doug u. G Yam-nyie te g niib tod'o k u tug u n̄aapuo g gad yen'o n̄manpuld bad n̄aag. B pund g bad bual k u nyie l̄ i, k u yed g Daapaasɔnɔ, g Togo. K b sun g kpaan gulma jua nne k wan sɔgn maam. Yam-nyie n yaan ji dugn gulma jua lan tien tien nand k u tan tug u n̄aapuo g saa Gaana nyan, g n̄kpele nba be l buol maad k u baa n

tien'o k u waad. G ne g tie ban gad jibaabunu
 kaa. G lieb yie k b gii g gad baad i kaa, b kan
 bann l mamoni. K b fiil g gad tingbandieog, g
 tingbandaan daan gaal tuda njanle g maad g
 puuciensola n suol'o, k u naa n dii suaog g suol'o.
 K ban kun g guan yen petonpienn, yen
 kpanpieonŋ, yen ligli tuda nanna yen kobiinna
 yen piinna yen kumuunna, yen gca piinna yen gca
 nanna. L sua ban bo paa nyan, Yam-nyie bo g
 njuu baa kuug. Tuda njanle nba k u bo nyan g pa
 tingbandaan nyan bo tie ligjenn nba g dolb bo
 nmienn'm nyan i. B ji bu tien nle? U guan bad njaag
 g sua puo mo yign yign g suon o. G puo maad u
 sal k wan miel sugl g lod'o k wan nyann. K b poi
 naasenm k b lod'o g ji nua'og, k u gii san i yaa
 ban bel g suol'o. Cabl n yaan gad g nyann
 nyanmonm yen nyanmuao g kul g guan, g gbad k u
 sal yen gulma jua njanle ji maad wan bu tien nand
 g la ligli g gad yen u njaapuo tingbandieog nyan, k
 u bann g bonn ne g tie tinkpaa yal kaa. K u gii
 jeln sogda sogda b tan bu tug yen doug kul k u
 waad i. Lann i k u yiin u sal k ban pied waam k
 wan maad'o siel. U sal mo g nai, k b pied g sed
 tiig nne nyagl n ninŋ, k u ji dugn dugn u sal yal
 nba baal'o. U sal n ji bu tien nand g guan g dugn
 nmanpuld ban gbad niimn nyan, kai faao g u.
 Wano n bie nyan, u ji g mo g ligli g bu pend yen u
 njaapuo gii saa u sinsaani. Yam-nyie mind g

nyieɔg tan baal k b kul kua g duan yo, k u fiil g jan bad bija ciciepaann g jagn u ɲaapuo k b yaad. Ban nyie doug n ninɲ yaa youg g Cabl bual u sal k u tu tie naayig yaa aa? G Yam-nyie gaal jad, k u la k u jan be i? K u ɲaapuo yed k wano jan cicie mɔlane g bie tua k u g jan siel ii? K u pol g kand kand, k wano g jan kaa, g bad bija n joi'ug g tie'og k wan nya mabl n ninɲ g nyaan g yen sɔb g maad'o k wan daa ɲaa u baa ɲ bann. K l po n te k u tuod g fiil k l daa g fann ne g tug cicie. G Cabl gii mali k l tie faaɔg wan ɲaa k ban lebd bad ɲaag, k l won gii fann g gbenn wan bual bad bija g lie u bɔnd bii u maad mɔni i? Ama k wan yen tuod gii ban k b gii lebd ɲmanpuld bad ɲaag k b bu tug'o g gad yen'o tingbandieog u. G pann mɔ bu yabd'o o. K l kul ne yen g bie, k u bu fid g ɲaa u ɲaapuo l buol g gad Gaana g sun tuonn bina ɲanle g guan g pa tingbandaan u pana g gaal u ɲaapuo. Cabl diid g sua u gii baa be tingbandaan ɲaag bina ɲanle u kukua, u g gbie sua maam, lann cie kuum. K u ɲaa cicie maam k wano yen u sal tɔgn sɔnkubdi-kubdi g daan nyie doug n ninɲ.

B pund dobig nne ninɲ i k u kuad l cicie g gaal tuda ɲantaa g gad g cua Tanmal lol tigd k wano yen u ɲaapuo kua g yaad. B pund Tanmal daajɔyengbagl, kud muntaa po i g gad g jiid Gulma-nba bad ɲaag.

Mayula nantaa po: Yam-nyie san g naa Cabl Gulnbad naag Tanmal

Tanmal Gulma-nba bad bo tie kpinkpendl i, jamɔgdɪ nba g mɔg u lua. B bo yi'ug Yal-b-kua i. U bo gad Gaana g tie naasenbig i, g yegd yen Jangbiɛd yen Muada yen Gulnjab nba bo tie kpinkpeonŋ g saa Bulcina yen Togo yen Naajilie g daa tied g gɔ g kuad Gaana i. U yul bo man k u tuu canbaamɔn po k u tod'o k u bilg ligli waam waam g tan luod u yul po sitɔug. Yal-b-kua bo tie jafagdpaalug nne i, g tanpala dua kpieni n wala. U bo g maad maam boncienn, g nyaan u gii yed g yal nba bu tien, lann n bu tien. Yen wan l mɔg ligli yal kul, u bo kuan puoyenŋ i, g mal bijabi bantaa yen bipuobi banle. U bo mɔg yam boncienn, g tod tali yen saanm. L po n te g Gulma-nba yen Muaba-nba nba bo be Tanmal nyan bo gann'o k wan gii tie b bad. Yam-nyie n yaan bo ban g Yal-b-kua tie nimɔn g gaan saanm yen taladdanm nyan po n bo te k u gad g can'o. B bo pund bad naag k b gaal'b g kuan'm saanm dieog n ninŋ i, g la nyum g tie'b k b wul, g duan waam g fuod k b tien daajuaɔg jied k b dii g kua g duan. Ban bo tie'b dieog nba k b duan bo g naan k l tie saanm dieog. Gadoug nba nyan n bo sie l n ninŋ g biel dinŋ miaaaa, g tiebl sie ceb, k b tabn

tabn fuodi g daan lind dikpina kul. Cabl bo kua dieog n ninḡ k l tien'o nyan danḡd nyan i. Ban mal'o, u bo g ban g duan gadoug po, u bo g ban g kua dieog nba ninḡ g laatilg muu be, g ḡmaa ji maad k wan gii kal o ban kua g tuan jied tiebl po mō i? L daal Cabl bo g guan u yam n ninḡ. U bo tu duan waam nne g kud g fiil i, k l tie nyan sua bu baal g pua pua gann g maad k u danḡd po juab nyan i. Guam tan suol'o sigafaani (sigafaani) po i k u guan g yendu tan siid k u daa l g find.

Yam-nyie bo tuod g fiil g sua k l daa bōn. U bo maad Gulnbad bija k u bu jiid daag n ninḡ g daan cend ligli yo g guan. K u die Togo ligli kua i, k u ji g mōg ligli nba k u bu kua lol g pund Kumaad. K u saa daag n ninḡ ne i k u kan wai. Ase ban pund Gulnbad ḡaag nyan, u la naasen nne g bann'o. Wano yen l naasen n bo be Kumaad, g Yam-nyie tan bōnd'o k b gad g daan bu jan puucienn nne tied k b suol'b g gad g luon'm dansalg. Buud daal g Yam-nyie maad g naasen ḡano n daan bōnd'o g kuan'o naayiug sōnu n ninḡ, g maad maad g yab nba bu buud nyan tan tie'og mōni g luod'o g ḡaa'ōg g nyaan ḡaa Gulma naasen ne k u luo. L naasen dōnn-nba n bo gad g la Gulma-nba bad hal Tanmal, k u jiid Kumaad g pa u po k b luod'o. Lann, Yam-nyie n ji pund Gulma-nba bad ḡaag g la l naasen nyan k u

yam pud, g dugn u bo ban g naasen n̄ano gii bann'ò, u kuum n nyan. L po n te k u bo tug kpalcapiend g n̄agn u nun̄n̄ po g ji kpil g kband m̄al g yen tu g m̄ald.

U yul n bo man k l naasen g bann'ò nyan, k u maad u yam n k u gii san g n̄aa puo lann n su yen ban bann'ò g suol'ò g daan luon dansalg. L yanjagl i k u bo tug, g tuod g fiil g n̄aa puo g dugn guam bo paad puo o. Cabl bo kan fid g fiil l youg. Wano Yam-nyie m̄o biε bo kan fid g maad puo k ban san. Bad bo n̄anm g gaal'b. B biε ji bu san be po i? Bε po i k b bu tuod g fiil g yaad g g cab bad i? Yam-nyie bo g la wan bu maad puo yal nba wan gbad niimn g tuo ban fiil g san k l daa g fann. Yam-nyie bo mali mali nyieεg k l tan fann i, u g la wan bu b̄ond puo nand ban san nyieεg n nin̄n̄.

L fann, kud piig po yo, g Cabl tan fiil g sua k b tuan tiebl po sīn̄aaεg n jied. Ama u bo g la u sal. Lann i g bual u po k b yed k u gad daag po g bu cend ligli u. G Cabl nyie g la nyum g wul g dii jied. Wan bo g ban sua nyan, k u guan g duan waam. L saa kud piig yen munle po, k u bual k u sal biε g guan ii? K b yed k u daa g guan, k l yaa g lid b m̄o i, k wan gad naan doug n nin̄n̄ ligcendu nyan yen g fag. B guul guul yentumunn, jua guan yaa aa? B tan kua g duan i, Yam-nyie g guan. L

fann, lann n nyan. Dana ji l pend nnyan i, g daan kpii nmaalg. Cabl ji nyind g be Gulnbad njaag i, u g ban sua, u g ban doug, u l g ban wan bu cil naan kaa yo, g bual wan bu juod naan i. L gii fann bubuul yen bubuul kua i kaa, siel yaa tuonn g be, sua kan gbad u mɔb n maam, jied kan di, g guam n ji bu guan ii?

Gulnbad diid g sua u gii njaag'ɔg k u dua u kukua saanm dieog n, b tan bu kua diyenn g sua kuum i. Lann i g Gulnbad te k u dinbien ji tu kua wano yen Cabl n taan g duan. L tien njaali yintaa yo, g bad tan yiin Cabl g bual'o buali boncienn k wan bann Cabl sal n tie yua nba yen mɔni. Cabl n yaan dugn dugn wan bann u sal nand, ban tɔgn tɔgn nand g tan pund wano Gulnbad njaag, g bad kal suoo g tan maad k wan daa jie, k u sal bu guan g juab'o diyenn, k u gad ligkpaanu i. Bad n yaan maad maad Cabl yanfomaam nyan, k u pal sɔnɔg k l daal k u dii jied, g nyieɔg baal k u guan lan bual nand. K l fann k u nuan bad njaapuo daag n ninɔg ji tod'o k b kuad u kuadm.

Bad njaapuo Yaa-bul'n mɔ bo tie nyan u sal nyan i, kpinkpeonɔg bo tuo'og. U bo saa dingbankunkogi g daa sankpai yen juoni yen kpinbuoli-buoli boncienn g gɔ g kuad Tanmal daacienn n ninɔg. Yaa-bul'n bo g kua kalaatu, ama

u tuba n bo man nyan, k u gbad sandm, g gbad kusaal, g gbad jilnd, g gbad fal-fala yen jangbiem. L mabuoli banm bo tod'o boncienn u kpinkpeonŋ n ninŋ.

Cabl n cil g yegd yen Yaa-bul'n g saa daadi nyan, k u mɔ ji gabn maam waam waam, g banŋ ban di daaɔg nand yen ban gɔ g kuad nand, suoo suoo. Cabl n tug u yul g cibn kpinkpeonŋ n ninŋ nyan k u ŋaa yam. Yensiign ninŋ nuan u bo g laad yaam g mali u sal po boncienn. Ama nyieɔg nuan u maalm kul bo tu guan u sal po i. G bad tan maad u bipuo k u tu gii banŋ u kadaad g gbenn g mɔg yaam waam wan gii banŋ Cabl mɔ kadaaɔg liinu yen dienu. Cabl yul bo sonm. Bad bipuo n l cil g banŋ'o liinu yen dienu, g sua k u banŋ tonm tonm nyan k u bual u baa, k u kan kpaan miedl k wan tod Cabl ii? K u yul sonm boncienn. G bad maad k u bu mali l po.

L tien nyan daa piig nne i g naasen nne baal bad ŋaag g yed k u kua kalaatu Akra i, g luol ligli nba k u bu pa u kalaatu po. K u baal k wan lie u kan la tuonsiel bad ŋaag g sun g la ligli waam g lebd ii. G bad bual'o k lann u ŋaa kalaatu i g baal ne ii? K u yed k u g ŋaa kalaatu kaa, k b daa cab'b i, k lann n te k u waa g kpaan tuonn k wan sun g la ligli waam g kalaatu guan u wan fid g pa u dieog yen u kadaad po. G bad maad k wan be

naan buol Tanmal ne, k u tie saan i, k u g mɔg kpaab, g tuonsiel biɛ g be ne g tie gbanbanda tuonn. Lann i g bad dinbien maad u baa k u kan te k wan gii banɲ Cabl kalaatu ii? Bad bo jie yen wan tug Cabl g tien'o kalaatubig nuu n ninɲ, g dugn Cabl yen l kalaatubig kul bo ŋman g taa baɔnɲ u. Cabl bo mɔg piig yen bina ŋanluob i, g kalaatubig ŋano mɔg nyan bina piinle yen ŋanle nyan. G bad mali mali g tan maad k l kan gbal jagl. Lann i g la sipaanm banle nne k b mɔ bo g kua kalaatu palb, g maad g naasen ne n̄ gii banɲ'b kalaatu laad n ninɲ taal munle, yaa dana nba g Cabl g saa daag nyan. G biɛ pugn g maad l kalaatubig g daajuɔɔg mɔ b tu gii dii g gbenn wan kuan'm kalaatu waam.

Lan cil l daal, yendu n yen nyiɛɔg, Cabl tug u tagm yen u cicili kul g tien kadaɔg n i. Nyiɛɔg gii baal k b dii g duan, u baa kal g banɲ i hal yɔgsiiug n̄ tan siid. L gii fann k u saa kpinkpeonɲ u die kadaɔg u. U daan gii sen u kuadm wan kal gii lii u kadaɔg. Yaa daal k u g saa kpinkpeonɲ nuan b ji g maad. U tu lii g led led, g bobn g gbenn canyiin g kalaatu youg daa g pund. Miɛdl gii cil kalaatu, l tie nyan Cabl nuan tuod g ban wan bu kuan'm yal nba po nyan i. L tien nyan daa piig nyan k u ji lugd jilnd bituudm i. G sipaanm banle nba k b bo taan g banɲ'm nyan fiil yen nanɲ g

gad g maad bad nyaapuo g Cabl bōnd'b i k u g kua kalaatu. K wan gbiε bituudm nba, g yab nba kua g gad fagm mōno, g yend yend i kaa, g boncienn g gbiε l bituudm. G biε pug n g maad g naasen nba banj'b kalaatu nyan tie u naasendōnn i. K b ban lieb k l wai. K u gii baal kalaatu, k u tu bual Cabl kukua i buali. K b tu pag b ηmiel n ninj i g maad maam nba k b g gbiε. G yenn youg mōno Cabl tu tan dien dieni nba g miεdl g ban g ηōn'm palb. K b mali k l miεdl tu wuon g te'og l kadaad yen l dieni ban cend lieb naan buol bunbōnn i. G maad g kalaatubig ne yed k u g mōg ligli ii, k u fai i. G daal kul wan tu did gband nba g te Cabl, g ηaa i, g Yendu kua n ban.

Ban maad maad nnyan g Yaa-bul'n pal bie. Ama wan bo tie puoyanfodaan nyan, k u suol u kua g g maad u sal siel, u biε g bual Cabl mō siel. U ηaa k l tien nyan daa piig nyan yo, k u tug yanjagl k u bu suli suli g lie ban maad'o yal nba tie mōni bii faaog u. U cind g bign Cabl Jilnd bituudm i. Wano yen Cabl n bo yegd g saa daag nyan, k u maad Cabl, g dinne b gii gad daag k u bu cab Cabl i mōb k wan kuad b kuadm kul, g biε daa ban bu daa yal nba kul. Lann i g Cabl maad k u bu tien nle i g daa bona lann i kaa g kuad kuadm g yen g gbiε maam i? G Yaa-bul'n maad k wan daa jie, g daag n ninj niib boncienn gbiε

Jilnd bituudm, k wan daan gii maad bituudm n ninj g lie niib gbiε bii b g gbiε i. Lann i g Cabl maad k u daan g maad'b k u g ban g kua kalaatu palb ii? G Gulnbad n kpaan miεdl nba k u tod'b ne n banj'm waam, k u gabn l yaa bonjena i. G Yaa-bul'n maad k l kul ne g biε, k b daan gii baal k l paad'o k u bu tod'o. Lann i g ηɔn'o ban tug kuadm nba nyan bonn kul daaɔg, g biε maad'o wan bua ban daa yal nba g kun yenn g daan gad daafanη wontum g kuad.

Ban pund daag n yaa youg, g Yaa-bul'n maad k u bu gad g ηmaa u pandaan nne g gaal u ligli. G puo nne be g mɔ tie Gulma, k l puo daan daa u kuadm, k l saa ηmaali yinmu n nyan k u g pa. K u bu gad g daan pibl'o i. Lann i g paan g saa. L sua k u tuod g joi yen u dɔnn nne g Cabl g ban'o, g maad l puo k wan baal g kal g kpien Cabl g lie u bu kuad kuadm nle i? Cabl kal g guu g Yaa-bul'n bu guan tonm i. Niib baad g bual kuadm po, u kan fid g kuad. Mɔni, u bo gbiε Jilnd bituudm waam, ama wan bo gbiε yal nba bo kan fid g tod'o wan kuad kuadm. Wan bo saa g kuad kuadm nba, u bo saa Gulma-nba yen fal-fala daag n i g kuad. U bo g ban g gad u kukua naan buol nba k b maad Jilnd bituudm g Gulma-nba g be l buol k u ban'm. Cabl n guul guul u cannaa g sua k u g gɔ nyan, k u tan gbal g nagn puo nba bo

kal g kpiε'ɔg nyan g bual bitujena n ninj (Yu gulma anda sitand?) L niimn tie k u gbiε gulma aa? G puo ηano jiε g lebd nui, g kpagl tubl n, g ηɔn k u g gbiε wan maad yal nba. Lann i g Cabl ηɔn'o kuadm, g tuu ninbinn g ηɔn'o, k wan gii nyuan u kuadm o k wan baal. Lann i g pend g bual puolua (Yu gulma tɔk?) L niimn tie k u maad gulma aa? K l puo guan g ηmien'o (Mii no tɔk gulma, mii tɔk fal fala, mii tɔk asante, mii tɔk awusa.) L niimn tie k u maad fal fala-nba maam yen sandm yen jangbiem i. G Cabl pend g gad puolua buol g bual'o: (Yu no mann gulma tɔk?) L niimn tie k u ban sua k u tie gulma daag n ne ii? Lann i g puo ηano fiil g tien g yiin gulma puo nne k wan baal nii, k b kpaan'o ne. G puo ηano fiil g tan baal g bual g ηmaa kpaan'o i. K b yed g puosipaan ne n kpaan'o. K u bual Cabl digbanm n ninj k u bua be i? Cabl g gbad wan maad yal nba. G puo ηano guan g maad yab nba bo yiin'o nyan, g puosaan ne g gbiε u maam. K l yaa g lid puob nba bo kpaan k ban tod Cabl nyan. K b ji bual bual b ηmiel n, k u g yed k u kpaan gulma kaa aa? Lann i g ji guan g bual Cabl Jilnd bituudm n ninj: (Yu kam wer?) L niimn tie k u nyiε le i g baal ne i? G Cabl maad g Togo, gulma. K u gbiε gulma yen muaba. Lann i k b biε guan g yiin puo nba k b bo kpiε g yiin'o nyan, g maad'o k wan maad puo ne k b bu kod'o, g liε u bu tien nle i? G puo ηano

maad'o digbanm n ninḡ g puob ne yed k b bu gad
yen'o sandbad ḡaag. G ligdanm banle be l buol g
kpaan saan. K wan gii sonm ban gad. Cabl g gbad
wan maad yal nba. Ban sie g maad nyan g nikpel
nne baal g bual digbanpuo ḡano k l sipaan nyie le
i? Nikpel n cil g maad nyan g Cabl diid g sua k u
maad g ḡmad yen muaba. Lann i g Cabl ji maad
yen l nikpel muaba n ninḡ, g maad'o k u g gbie
puo ne n maad yen'o mabuolu nba ninḡ. K l
nikpel maad'o k u maad yen'o digbanm n ninḡ i. K
ban be naan ne g niib mali g digbanm yen muaba
yen gulma-nba kul tie yenm i, k b mali k b kul
maad mabuolyenu i. Lann i g ji fuon yam g bual'o
laabaal. G Cabl maad k wan baal g tod'o k wan
kuad u kuadm o, g yuand g dugn'o yal nba be. G
nikpel ji baal g te Cabl masḡnd. Cabl n tie saan
nyan, g niib gob g lind'o. L yann yann k u kuad u
kuadm kul g gbenn o. Lann i g ji tug g dugn dugn
nikpel lan tien nand k u tan be daag n g kpaan
yua nba gbie u maam g bu fid g tod'o wan kuad
kuadm. G nikpel yed k wan ḡaa k wan gad g
guan, k u mḡ bo baal yen kuadm i g guun bid g
daa saa g bu pa daatigd po. G daatigd gaala gii
baal g sua g bid kuad kuadm g g mḡg daatigd, k b
bu suol'b i. Lann i g pend g saa.

Muaba nikpel l paan g saa nne, sola, Yaa-
bul'n mḡ guan n nyan! U guan g sua g Cabl ji kal

nuukuoni i, k u kuad kuadm kul g gbenn o. Yaa-bul'n n fiil kpinkpeonɔ, u g ban g kuad kuadm k l gbaa g gbenn l youg l youg. B gii gad yen kuadm siɲaaɔg n, yaa daal nba k u bu yed g daag be, k u tuod g kuad u kuadm, lann yensiig po i. U g ban g kuad kuadm g gbenn g yendu daa g siid nuan. Wan la g Cabl kuad l kul g gbenn nyan, k l cɔg u gbanu. K u maad u pal n ninɔ g puo ne tie nikpiil i. K u yed k u g gbiɛ maam, k u g ban sua daag n, g ji tien nle i g kuad kuadm g gbenn g yendu daa g gad siɛ l i? Yaa-bul'n biɛ kan fid g bual wan bo kaan u dɔnn nba k wan gii guu Cabl mɔ. U bo g bua g Cabl n bann k wano n sun l puo Cabl buol k wan suli'ug. Lann i g Yaa-bul'n pal bɔnn g pend. K u maad Cabl k wan fiil k ban kun. Cabl g gbad niimn. Lann i g bual u cannaa k b kan daa bona nba k b bo bu daa g kun yenn yaa aa? G Yaa-bul'n maad k wan ɲaa l kul ne, k wano g bua naayig tuona. K wan fiil ban kun. U ji bo mali k wan kun g maad u sal k wan tuod g bel g yaan Cabl ɲaaɔg n ninɔ k wan tan daa baal yen siɛ l yaa yubɔnn b po i. Lann i g yugd u tadug g tagn tadlieog n ninɔ g tug. Cabl yed k wan gaal'o tuga u g tuo, k wan ɲaa, k u kan gbal tadkuond tugnu kaa. K wano tuod g tug tuga k b daa g mal Cabl, k u g bua u todl. Cabl g gbad niimn, g caan bubuul. Cabl n la g Yaa-bul'n ɲmid nunɔ nand nyan, u bo kan la papaal g bual'o wan biil yal nba

k u cannaa pal bie u po nnyan. U ji l nua g buud ninsiendi.

Ban pund njaag yaa youg, g Yaa-bul'n kua g sen u tuga g bual njaagdaan po, g bid maad k u gad situg n ning o. G Yaa-bul'n tul g nuan u sal situg n g daan bu maad'o yal nba tien daag n. U baal g sua k u sal pag yen nikpel nba bo tod Cabl k u kuad u kuadm nyan i. Wan fuond fuond'b g gbenn yaa youg k l nikpel bual Yaa-bul'n Cabl po. K l yaa g lid Yaa-bul'n yen nikpel ne n tan ban Cabl naan. G ji maad u pal n, g Yendu n tod'o k u tuod g bann g naayig kua wano yen u sal njaag n. K l bo gii tien daa nle, g Cabl bo bu fiel u sal i. U ji bo guu nikpel n maad g gbenn yo, wan maad u sal k wan kagn tonm g kun g nyan Cabl g fagn u bann. Lann i g nikpel dugn dugn Yaa-bul'n yen u sal, Cabl n la fala nba g tan la nil daag n k u sogn maam u po k u fid g kuad u kuadm. K wano nikpel ne n nja u kuadm yen u bid g tod Cabl k u kuad Yaa-bul'n kuadm kul. G pag Cabl boncienn g maad k wan mal o, k u g ban g la big nba tie bimong nyan Cabl nyan. L youg, g fai suol Yaa-bul'n k u tibn. L sua k u daa g maad u sal siel. K u sal bual k l man ii k u gad daag g g wai mono g guan g kpen ii? G bii daag kpil yaa aa? G nyan sua g janm do? Yaa-bul'n daa g la yaam g jiin u buali mono k u bie pel g bual, k u saan ii? G nyan

u tan g kpaan maam daag n ninj aa? Yaa-bul'n ji l g ban wan bu jiin yal nba. K u maad u sal k u bo baal k wan maad'o g dinne daag tuo'og. G Cabl n kuad u kuadm kul g gbenn g yendu daa g siid. G nyan nikpel ne n dugn nand ne, k lann n nyan. K wano bo gad g bu njmaa g gaal u pann siel po g tan guan g sua g kuadm ji g be. K wan bo guun Cabl yua nba mo g maad yal nba tien. G moni nuan, k u pal bo bie g pend, k u mali g puosipaane bɔnd i k u tie saan, k u g gbie maam. K l po n te k u tug u daanmand g kun. K u g mind g bu daa kuadm nba k u daan bu kuad Kɔnbɔni daag n ninj wontum mono. Lann i g ji juab sipaanlieb nba tu banj kalaatu yen Cabl n yaan daan maad'o yal nba Cabl po g dugn u sal. K l kul ne n taan g te k u tan mali maalbiid Cabl po. G Yaa-bul'n sal maad g Yendu n bua k u daan g maad'o siel. G Yendu n bie bua k u baal g tuu g nikpel ne be sitɔug n. K b bo bu sun tuonkaad n nyan. G maad lann i k wan lebd g kun g daan pua pal g miel Cabl sugl. G fai bie njanm g suol Yaa-bul'n, k u jiin ninsiid. K u sal maad k wan fiil k ban kun. G tug lol g kuan u njapuo k b kun njag.

Yaa-bul'n yen u sal pund njag g bid maad g Cabl buud buud k u ninbina mon i kpeonj, k u kua g wuo dieog n ninj. G njagdaan maad k ban kua g yiin'o nii. G bid kua g maad'o g njagdaan

kpaan'ò. B maad yal kul u g sag. U bo tug u nunŋ g pɔbn u pana n ninŋ i g ji l buud. G bid nyie g maad ŋaagdaan k b yiin'ò k wan nya k u yie. G ŋaagdaan mɔno fiil g kua saanm dieog n, Cabl n bo dua naan ninŋ nyan g sua k u pɔl pɔl u kua g cuu lɔdg n ninŋ g buud. G ŋaagdaan yiin'ò g Cabl! K u yam pud k u tibd g sua ŋaagdaan sie dimɔb n. K u baa g gbaan u nunŋ n, g buud g miɛd'ò sugl, k wan miɛl sugl g daa bel g nyan'ò ŋaag. K u g ban wan biil yal nba, ama k u tuo u biid, k lan tie yal nba kul, k u tuo k u biil, k wan miɛl sugl g daa bel'ò. G baa b gii yed k wan gii mud tana, k u bu sun l tuonn. K u biɛ gii bu pua'ɔg mɔ wan pua'ɔg wan bua nand. G baa puad gii baal yen u kuum mɔno l g biil. K b gii pua g kpɛii'ug wan be naan ne lann n sun yen ban bel'ò wan tuln tuln g daan kpe muacɔg n ninŋ. G ŋaagdaan nagn g suol u nuu g fiin'ò, u mali k u bua n pua'ɔg u. Lann i g sud waam g sed g ŋub, g jiin u kpinkpani, g tand kpienu g ji guu ŋaagdaan tanpacɔg. Yaa-bul'n mɔ kua n nyan g sed g kpien u sal, Cabl g ban k u cannaa kua. G ŋaagdaan maad Cabl: N bipuo, nagn nii, n kan tien'a siel. A g biil sua siel, sua mɔ kan tien'a siel. Cabl g ŋubd, u biɛ g tibd mɔ g bu diid ŋaagdaan. U tiib yo, g maad yen ŋaagdaan g buud g tua: Canbaa, n ban k min biil yal nba g mɔg sugl. Mɔni, n g ban min biil yal nba nuan, ama n biid bo gii g ŋanm g yabd

k l pend, n naa pal bo kan be n po nnyan. U bo yi Yaa-bul'n u naa i. N naa nba mal'n mɔno kan fid g ŋanm'n nyan fin yen t naa Yaa-bul'n n ŋanm'n yaa ŋanmu nba. N g ban yubɔnn nba ŋua'n k n tan biil'i. Yendu i kaa kua i pala n, g ŋɔn'i min tien ŋanm nba, nifosaal kan fid g te yin bann. N daan paa ne g tie kuum i, k i te k n guan g yied. G nifanu i kaa, l ji tie bɛ i k n tan bu biil l yaa Yendu niib i? Baabaa, n miɛd'a sugl. N g yed k a ŋaa'n yen n biid kaa, dad n tubl k lan gbad'n, k n daa ban g sunn n biid po. Daa nyuan n ninsiid kaa, dad n tubl k lan gbad'n. Lann i g baa g gbaan ŋaagdaan nintual n, g l tiib i. G ŋaagdaan biɛ suol u nuu g fiin'o g wob g suol'o g maad k wan suon g daa buud. L youg u g Yaa-bul'n mɔ nagn g suol Cabl puol po k wano yen u sal ji diɛ Cabl, g Cabl be b sinssiign. K banm bantaa kul ji buud. ŋaagdaan nuan bo g buud k l do ama ninsiid bo nya u ninbina n g cuud Cabl po. U ŋaapuo nuan ji bo l buud nyan kuum n kpil'b nyan. Yaa-bul'n yen u sal kul g fid g maad Cabl yal nba baal.

L tien nyan miid piig nne g Gulnbad Yal-b-kua nyiɛ g ŋaa Yaa-bul'n yen Cabl. L youg u g Yaa-bul'n ji dugn dugn Cabl yal nba baal. Lann i g yuand g miɛl'o sugl, g Cabl yam duan. U gbanu n bo jeg g pend nyan, l daal u g fid g dii jied. Yal-b-kua bo te k b kpil kpaani yinmu i l daal g maad

k b gii tien ban te Cabl kpanyeonj bogdm. G nyaan yen l kul, Cabl bo g fid g dii. L bo tie nyan dangbiid i k u dang nyan. Ama ban duan nuan, u guan nyan u kpe nyan i. L tien dana piig yo, g Gulnbad kal yen u njaapuo g mali ban bu tien nand g tod Cabl. K b mali mali g tan suol g Cabl n yaan g jie fala, k u pal n pien, k u yul mɔ biɛ somn nyan, k b bu tod'o k wan njanm g banj kpinkpeonj u. G njaagdaan maad g Cabl sal n yaan yaad g g go ne k b g ban wan bu guan yaa daal, k u bo mali k wan kpaan miɛda banle g pugn k ban gii kuand Cabl kalaatu k wan gbaa g gbad maam, g bann liinu yen dienu tonm. K u njaapuo maad k u maalm njan.

Lann i g Gulnbad kpaan miɛda banle g pugn yua nba daan kuand Cabl kalaatu nyan po, k b ji kuand'o kalaatu g lebd, yua kul yen wan ban yal nba. B bo baad laad n ninj daa nantaa i, siɲaaɔnɲ n kalaatu. G nyaan daajuaɔg nuan b bo baad daal kul i, daa nlile g tuu daa nlile. Cabl bo ciend u cannaa daag laad n ninj daa nanna i. Dana nantaa nba k u bo mɔg kalaatu siɲaaɔnɲ nyan, l daajuaɔg kul u bo saa g suun njaapuotuona g tod puucienn nne i k u sal bo kpe g njaa'ɔg k u bid kul mɔ yaad g gad Kumaad, k u ji be u kua yen u yaabuonn nne k u mɔ daa kan fid g sun siel. L puucienn bo mɔg njalman g nyaan u sal tonu po

n bo te g bid kul san g yaad g pol k b kan kpen. B baa bo kpe k b kpen g pii kuum kua i g lebd ban bo san g gad doug nba. Cabl bo miel Gulnbad yo g saa g tod l puucienn yen tuona, k l puucienn tien'o ligli waam waam. Jied n bo be Gulnbad ngaag g Cabl di g buod nyan, u bo g di ligli nba g puucienn nba k u bo tod'o nyan bo tien'o. U bo gbinᅇ u cincenn n ninᅇ i, u gii saa naan buol kul, k l ligli be u po.

Mayula nanna po: Cabl kua kalaatu

Cabl njanm g cibn kalaatu n ninŋ. Ŋmaali nluob nyan g Jilnd bituudm nuan ji tie nyum i k u nyu. Lann i g Gulnbad gad g la Tanmal miɛda yudaan g maad'o k u mɔg u bipuo ne k u yul sonm hal boncienn, k u bo bua wan liɛ b bu tien nle i g tod'o k wan gad liig waam i? Lann i g miɛda yudaan maad'o k wan gad g la b kunkuann n ninŋ kalaatu buol miɛda cien. Lann i g tie'og kadaaɔg nba bu te miɛda cien n' njanm g gaal'o. G Gulnbad kon gad g la miɛda cien g dugn dugn'o Cabl n tie yua nba, yen lan tien nand k u tan kpaan k wan tod'o k u kalaatu n' gad liig waam g pugŋ. Miɛda cien njan mɔ bo mɔg yanfuom. Lann i k u maad k l won gii fann wan yeg yen Cabl g baal nii k wan bign u banm g diid. K l fann g Gulnbad tug Cabl k b gad miɛda cien buol. U bo g maad Cabl yal nba po k b saa kalaatu njaag.

B pund yo, g miɛda cien bual Cabl buali boncienn, yal nba tie kalaatu banm po, g tan pag pag yul g bual, g yen mɔni i k b yed k u g kua kalaatu fann po ii? G Cabl dugn lan tien nand k u tan be Gulnbad njaag. G ninbaaɔg suol miɛda cien. G Miɛda cien maad lann i k l won gii fann wan baal yen u madkadaaɔg nii k u bu dien u sann g binn tan gii kpe wan tɔ kɔnkuul yen died

tinluob bid g diid. Lann i g Cabl maad k u g mɔg madkadaaɔg. K u ban k u mɔg piig yen bina ŋanlile nuan, ama k u g mɔg madkadaaɔg. G miɛda cien bual Gulnbad k b ji bu tien nle? K u kan fid g dien Cabl sann k wan tɔ kɔnkuul, k u yen g mɔg siel yaa kadaaɔg k l ŋɔŋ u madbina yen wan kua kalaatu naan buol.

G Gulnbad tiib suoo g mali g tan maad k u bu gad g la Tanmal badcien sanktiel g liɛ b kan tuo g tien Cabl madkadaaɔg k wan fid g kua kalaatu i. Lann i g miɛda cien maad g yiko g cab k ban tien nnyan, ama k wan gad g bign g diid. G mɔ bie dien kadaaɔg g tie Gulnbad Yal-b-kua k u gad g la Tanmal badcien sanktiel g dugn payienu nba baal yen'o.

G sanktiel maad g yiko g cab. Ama k u bu pua bad sawal. Lann i g kua g la badcien g maad'o. Badcien ŋano mɔ bo fiil g waa boncienn. U bo tie sijekpel i. U bo gad bitɔa doug mɔno yaa youg nba g Jilnd bitɔa daa bo die Gaana. L youg nyan b bo yi Gaana Golkuod i. U bo ban fala nba g saanm laad. Wano mɔno bo te saan bitɔa doug g la cicagm nba be. U bo jie niib ninyum boncienn, mandg saanm. Lann i k u yiin u kpaaga k b taan g kal g mali ban bu tien nand g tod Cabl. G maad Gulnbad k wan daa kun k ban ŋanm g mali g diid o. L daa ŋantaa daal, g bad bie kal yen

u kpaaga g dugn'm wano mɔno n la fala nba yen lan tien nand k u tan dii miel g kpen u doug n g dii bal. U bo maad'b k ban bo tie sijenm, k b bo pua tɔb yen jaama-nba g daan kua fual n g bod. G daa ɲanniin, u g dii siel, u biɛ g ban wan be fual nba ninɲ. K u sijelieb bo kpe g gbenn g ɲaa wano kua i, k u tuln tuln g daan kua jaama-nba doug n, jaama sije ɲaag n. K u ji bo mali k l gbenn u po n nyan, ama g Yendu sann po, g jaama sije ɲano bo g kuad'o. K u bo te k u wuo u ɲaag n ninɲ i, g tod u puo yen u bid k b ko kpaab. K l jaama sije nuan bo ɲaa'ɔg ɲaag n ninɲ g nyaan guan tɔb n pua naan po, g daan kpe tɔb n ninɲ. Ama k u ji bo l be l sije ɲaag i yen l sije puo yen u bid saa yen tɔb n tan gbenn k b cab'o k u kun. G sije ɲano ɲaag yab n bo fiel u miel, k l yen bo dagd k ban kuad'o g jaama sijenm n suol'o. K u la lann i g bann g yenn youg a gii bua ɲan fiel a lua miel g nyuan yiko n bual yal nba a kan fid. K u yaa po, k u kpaaga bo gii tuo, b bo bu cab sɔnu g bonpuog ne nba ji g mɔg sua ne n gaal b doug ne madkadaaɔg u, g kua kalaatu g wonn po, wan mɔ n won fid g fiel u yul g tod lieb. G badciɛn kpaaga kul taan g maad k u maalm ɲan.

Daal nba g Tanmal badciɛn bo sen Gulnbad nyan bo pund, k u baal yen u ɲaapuo yen Cabl. G badciɛn cab mɔb k b tien Cabl madkadaaɔg. B bo

tug Gulnbad sann i g tien Cabl baa yiɛl n, g tug Gulnbad ŋaapuo sann mɔ k l te Cabl naa sann. K b dien k b mal'ɔ Tanmal i, g kuod u bina g tien piig yen bina ŋanna, k wan fid g tɔ died tinluob kɔnkuul. Ban lebd g kun ŋaag, l daal g Gulnbad yaan biɛ tien jaanm, k u ŋaag niib yen saanm nba can'ɔ kul dii g nyuu g ŋman, g tien Yendu balg. L daal mɔ Cabl g fid g dii jied. L bo tie u po nyan dangnd nyan i. U gii kal kal wan tan pag pag yul g jiin ninsiid. K wano nba daan mali k l gbenn u po n ji tan tie Gulnbad bipuo ne ii? Jaanm po pend g Gulnbad tug Cabl k b gad g la miɛda cien. K u dien Cabl sann g taan yen kalaatubid nba bu tɔ died tinluob kɔnkuul l binn. Lann i g maad Gulnbad, k l kɔnkuul gii tenn nyan ŋmaali yintaa nyan wan ŋaa g Cabl n tu baal g kua kalaatu yen u lieb. G Gulnbad maad k u gbad. K b lebd g kun.

Ban kun ŋaag g Gulnbad yiin tiela g tie'og kalaatu tied k u nyal l nyiɛɔg mɔno g gbenn. Tani daal, kalaatu daal n nyan, g Cabl lie u kalaatu tied g gad kalaatu. U baal g miɛda cien tug'ɔ g kua yen'ɔ died tinluob kalaatubid dieog n g kalaatbid kul fiil g sed. G miɛda cien maad g saan be. G sipaan ne baa kua yen'm b dieog ne ninɲ i. G bid kul caan laad paaa. B bo mali g miɛda cien tie sɔgda i, g dugn Cabl n yaan bo mɔg bina piig yen ŋanlile nyan, u ji bo g tie big kaa. Died

tinluob bid bo mɔg bina piig lann i kaa nyan piig yen bina ŋanle nyan i. Sua bo g cie bina piig yen ŋantaa b dieog n ninŋ. G puomunn ji tan baa kua kalaatu yen bid ii? G miɛda ciɛn tien b po, k b kul te silb. K u guan g tug maam g maad k b g ban wan nyiɛ naan g tan kua kalaatu yen'm mɔlane. Lann, k ban daa laa'ɔg. G tie tie'b cegli g guan g nyiɛ. Yentunmunn, kalaatubilei ji l buln buln g laa mɔmiim i. Sua g tuo g maad yen Cabl. Cabl mɔ g bual sua siɛl. Miɛdl n bual buali nba kul, Cabl bo kal g ban, ama u g don nuu g bu gaal maam g jiin buali. U tien nyan u g ban siɛl nyan i. Daa ŋantaa daal g miɛdl bign kalaatubid kul, cɔdl, kann, maam lugm, makpeli banm yen ŋanduna ne tingbaɔŋŋ n sonm nand. L kul n ninŋ Cabl g kpiɛd baa siɛl. U bo diɛn g ŋmiɛn buali kul lan bual nand, g liid kalaatubid kul. Laad nba ŋuan n ninŋ g miɛdl ŋɔn'm big kul n sun nand. G fai suol yab nba daan laa Cabl nyan.

Kɔnkuulciɛɔŋŋ baal g kalaatubid gad g tɔ, g Cabl gaal b kul liig. G Gulnbad yaan biɛ tien jaanm g yiin u dɔnn-nba k b dii g ŋman g nyuu g tien Yendu balg.

Kalaatu guanu pund g Gulnbad tug Cabl g gad yen'o kɔliɛd. Cabl tien kɔliɛd cincinn dieog n ninŋ ŋmaali yintaa i k b diid g sua u banm cie cincinn dieog n kalaatubid kul. K b pend yen'o

died tinle. Binn kpe k b tien kɔnkuul k u liid u lieb kul. Kɔlied died tintaa n ninŋ mɔ k u yaan biɛ tien ŋmaali yintaa k b pend yen'o died tinna. L dieog n ninŋ mɔ lann n nyan. Ban l bign'm yal nba kul Cabl n bo tu gaal b liig. U tien kɔlied bina ŋanle i g gbenn u kalaatu. K b bign'm Tanmal doug n kul, k u gaal liig. L sua g Gaana gobna nyan yiko k ban bign Gaana kalaatubid kul, g bann kalaatubig nba bu gaal liig. G miɛda kul taan taan kalaatubid kul n sun tuona nand kɔnkuul youg. B taan l kul g sua g Cabl tuonn n lii b kul. G Gaana kalaatu miiniidl baal Tanmal yen paab g tie miɛda ciɛn nba bo ŋmagd Cabl kalaatu dieog nyan. G te k b tien jaanciɛɔŋŋ g yiin kalaatubid kul yen b danm yen Tanmal miɛda kul, baa yen yab nba bo g kuand kalaatu Cabl kalaatu buol kul. K b pii Cabl paab nba yab. B bo tie'og ciciepaann, g tie'og cicie ponm, g tie'og caba nba k u bu fid g tug g nyal tiɛliɛkad, g tie'og taacaad pilmu munluob, g tie'og kpasɔgkam kunkɔna ŋanna, g tie'og ciekona piinle, g tie'og cieyom, g tie'og jeditadi, g tie'og, dunduantieɔg nba k b tu pin nyan, g tie'og piig yen deyeonŋ kadaad kul yen bondienkal, lan tie magmuani nba k b piind l dieni yen yal nba k l dieni g mɔg piinu, g tie'og ligli tuda piinluob. B tug l kul g maan tiebl po g maad Cabl k l kul ne tie u yal i, k wan juab. Cabl yed k wan sonm g nagn tiebl buol g gbal. U titala

bo pua g lelg i. K u sonm nyan u nyuu daam i g buo nyan. K u baa Gulnbad nagn g suol u nuu g cien'o tiebl buol. K u maan nuu paab po g niib ji cuan'o fuodi pilb pilb, k l nyigd u ninbina n ninḡ. B bo g tuod g bobn Cabl l jaanm po. Niib bo yabd, k u biε g ban g maad siel niib n ninḡ palb. L po n te g miiniidl n bo maad g Cabl n maad siel nyan, k u gbal maam. U yed k wan yaad mɔb g ninsiid kua n nyiε. Baa lanbonyenn g nyiε u mɔb n. G Cabl pii u nunḡ po g buud nyan u bu kpe nyan. G Gulnbad wob g suol'o yen paalu. G Cabl tug u nunḡ g pii Gulnbad pal po, g buud canyiin, g maad: baabaa, baabaa, n baabaa, baabaa waaaa, n baabaa, n yendu, n yendu, εin, n cabl, n nalnḡ, n yendu, n yendu, n yendu. G buud g mangband tan cuud. G Gulnbad fiεl fiεl u ninsiid, g don nuu k ban cab'o k wan maad siel. G miiniidl cab'o mɔb k u gii mɔg yal nba wan maad.

Mɔni, Gulnbad bo tie kpinkpendgbennl nba g niib boncienn bo ban'o Tanmal doug n, g biε cɔlm'o. G nyaan u bo g tie yua nba maad maam boncienn. Munle po, wan bo g kua Jilnd kalaatu nyan, u bo g ḡanm g gbiε Jilnd. U bo maad kpinkpenda Jilnd i, Jilnd jena. Ama mabuoli nba tenn, u bo gbiε g biε maad ḡanu, lan tie jangbiem yen muadm, yen muaba, yen sandm, yen kusaal, yen digbanm. U bo gabn fal-fala yen kɔnbɔndm

yen jabalnn mɔ waam. Ban tie'og laabaal nyan, u g cil cil g ban wan bu maad mabuolu nba ninŋ nil kul ń gbad. Lann i k u mali mali g tan suol k u bu maad wan gbiɛ mabuoli nba kul n ninŋ i. U cind g tien Yendu balg i, Jilnd bituudm n. Lan bo tie nyan lanbona ŋanle nyan, u g maad g jal. L bo nyiɛ i fanyiin, lan bual nand. G yuand g tien miiniidl balg Jilnd bituudm, g tien niib nba baal kul balg jangbiɛdm n ninŋ, muadm n ninŋ, sandm n ninŋ, muaba n ninŋ, digbanm n ninŋ, kusaal n ninŋ, fal-fala n ninŋ yen kɔnbɔndm n ninŋ. G niib kul tien nuupuoug lob lob lob. Lann i k u guan g maad Jilnd bituudm n, k u maam po n nyan. K b biɛ guan g tien nuupuoug. Wan maad g gbenn yaa youg g miiniidl fiil g sed. K u yegni yen nigbenŋa nba bo baal kul fiil g sed. G miiniidl gaal liig g nigbenŋa nba tenn kul sagn g ji baad yend yend g fuond Yal-b-kua yen u bipuo Cabl, g yogb nui n ninŋ. L youg u g Cabl mɔ ji fid g fuod g jiin, g ji laa mɔmiim, g gubn yul. Yua nba tand nuu g bu fuond'o kul u bo tu tand u nui yinle kul i g suol l daan nuu, g nyuand o g fuond'o. G nigbenŋa biɛ ŋund ligli, g tie Cabl, k u nuutied kul tan gbie yen liggband. K u gbeg g tie u baa k u gaal g ŋuun u gaalpieonŋ n ninŋ. L sua k b tien jied g bu gaal saanm.

K b tug Cabl yen u baa g gad g kaan'm g kpien miiniidl yen doug n yudanm. G miiniidl yen u yegni yen poliitik niyiga yen sijegbenna kal ganj po, g doug n batieb yen kalaaci tuonsungbenna mo kal jendu po. K b baal g tuan jebuoli-buoli kul tiebl po nyola. Kpalba n ninj daam mo lan nyan. G tuan jeditadi, yua kul mo g jeditadi yinna k l taag taag liel n ninj. G maan jugi yen ban l die yal nba g di jied kul, l mo buoli-buoli. Cabl g ban wan bu tien nand g di jied. K u ji kal k u yam pu. Lann i g Gulnbad sob g maad'o, k wan gii nyuan nigbenna n di nand. K wan gii tie suoo suoo. Cabl n fiil g tie big o, nuu i kaa u g ban g tug bonfann g nyied jied g tien u mob n. Wan jie nigbenna, g fai be, k u bie g ban g dii jied nba k b sen'm nyan, u gii tug yal nba, lan nmad g baa tiebl po. K u baa bie kpaaw'og nuunyiεog, g nmien ninbinn k wan tied'o k wan daa bua tonm kaa, gii nyuan lieb. Yen l cegli kul, l g tod Cabl. U gii tug jied u nuu jegl i gbil gbil gbil. K u baa bie sob g maad'o k u gii kan fid g di wan nja. K l g biil, k b gii kun njag u bu di. G Cabl fuod g jiin. Ama nigbenna nba bo kal yen'm nyan mo bo tie yanfodanm i. Baa sua bo g nyuan Cabl yen u baa. B bo ban k b gii nyuan'm b kan fid g di jied.

Miiniidl g dii bonmōnn mōno, g miel sōnu g nyie. G nigbenna nba bo kal yen'o mo fiil b kul

yend yend g nyie g nuan'o. G yab nba tenn kul fiil g naa jied g g dii baa bɔgdm. G yab nba bo senŋ jied nyan nagn Cabl yen Yal-b-kua buol, g maad k ban guul waam. K b ji nyind g kal. L yann waam g jua nne guan yen tatkunkɔciɛɔŋ nne g gbien jied l ninŋ. G yuand g tug tatkunkɔlieg g gbien nand kukua. G tug dibuolu-buolu mɔ kpalba piig g taan l kul g tien kɔl n ninŋ g tie Gulnbad yen u bipuo Cabl, g maad, k u ban k b g fid g dii. K b yaa po i k b yen bo tien jied ne kul. G jied nba tenn ne, k banm kuku-nba n bu di l kul. K banm mɔno kan di g gbenn, k b bu kun yenn i.

G Gulnbad tien'o balg, g maad g wonn yo, k b ji won bu guan yen tied nba k u tien jied l n ninŋ g tie'b ne. G kuku maad k ban daa bual. K l kul tie b yal i. G miiniidl ne baalu n ninŋ i k b gad g daa l kul ne. G sua kan bual l po. K banm nba suun gobna jetienbuol ne n bu yend l kul. K wano n tie b kul ne cien. K b gbad Cabl n sun tuonn nand g sua kul yaa pal manŋ, k l baal yen kpiegl yen yudand Tanmal doug kul po i. K wan mɔ n yaan bo bu fid g tien yal nba g ŋɔn u pamann n nyan.

G Gulnbad bie tien balg g pugŋ. L bo sua ban saa jaanm nyan, Gulnbad bo g tug u lol, l bo tie lokpel nne i k u die g tug u tied. U bo jie fai yen wan gad yenn niib n ninŋ, mandg nigbenŋa n bu

tigl naan buol yen lopaana. U bo gad yen u pipebl i.

Jaanm gbenn g Gulnbad fiil g tug Cabl yen u paab, g te k u kunkuanyuag tug tied nba k u bo kan fid g tug l kul nyan g maan u pipebl po k b kun ngaag g bie daan tien jaanliem. Ban tien jaanm nba ngaag nuan, Cabl dii, u dii nyan u bu pud nyan i. G njman nand g nyina tan gbid. Daam kukua i k u bo g nyuu, g dugn Gulnbad bo maad g kalaatubig g nyu daam.

Gulnbad Yal-b-kua nga k l tien daa njanlile yo, k u yiin u ngaapuo g maad'o g Yendu n yaan njanm'o njanmu nba g tug bipuobg ne g tan kuan'o b nui n ninj k u don u sann nand ne, k b bu tien be i g njn k b tien njanm i? K u ngaapuo maad k u yaa maalm n ninj g Cabl n yaan daa tie puosipaan k u yul sonm ne, k u bo gii tod'o k u njanm g kua kalaatu g pugn, k u mali k lann n bo bu njanm gii mɔg nyuad. G Yendu yen g tie'b big nba k u yul sonm nyan Cabl nyan. G sua g ban Cabl sal n tol naan. G sua bie g ban u danm g bu tug'o g lebd yen'o wan daan nyie naan Togo g baal Gaana ne. K l g kua u gii tod'o k u te nil, k u tan bu fiil u kua i g lebd wan daan nyie naan u danm po. G Yendu mɔno pal bu manj g dugn ban tod'o k u nyie cicagm nba ninj. G Gulnbad tien u ngaapuo balg yen wan la maalnjann nba.

Lann i g maad u ŋaapuo g ligli be k u bilg g guund u bid. Ama k u bu fid g tug l ligli n ninŋ g te Cabl wan gad Kalaatubicieni kalaatu nba k b yi Yunifersite nyan. K ama u daa bu bual g bann l pann n bu fill nand yo g lie u bu fid bii u kan fid i.

Lann i k l fann k u sun g yiin Cabl miɛda n ninŋ yend g bual'o Cabl n bu fid g kua kalaatu nba lan tod'o wonn po. K u biɛ bo bua wan ŋɔn'o l kalaatu kuanu pann mɔ g diid g lie u bu fid bii u kan fid i.

K l miɛdl kon baal g maad g Cabl yul sonm. K l g mɔg kalaatubuolu nba k u bu kua g gbal. G nyaan k l kul yen nya big mɔno n bua wan te yal nba wonn po i. K u gii bua wan tod Cabl yen mɔni, k wan bual'o wano mɔno n bua yal nba. G Gulnbad maad k u daa g suol g mubn, k lann n te k u bo g bua wan liid g te'og mɔsumann. K u gii bual kalaatu kuanu pann g sua k l cie u paalu, g Cabl ji baa mali k u daan bua wan bign'o g diid i. K lann n te k u mali munle-le. G miɛdl maad k wan daa jie. K u gii bua wan cab wano miɛdl mɔb, k u ban wan bu tien nand g bual Cabl k l kan baal yen siɛl yaa maam. G Gulnbad cab miɛdl mɔb k wan pag yen Cabl.

Miɛdl bo pag pag yen Gulnbad yen u ŋaapuo g tan fiil g cab k u kun yo g Gulnbad sun k b yiin

Cabl k u nyie dieog n g baal g gbaan g bu fuond miɛdl. G Gulnbad bual'o k u g gbad k u miɛdl baal yaa aa k u g tua k wan nya g fuond'o oo? Cabl g jiin siel g dugn, b bo tuod g maad'o g njaagdaan gii mɔg saan k b g yiin'o i kaa k wan daa nya k u bu fuond saan. L po n bo te k u bo g nyie. Ama wan bo g bua k wan kpag Gulnbad nyan, k u suol u kua g g jiin siel. G Yal-b-kua maad'o k wan tug saan g cien'o cincann.

Cabl n yaan ji ciend u miɛdl nyan, g miɛdl bual'o, k wan yaan daan dii kalaatu buol g gaal liig ne k u ji baa suun be i? G Cabl maad k u baa suun wan yaan daan tu l tuod g suun yal nba yaa. K u baa tod u naa k b saa daag g daa bona g go g kuad. G miɛdl maad, g be po i k b yen daan kuan'o kalaatu i? G Cabl mɔ guan g jiin'o k b daan yed k wan la ninfanm g pugn i. K wan yaan la ninfanm nba dagd'o. K u bo g ban g mali k u tan bu kua kalaatu, g Yendu yen u baa Gulnbad i kaa, k wano bo kan ban g dɔnn kalaatu dieog n.

Lann i g miɛdl bie guan g bual'o, k u baa bo gii cab'o mɔb k wan kua kalaatu g pugn i, k u bo bu kua kalaatu buollanu i? G Cabl maad, k wano g ban g mali l maalm kaa yo g bual u baa. K u gii tug l maalm g kuan u yul n ninj l tie nyan u g tien njanm nyan i. G nil ji bu njanm'a yaa njanmu ne kul njan bie yed k l kul ne daa g dagd'a, g bie kand gii

mali k wan cie l buol ii? G Yendu mɔno ban k lann g tie maaljanm kaa. K u gii tug l yaa maalm g tien u yul n ninj k u biil Yendu i, k u g biil u kua kaa. G Yendu kan di sugl u po. Miɛdl gbaa yal nba kul, Cabl g maad siel. Cabl tan miɛl miɛdl k wan ɲaa k wan guan g lebd g kua ɲaag i. K u gii nyind g sie yen miɛdl, g niib tan baa mali munlele l po. Miɛdl daa g fid g jiin'o mɔno k u tug u kol g tie'og, g maad k wan miɛl sugl u po, k u g tien ninkuam kaa, k u bua n kua g tien jied. Lann i g ɲaa miɛdl l buol g san g kua ɲaag n. G Miɛdl ji nyind g sie l buol. U g ban wan bu tien nand. Wan lebd g maad Gulnbad k u g fid g bann Cabl n bua yal nba aa, wan gii kun ii? K u sie sie g tan paan g kun.

Miɛdl kun k l tien daa nle yo, k u gad g la Gulnbad u sitɔug n ninj, banm banle buol, g dugn dugn'o wan daan bual Cabl buali kalaatu po k u jiin'o yal nba. L tenn waam nne yen bad ɲ jiin ninsiid miɛdl nunj n ninj. Lann i g fiil g lind sitɔug puol po g daan wuon g buud waam, g fiɛl fiɛl ninsiid g guan miɛdl buol, g maad'o k u gbad. K u bu diid wan bu tien nand.

L daal nyiɛɔg Gulnbad Yal-b-kua yen u ɲaapuɔ g guan. B l dua g maad Cabl maam i g koli tan mɔ. Yaalidug bo suol'b boncienn yen Yendu n tien ciila nba g tan tug bimɔnj ne g tien

b nui n ninḡ. Banm banle kul bo sun g man ne Cabl tie b bimadg i. G Yendu maam paa. K lan ji l tie yal nba kul, k ban bu fid g tien yal nba tie k ban tod Cabl k wan tien Yendu n bo tag'o g bua k wan te yua nba i. K b joi, k l won gii fann Gulnbad n gad g la miēda kul cien g maad'o k u bua ban tod'o k wan bann wan bu tien nand g tod u bipuo Cabl k wan kua kalaatu g gad fagm g pugm i.

L kon fann g Gulnbad tug u kpaagl nba bo ḡanm g ḡbiē Jilnd bituudm k u cien'o Tanmal kalaatuciēḡḡ miēda kul cien buol. B daa baal g la kadadienn i g maad'o k b bo bua ban la b canbaa i. Kadadienn n bo g ban'm nyan, u bo g ḡanm g gaal'b. U bo gaal b fuondi yen u g gaal kul tie yenm i. G bual Gulnbad yen u yegnu, k b bua maad canbaa be i? K l buali cḡg Gulnbad ḡbanu. U g ban wan bu jiin yal nba.

Lann i g cil g maad, k u mḡg kalaatubig nne... kadadienn g ḡaa k u maad g ḡbenn mḡno, g maad g miēda cien g be l po kaa. K b gii bua n maad kalaatubid po ban bual wano nba gaal'b nyan. K l gii tie k b kpaan kog i yaa ææ k ban daa jaad b kua, g yiēl ji g be. G pugm g maad, k l tien nnyan i g bibaa-nba tu g nyuan b bid kalaatu n ninḡ, g binn daan gii kpe g big g dii, g miēda bel'o bibaa-nba n ji bann ban bu kua sḡni nba g la kinkaanu g te b big. G boncienn biē g kpaan k b big n guan g

kal dieog nba ninj k u daan be g g dii kaa, k b ji tu kpaan k b big n lie dieog g gad liig i. G dinne k u ji tan gbal g gaan ligli i bibaa-nba buol. K wano mɔno ban k l g njan, g gobna g tuo l po, g nyaan k b yen gii g tien nyan i kaa bid boncienn kan la kinkaanu dinne.

U maad maad g gbenn yo, g bual Gulnbad yen u yegnu k b nyie le i, k b suun be i? G Gulnbad maad k wano tie kpinkpendl i, k u yegnu mɔ tie lola fiida. G kalaatu kadadienn guan g maad, k l paa nuan g nyaan k l kan gbal jagl. G bual Gulnbad k u mɔg bid banjaa i g kpaan kog i? Gulnbad g ban wan bu jiin yal nba g dugn u bo g gad g kpaan kog kaa.

G kadadienn pel g bual g led, k u g ban u bid nba bua kog n ja nand ii? G bijabi bii bipuobi i? G Gulnbad maad g bipuobg i. G kadadienn bie bual k l big mɔg bina njannaa i? G Gulnbad yed k u ji saa bina piig yen njanniin n nyan. G kadadienn maad g Yendu gii bua k l bu tuo. K l tien nle i k u baad g g die'ɔg u? K l maam njanm g cɔg Gulnbad gbanu, k u ji sie g yaa mɔb.

Sola! Miɛda kul cien mɔ pund n nyan g la Gulnbad g bann'o. G baal g tibn, g taan nuujad tinle g fuond'o g canbaa, g yensonml aa! G Gulnbad gaal fuondi, g pugng g maad, k wano yen

disiel daal balg a. G miɛda kul cien mɔ guan g nmiɛn'ɔ, g balg tie u yal i. K u yaa po i g Tanmal sann duo.

Lann i g tug'o k b kua wano miɛda kul cien n kaal dieog nba ninj g suun tuonn nyan ninj. G miɛda kul cien tie Yal-b-kua kinkaanu g guan g njanm g fuond fuond'o g bual k l man ii? G Gulnbad fuod g jiin, g dugn dugn'o yal nba po baal yen'o.

G miɛda kul cien maad g taanm baa g dagd yen tandaan jagd youg. K wano mɔno ji daa bo kpaan wan bu tien nand g la wano Gulnbad yen u bipuo i. G bad yam pud, k u bual k l man ii, k u bo bua n kpaan'o, wano yen u big kul ii? Gulnbad bo mali k l g kua b daan kpiɛd i g yed k u big dii kɔnkuul k u yen g dii. U bo mali bona boncienn l youg, g binniinu gbaa g suol'o.

Miɛda kul cien bo la k u nunj po gbaa g biil, k u bann g Gulnbad mali bonbiiug u. Lann i g maad bad k wan daa jie, g laabamann i. G kalaatubid miiniidl yen yab nba nyuan kalaatu tuonn n ninj daan kal g diid ban bu tien nand g tod kalaatubid nba k b yula njanm g sonm. K b daan tan suol g gobna bu pa b kalaatu po ban gad liig. G Cabl n yaan daan dii g gaal b kul liig nyan k u yaa sann n cind g nyiɛ. G gobna bu

gaal'o g pa u po wan kua ligcɔdl yen kpinkpeonŋ kalaatu. K l kalaatu tie bina ŋanmu i, k u gii kua g gbenn u bu nya ligcɔdl yen kpinkpeonŋ dɔkter i. G Cabl jied, u tieliɛkad, u kalaatu tiɛd yen yal nba l tie u payienu kul ji tie gobna pann i. K wano bibaa kan nyan baa kuug Cabl kalaatu po.

B yed g pamancienn yeg yen bubuul, g nyaan Gulnbad g fid g jiin baa ninsiid. U pal bo manŋ g pend k u ji kal g kan fid g yaad baa mɔb g jiin siɛl. U ji bo l kal g yaa mɔb i, g tan kpaɔ u kua nuunyieɔg k wan diid g liɛ u danŋ bii yen mɔni i. U kpaɔ u kua nuunyal k l yegd'o k u jugnd, g pag pag yul, g fiil g mali k wan gbaan g tien miɛda kul ciɛn balg. G tiɛd k u tie bad i, g bad g gbaand u badlua nunŋ n, g bual nifan. Lann i g suol miɛda kul ciɛn nuu g mubn yen paalu, g tien balg, g tien balg, g tien balg g led led. Miɛda kul ciɛn tuonsundieog n ninŋ n bo l sɔnŋ nand kul, g nyaan tuntonjena bo pud Gulnbad yutunn po i g ji kal kal kal. L youg u g bad ŋund ninfiencabl g fiɛl u tuntonjena g guan g kal.

G miɛda kul ciɛn yiin kadadienn, k u kua g jegl g tuntonjena pud u po sab sab sab. U bo mali g Gulnbad kuad'o u canbaa nunŋ n i. Wan kua yaa youg k u baa g gbaan g tug yutunn g pii yen tinŋ g ji buud g fabn g maad: «Canbaa, n ban k n biid yabd g pend. N g dagd yen k n sun tuonn ne

buol ne g pug n baa diyenn. Ama, n balm'a k a di sugl n po i, n mɔg puo yen bid banmu. A gii bel'n dinne, b kul bu kua muɔg u. Sugl, n miɛd'a sugl.»

Miɛda kul cien bo g ban yal nba po bo te g kadadienn maad l kul ne. Lann i g maad kadadienn, k u bo bua n sun'o k wan daa daam g cand saan i. K wan gad g guan o, g yaa maam nba be kul ban maad. G kadadienn gaal ligli g nyie g gad g daa daam g guan g tie u canbaa yen saanm. G miɛda kul cien bual'o k u tie'b daam g g tie'b bonnyunkal, k b ji bu kob daam b nui n ninj i g nyu ii? Jiwaani n bo kua'ɔg g pend k u sunn.

Lann i g kadadienn bie guan yen bonnyunkal nba k b die g nyu kpalba n ninj daam. U kua yaa youg g tien jeg jeg jeg g tuon tiebl k l kul ηmad g te tinj n sanyiin g mud mud. K u tibn k wan gann bonmudma g yutunn tuon tiebl g gbaa g nud g duo bonkunkonn ne nyan kpigl jenn nyan, ama g sɔm g nyie. U g tuo k l bend'o. U bo gbaan tinj n ninj i g dogl bonmudma kul. Miɛda kul cien n la k u gbanu jeg nyan, k u fiil g gad lɔdg n ninj g bu tug ŋaanu g te'og wan tign. Kadadienn nuan mali k u bua n pua'ɔg u, g kua tiebl yagma n ninj, g te kud kud g yugd tiebl yen daam kpalba, k l mɔ te poyiin. G yaalidug suol miɛda kul cien yen kadadienn ne bontitied. Lann i g tug tangalafu g

yiin u mə yaa canbaa g maad'o k l naan u kadadienn yul n lebd o. K wan sun dogda-nba yen sijenm k ban baal g tug'o g gad yen'o dogda. L g tien miid piintaa mōno g sijenm nba juni muu nyan baal yen b lol k u pieb naatunn ꝑꝑꝑꝑ, ꝑꝑꝑꝑ. B baal g kadadienn yie k u kan kua lol n ninḡ, k u g waad kaa, g jiwaani n kua'ḡg, k ban ḡaa k wan maad'b yal nba tien. Sua g cenḡ u maam. Sijenm banmu suol jua k u fegn fegn k b lid g lol'o g tien'o lol n ninḡ g yaad yen'o.

Gulnbad yen u kpaagl n bo nyie ḡaag siḡaaḡg n g saa Tanmal kalaatuciēḡḡ buol nyan, b bo g maad sua ban saa naan. B bo maad k b daa bua n nya waam g guan i. Gulnbad ḡaapuo kukua n bo ban u sal n sonm yal nba po. Ban tan guan g kpen daajuag yen laabamann nba bo tie nyan ḡaag n ninḡ nil kul tḡ tie tie g dii ligli miiliēḡḡ nyan i. L daal Gulnbad Yal-b-kua bo g kp̄ii siel g bu tien jaanm, ama ḡaag n ninḡ pamann nba k l laabamann bo baal yenn bo cie k b dii jaanm jied. Puob yen bid bo bugn yani i g yiin g jeln g yḡgsiiug tan siid. Naasenm nba bo nyie dingbanfana g baal g be bad ḡaag g mə kpaan b yul, yen b kunkuanyuag-nba ḡaadi naasenm nba bo baad k b kaal daajuag g pag kul bo taan l daal g pag g laa pamanlaad i g yḡgsiiug tan siid k b kul yad g kun.

L fann k l laabaal yad b kunkuann n ninḡ kul. G Gulnbad kpaaga, u kunkuanyuag-nba, u bantieb yen u kpinkpendlieb kul tigl g tan gbie ḡaag. B kul bo baal k ban fuond Gulnbad g tien'ò balg yen wan ḡanm g kub u bipuo k u tan kua kalaatu g dii g saa Akra g daan bu kua kalaatuciεḡḡ.

L bo tien nle i k b kul ne gbad l laabaal g biε taan lieb siḡaapinpan bad ḡaag i? Gulnbad kpaaga n ninḡ yend n bo sun g yiin b kul g bad kal g g ban. B bo yi l kpaagl Tien-ḡanm i. U mɔ bo tie Togo jua i.

U bo nyiε Daapaacḡḡ diem n ninḡ dobig nne ninḡ i k b yi l doug Naalolg. U naa yen u baa kul bo tuod g kpe g ḡaa'ɔg. U bo la fala boncienn u bim n ninḡ. U mɔ bo tuln tuln g daan gad Gaana g baal Tanmal, g bual muaba-nba po, k b tug'ò g gad yen'ò Gulnbad ḡaag. L youg nyan l sua g Gulnbad daa g mɔg ḡalman k l yab, ama k u nuu n ninḡ, l bo g luol. U biε bo mɔg pasiεdug yen yanfuom mɔ boncienn. Gulnbad n bo tod'ò k u la tuonn nigbenḡl nne ḡaag. L nigbenḡl bo tie kusaadjua i g be Akra ama g yen mɔg kpaab Tanmal nyan, g ji bo kpaan nimɔn k wan guun'ò u kpaab. Gulnbad bo tug Tien-ḡanm g tien l

kusaadjua nuu n ninᅇ i k u ji ko u kpaab g guu yen bonkobd kul. Kusaadjua ᅇano pal bo tan manᅇ Tien-ᅇanm po, k u pa'ᅇg u bina ntaa tuonn ligli g biᅇ tod'o k u mᅇ daa u yul po kpaab.

Tien-ᅇanm mᅇ bo kpaan Muaba-nba yen Fal-fala, yen muadnaasenm i g tien wano mᅇno kpaab n ninᅇ. L g tien bina piig mᅇno yen wan mᅇgd. Ama yen l kul u bo l guu Kusaadjua kpaab yen u guonn i, g gaan paaᅇg l po g pugd u yul po mᅇgm po.

U bo g sunn Gulnbad n bo tien'o ᅇanm nba g tug'o g yen daa g ᅇanm g ban u tᅇgu, g tien'o nigbenᅇl nuu n ninᅇ. Wano yen Gulnbad n bo be yen lieb k l wai g sua kul ji ᅇanm g ban u lua g dug u po nyan, lann n bo te g Gulnbad ji bo tug'o g tien'o u kpaagl nba k u bo ᅇanm g dug u po.

Tien-ᅇanm bo kpaan wan bu tien nand g ᅇᅇn Gulnbad k u tien u ᅇanm po. Ama Gulnbad bo g ban g bual k wan tien siᅇl u po. Tien-ᅇanm n gbad g Gulnbad bipuo dii kalaatu g saa Akra nyan, k u yiin Gulnbad dᅇnn-nba yen u kunkuanyuag-nba kul g taan'm. B kul n tigl g gbenn yaa youg k u fiil g gaal maam g maad:

“N ninᅇanm yen n niipuob, yen sonml man. N tiend i kul balg yen yin gaal n yiinu k t kul taan lieb t canbaa ᅇaag ne. Min be Tanmal ne bina

piinle yen ŋanluob n nyan, n g ban g la g niib tigl nne k l g tie g kuum kpe, lann i kaa g Gobna yiin tintaanu g bu maad tilkpienu po. Ama dinne, i kul tigl k l tie k t bua n taan g tien Yendu balg yen wan ŋɔn k u kon tie mɔnkundaan. Yen mɔni, bad n kal nyan, u g ban i baalu po. Min n yiin tintaanu ne. N daa bu cind g miel canbaa sugl yen min yaan yiin tintaanu u ŋaapo k u yen kal g g ban l po. Canbaa, di sugl n po. N pal manŋ g pend nyan a ŋaag ne niib kul yen kunkuanyuag-nba kul n won gbad laabamann nba k a won kpen yenn k b pala manŋ nand nyan.

Tinm nba taan ne kul, yua nba g Gulnbad g ŋanm'ɔ siel n don nuu. N la g baa sua g don nuu. Lann n ŋɔnŋ k t kul ne duo nyuad g dugn a pasiedug yen a ninbajienu po. Sua g ban g tie'a siel k l tie bonmɔnn k wan ŋɔn k u tien ŋanm nba k a tien t kul po. Dinne nba ne, a ŋanm ŋann sɔnu n ninŋ i g Yendu mɔ ŋanm'a g luod sɔnu g big nba bo g mal a ŋaapo tan te a big, k a kub'ɔ k l cie a bimadg g dugn a buaciem po, k l buam tod'ɔ k u kua kalaatu g tan dii kɔnkuul nba g nigbenŋa bid yen gbanbanda bid luol. T mɔ ji bu tien bɛ i dinne g ŋɔn a big k t mɔ bua'ɔg u? U nyan'ti juand n, g te k t yula yaad, g niib cil g cɔln'ti daag n ninŋ yen sɔnu po, g dugn Cabl kalaatu kɔnkuul dinu ne po.

Tintaann ne g tie k tin tod fin bad kaa, l bual k tin tod big ne i. Gobna nba g ban' o palb mɔno yed k u bu tod' o, k tinm nba ji duo nyuad u po k u yen daa g kua kalaatu g gbenn mɔno, t mɔ yaa todl ji tie bɛ i? N yiin tintaanu ne g bua k tin mali l po i. N ban k n bo gii maad bad, u kan tuo k l tintaanu n tien. N biɛ gii yed k n yiin l tintaanu n ɲaapo mɔ, l kan gii man gbadu. Tinm nba tigl ne, cegdkab be, g nipaawɔŋ be, jab yen puob, naasenm yen sipaanm. I gii diid g sua k n yiinu ne g mɔg niimn, yin maad g daa jie siel, t be t ɲmiel n i.”

Wan maad g gbenn yaa youg g niib kul tien nuupuoug lob lob lob. Yua nba gaal maam kul wan pag Tien-ɲanm, k u baa kon bo la i g pul' o l sann. G bad kpaagyend fiil g maad k ban bil ligli. K banm nba tie doug n yudanm yen kpinkpendgbenna, yen kalaacigbenna n mɔnd g yua kul n bil baa tudl tudl k ban tod Cabl, k u gii gad Akra kalaatu siel n daa ban g pɔd' o.

G lua fiil g maad g tudl waag o. K b ban Akra binbem n tie nand ii? K b ji gag yen lieb yua kul n bu nyan ligli nand k lan tod. G Tien-ɲanm tan fiil g biɛ gaal maam, g maad k u bo g yiin tintaanu k ban gii gag ligli po kaa. G yua nba mɔg nand wan te. K ban l be ne o, g Gulnbad ban g tod sua g

nifan bann wan tod'o g tie'og yal nba aa? K b kul taan k u mɔg mɔni.

B taan taan ligli l youg k l fiil tuda kobiinniin yen siel. G lieb yed k b bu kun yo g guan, g dugn ban bo baad nyan, b bo g bobn g bu nyan ligli. Lann i g kun g guan. L daal, niib l kua Gulnbad ŋaag yen pugdi i g yendu tan baa. Sieb baad yen ligli, g lieb baad yen ban mɔg yal nba. B ne die koli, b ne kpaani, b ne bance, b ne nuga, b ne tɔa, b ne tiina, b ne dii, b ne cincenlugda, b ne puosipaantied, sieb baal yen ŋuabi, g lieb baal yen pei. Yua nba g baal yen todl, l g be. Baa yab nba bo g ban Cabl mɔno bo baal yen paab g dugn u baa Gulnbad Yal-b-kua po.

Daa ŋantaa daal g Gulnbad yie g niib n ji daa baad yen siel. K ban baal yen yal nba mɔno, k u g ban wan bu tien nand g dugn gobna daan maad g Cabl Kalaatu pann kul tie wano gobna yal i. G gobna gii gbad k b taand ligli k l tie Cabl kalaatu po, k l bu baal yen macieɔŋɔ u. K l baa tie nyan wano bibaa n tie l kul nyan. K wan yaan bie tie Gulma-nba yen Muaba-nba bad nyan, k l tan baa tie nyan u niind u niib i g gaan ligli u bid kalaatu po, k l yen g tie nnyan. U bo yiin u kpaaga k b kal g cɔd ligli kul g la miilieɔŋɔ ŋanlile yen tuda kobg yen piinluob yen kuumuunna. Koli mɔ bo tie piinmu yen banniin, g kpaani tie piinle yen

bantaa, g ɲuabi tie piig yen banle g pei mɔ tie banluob. Dii, kpabda, tɔa, juoni yen tiina mɔ ɲuun kpalpiɛd piintaa yen ɲanlile. G bad maad, g jied kul mɔg lan di nand k l mɔg cɔlunɲ u. K lan yaan tie gobna yanjagl i k u big ń gad Akra nyan, k u kan gaal l jied g gbaa g di nnyan. Lann i g te k u kadadienn tug Cabl k b gad banɲ g daan bil l ligli kul l buol Cabl sann po.

G guan k u te k b tug ban ɲuun yal nba kpalpiɛd n ninɲ nyan g tie kpinkpenda k ban kuad g pugɲ ligli nba k b gad g bil banɲ nyan po. L sua g naasen nne mɔ daa baal saand g kpaan wan bu tien nand g la tuonn. G Gulɲbad te k b tug koli yen kpaani yen ɲuabi yen pei nba k b baal baal yenn nyan, g tie'og k wan gii guon. G miɛl Tien-ɲanm k wan la yiɛl u kpaab n ninɲ g te naasensaan ɲano k wan mɔ ń cil gii dabnd k ban diid lan bu juod nand.

Tiɛliɛkad yen cincena kua i k b bo tug g tie Cabl, k u mɔ bɔgd yen bad bid. L sua k wano bad mɔno bo tuod g bobn ligli nba k u bu tug g daa tiɛpaand g te Cabl k u gii saa Akra wan gii mɔg tiɛd nba k u daan baa liɛ g daa bual sua baa siɛl po.

Wan la k b tie u bipuo tiɛd nba k l yabd g pend nyan, k u mali mali g tan maad k l g bual k

wan biε daa tied g pugn Cabl. K lann mɔno tan bu fid g baal yen tudm u po, g tɔgn'o sɔnu nba g njan. Lann i g tug tuda piinle g njon Cabl, g maad'o k wan bobn ligli nba g bu daa tied g te'og n nyan, k ama k u kan te'og l ligli g dugn wan mɔg tied nba ne bu dagd'o o. G nyaan k wan yaan daan bil l ligli k l tie u tied po nyan, k l baa l tie u tied po i. Lann i g te k b gad g bil l ligli mɔ banj n ninj Cabl sann po g pugn ban daan bil yal nba nyan po. L tien nyan daa piig nyan g gobna sun k b maad Gulnbad g youg pund yen u bipuo n ji gad Akra kalaatu u. G wontum lol daan bu baal g tug'o. L wontum po, k l kon tien nnyan. G Cabl fiil g gad Akra kalaatu.

Mayula ŋanmu po: Cabl gad Akra kpinkpeonŋ yen ligcɔdl kalaatu.

Cabl gad g kua kpinkpeonŋ yen ligcɔdl kalaatu i Akra kalaatucieɔnŋ nba k b yi Yunifersite nyan. Gaana gobna bo maa ŋai nle i l kalaatu po. Ŋayenŋ bo tie kalaatubicieni n baa be naan buol g ŋalieg tie ban baa kua kalaatu naan buol. L ŋai nle bo g fag yen liel. Kalaatubicieni ŋaag mɔ bo bɔgd kaani yinle i, bipuobi kuann bo be, g bijabi yal mɔ be l kua.

Bipuobi bo g yab. B bo tie piinle kua i. L bipuobi piinle n ninŋ piig yen banmu bo nyie dingbanfana i g baal Gaana. Sieb bo nyie Naajilie, g lieb nyie Siera Leyɔnn, g lieb nyie Liberiya. Gaana yab bo tie banmu i. Banm banmu nba bo nyie Gaana nyan, Cabl kukua n bo nyie Tanmal g baal. Banna nba tenn, banle bo tie Akra yab i g banle mɔ nyie Kumaad.

Bijabi nuan bo g luol piinniin. Sieb bo nyie Keniya, g lieb nyie Uganda, g lieb mɔ nyie Tansaani yen Sinbabuwe. Gaana mɔno yab mɔ bo g luol. B kul bo taan g tie kalaatubicieni kobg i. Miɛda nba bo kuand'b l kalaatu bo tie piig yen banle i. B ninŋ bantaa n bo tie nibɔna, yab tenn kul bo tie bitɔa i.

Cabl-nba n bo be naan nyan, b bo taan'm banle-le i dieog. Wano Cabl yen Naajilie sipaan nne n bo taa dieog. L sipaan bo tie Ibo buolu i k b yi'ug Agoli. Cabl yul bo man boncienn k wano yen l big taa dieog. L big bo g bua maam. U danm bo tie mɔgda i, g nyaan u bontitied n ninɔ sua bo kan fid g bann k u nyie mɔgda ɲaag. U baa bo tie suud i, k u sann duo Naajilie doug kul n ninɔ, k u naa mɔ tie kpinkpendgbenɲl. U naa bo saa bitɔa doug mɔno g daa tied g kpend g kuad kpinkpendlieb Naajilie yen Gaana yen Ganbi. Agoli naatug n ninɔ b bo tie bid bantaa kua i. U yual-nba kul bo kua kalaatu g gad fagm. B kul bo be bitɔa doug u, g suun tuonn l po. Wano kukua n bo tenn g daa kua kalaatu. U mɔ bo dii kɔnkuul nba g Cabl mɔ bo dii nyan i. L po n te k u bo baal Akra l kalaatu. U yul bo sonm hal boncienn. U danm nuu n ninɔ n bo mɔg nyan, b bo g luol g gad yen'o bitɔa doug nyan taal munluob nyan, k u nunɔ ɲ fand.

Cabl nuan bo g ban siel docienɔ binbem po. Jetienu mɔno bo tie tuonn i u po. G dugn muu nba k b bo sonɔ yen maasinn nyan, u bo g ban g la, nyunwulu mɔno, u bo g ban ban tu ɲmagd naan buol nyuntonm ɲ nya, g ɲmagd naan nyunsonɲa ɲ nya. Ban die yal nba g tie jied kul bo tie bonsaann i Cabl po. Wan cind g kua dieog n

yaa daal, u g guan. U maalm kul bo tie wan bu tien nand g tien jied g di, wan bu tien nand g wul, mɔtignu mɔno bo tie u po maalm i, g dugn ɲaanu bo g be, b bo tignd muad yen maasinn i. Wan duan k l fann k Agoli la g Cabl g ban siel nyan, k u tien suoo suoo g ɲɔn'o bona kul n sonm nand. Lann i g Cabl fuod g jiin.

Laad cincinn nuan, nyieɔg kul Cabl yen Agoli bo tu pag i hal yɔgsiiug ń tan siid. G sua kul dugn u lua u binbem n tie yal nba. Nnyan i k b suol dɔnnu g ji taan g be nyan nil yen u naataanu nyan. L bo cie nnyan mɔno, l bo tie nyan b bo taan g ɲub'b hal b bim n nyan i. Manu nba bo be b ninɲ bo cie nil yen u naabig manu mɔno.

Kpinkpeonɲ yen ligcɔdl kalaatu bo g tie faala bonn kaa. Kalaatubicieni nba bo baal l kalaatu mɔ yaa yula bo sonm g dugn b kul bo dii kɔnkuul nba g Cabl bo dii nyan i g baal. Yab nba bo kuand'b l kalaatu mɔ lann n nyan. B kul bo kua kalaatu bitɔa doug g gbenn g kuan kalaatubicieni l po k l wai yo, k b baal yen'm Akra k ban kuan Cabl-nba l kalaatu. Kalaatu ɲann bo l paa i canyiin. Kalaatubicienyeni bo mɔg miɛda nba baad g tod'b ɲaag yaa daal nba k b g mɔg kalaatu. L kalaatubicieni baa-nba n bo tie mɔgda nyan, lann n te k b bo kpaan miɛda nba mɔ kua l kalaatu g gbenn nyan, g pa'b k ban gii baad g

tien b bid cegli, g tod'b k ban njanm g suol ban banj yal nba kalaatu buol, g binn gii kpe k b tien binn konkuul ban gii lii lieb kul. Agoli baa mo bo bua wan kpaan miēda g tod u big, ama big po n bo yie, k u baa n nja k wan bign g diid o. K b gii kua kalaatu g daan pund binn bogdm k u diid g sua k l paa u po, k u bu miel todl.

Cabl nuan bo kan tuo g mali k wan miel Gulnbad l yaa todl buolu. Cilg youg, bona boncienn bo be g Cabl g njanm g gbiε. L g tie k u yul bo g sonm kaa, wan bo pugd naan buol nyan, u bo kan fid gii ban bonyena. Jilnd bituum mono, lanbona boncienn bo be k u g gbiε l niimn. L po n te k ban bo tien kalaatu njmaali yintaa g bign bignn nba, Cabl bo g dii. Banm kalaatubicieni kobg n ninj, u bo liid piig yen bantaa kua i.

Cabl yam bo g dua baa waam nne. U bo kan fid g dien kadaaog g maad Gulnbad lan paa u po nand, g dugn b bo kan fid g gbad niimn ninj. U bo jie k b kul bu mali k wan gad Akra nyan k u tug u yul g kuan bibiedm n ninj i. L g tie faaog kaa, sipaanm boncienn bo tu gad Akra g daan kpi yul yen ligdanm, lann i kaa wuwaaciend yen naasenm i. Boncienn bo tu tan juod g kua cunconm n ninj i kalaatu n te fam.

Cabl bo tu mali mali l kul ne po, u yam n̄
n̄mad i. Ban bo be Akra, n̄maali yintaa, u bo g
ban g nyie nyieɔg g gad siel. U bo g mɔg
naasendɔnn lann i kaa sipaandɔnn nba k b yegd g
saa dinyubuol lann i kaa jedibuol. Wano yen u
dɔnn Agoli n bo tund. B gii nyie doug n ninɲ k l g
tie k ban gad g daa kpind yen bonyoli-yoli nba
nyuan b binbem po i kaa, b bo g saa siel.

Agoli nuan bo dii n̄maali yintaa kalaatu
bignn. Niib banle kukua n bo lii'ug. G nyaan yen l
kul, u mɔ yaa pal yen bo g man. G dugn, wan bo
kua kalaatu, sua bo g ban g liid'o bignn n ninɲ.
Niib banle nba bo liid nyan bo nyie Keniya i. Agoli
bo wuon g buud hal boncienn. Ama u bo g bua g
Cabl bann k u buud, g dugn wano nuan bo dii yo,
g yed k l yiel'o yen wan g gaal b kul liig, g yua nba
ji g dii bu maad be. Big naa gad bɔnɲ k u buud, u
g laa kpiebg kaa aa? L g tie Agoli n bo g gaal liig
kua kaa bo yiel'o, u dɔnn Cabl n yaan bo g dii
nyan, lann mɔno bo yiel'o hal boncienn. Cabl yen
Agoli kul bo tien daa n̄antaa, sua g pag yen lua.
B kul bo kal yen pabɔnn i.

L laad n pend, k b guan g cil tuonn. Nyieɔg,
guam ji g be. B ji bo tu banɲ banɲ saa yen
siɲafaani † ban tan duan waam. K banm banle kul
tan donn g naan b yiel i. L sua g naasenm nne bo
dag'b k b yie. L naasenm n ninɲ banle bo tie

Gaana nyan yab i, g bantaa tie Naajilie yab. B kul bo taan g kua Kpinkpeonj yen ligcɔdl kalaatu i. L naasenm banmu bo taan g yegd i. Yend gii dag sipaan g gbal, lua mɔ́ n bignn l sipaan. L po n te k b bo ban k banm banmu kul dag Cabl yen Agoli g gbal.

L ji bo tie fai i b po, k b ji kpaan ban bu tien nand g nyan l fai. B bo dien kadabid nne i g lu lu kalaatudieog n, k l kadabid po k b maad g Cabl yen Agoli mɔ́g naasendɔnn-nba k b baad nyieɔg g dua yen'm. G maad g sibd daal yen laad daal b tu fa k b saa daag, g gad gii be b naasendɔnn-nba buol i. G maad mɔ́no k banm banle kul pil i. Cabl yen Agoli n bo donn boncienn nyan, k b kalaatubicienlei ji mali g yen mɔ́ni k b kon l pil i. L laabaal bo yad kalaatu buol kul, g miɛda mɔ́no tan gbad. G miɛda cien yiin Cabl yen Agoli g bual'b. K b maad g faaɔg u, k b g pil. K Agoli maad k wano taan g ban jua mɔ́no, k u daa mɔ́g bina piig yen ŋanluob kua i, k u g ban g nagn jua. G Cabl maad g mɔ́ni, k wano bo kun jua, ama g Yendu bontitied po, k l jua bo san g ŋaa'ɔg k b daa g taan lieb mɔ́no. K u gii maad niib yal nba kul, g sua kan tuo k l tie mɔ́ni, g nyaan g Yendu nuan yen ban k wano yen u sal bo g bann lieb mɔ́no k u sal yaad g ŋaa'ɔg. G pugn g maad k l

jua n bo san g ɲaa'ɔg yen dinne k u g ban g taan yen jafan.

G miɛda cien yie, k b fa i. Lann i g dien kadaaɔg g tie Agoli baa, g dugn miɛda cien bo ban'o g biɛ ban k u gii gbad k u bipuo pil, u bu fid g bu yen kalaatu ɲaag yab. L g tien daa ɲantaa mɔno k Agoli baa nyiɛ Naajiliɛ g baal Akra l maam po. Wan baal yaa daal, k Agoli buud nyan u bu kpe nyan. G dugn, u baa baalu kaa bo ɲanm g yiel'o. Yal nba bo ɲanm g yiel'o bo tie u lieb n bo dien g maad g Cabl n ɲɔn Agoli cunconm sɔnu k u conm conm g tan pil nyan, Agoli baa bo baal g miɛl miɛda cien k ban paad Agoli yen Cabl dieog u. Agoli bo dugn u baa bona n bil nand kul, u baa pal bo g sɔnɲ.

Mɔni u bo tuo u big maam g dugn u bo ban u big po, g nyaan Agoli bo bu fid g la u baa maam n ninɲ g bann k u yam g duan. Miɛda bo nyan yiko k l tie k ban paad Agoli yen Cabl dieog u. Lann i k Agoli maad u baa k wan bu tien nand g tod'o tie k ban gad dogda i. G dogda-nba gii diid'o g sua k u pil, lann i kaa baa k u ban g dua yen jua mɔno, k u baa bu bann l buol i mamɔni yen faaɔg. K Agoli baa yed k wan ɲaa, k u ji bann yen mɔni k u maad mɔni. G big yie. Lann i k b fiil g gad dogda nba

nyuan madug po. B diid g sua yen mɔni Agoli g ban jua. K b bign Cabl mɔ g sua lann n nyan, banm banle kul sua g ban jua kaa yo g bual wan gii pil i.

L buol i k Agoli yen Cabl la papaal g gad g la miɛda cien g dugn'o naasenm nba bo dag'b k b yie nyan n sun yaa tuonn g bua ban biil b sana. G miɛda cien yiin tintaancieɔnɔn yen miɛda kul, g taan gobna tuonsunna nba nyuan kalaatu n ninɔ k b kul kal l maam po. K b kul taan g jiel buud k l tie k ban bel g yaan l naasenm banmu l kalaatu buol i. Lann i k b yiin kalaatubicieni kul g tug l laabaal g maad'b. L daal sua g dii jied. Yua nba bu yaad mɔb g maad maam l g be. Lann i g Cabl tan don nuu g gaal maam g maad g miɛda cien n miɛl sugl b po. K b g ban ban kpaan yal nba. K wano yen Agoli g bua lan gii tie k banm banle ne po i k b bel lieb. G baa banm banmu ne gii nyie kalaatu buol mɔno, g yab nba tenn ji baa nyuan'm kpiɛd kpiɛd nne i. K lann kua kaa mɔno, g nil kul kpiɛd u binbem n. K b daan tien bimɔnm i, g miɛda cien yen gobna tuonsungbenna n di sugl l naasenm po. G yua nba bo baal l tintaanu gobna sann po nyan gaal maam g pag Cabl yen wan maad yanfomaam g bie jie tondanm ne ninbaaɔg g miɛl sugl b po. Lann i g te k banm nigbenna guan g kua miɛda cien tuonsundieog n

g daan kal g joi joi, g guan g maad k b gbad Cabl miɛdi. K b kan bel g yaan kalaatubitondanm ŋanm. G niib kul tien nuupuoug lob lob lob. G Cabl lieb fiil, g boncienn baal g wob g suol'o g tien'o balg yen pasiedug nba k u ŋɔn tondanm po. G miɛda ciɛn cab b kul k b yad.

Cabl yen u dɔnn Agoli n yaan lebd g kua b dieog n l daal, baal g diid, pamancienn yeg yen bubuul. L bo tie nyan danŋbiid i k b danŋ k l fann k b fiil nyan. Banm n laa, banm n buud. L daal pend k b ŋanm g tibn b kadabanŋu n ninŋ. B bign ŋmaali nluob kalaatu bignn k Agoli gaal kalaatubid kul liig. Cabl mɔ n yaan bo liid yab nba n bo yab. Niib piig yen banle kukua n ji bo lii'ug banm kobg n ninŋ.

Binn kpe k b tien binn bignn k Agoli biɛ gaal b kul yaa liig, g Cabl mɔ liid kalaatubid piinwai yen banluob. Kobg n ninŋ bantaa kukua n ji bo lii'ug. Lann i k b cab kalaatubid kul k ban kun g daan fuod, g fuond b danm g guan. L kalaatu bo tie bina ŋanmu kalaatu i. G miɛda ciɛn maad g kalaatubid banmu nba gaal liig nyan nuan bu fid gii be Akra, k b gii bua. K Akra banŋciɛɔŋŋ bual todl. K b gii ban k b g ŋanm g cɔg, k l biɛ tie b buam n ninŋ, k b bu fid g sun l banŋ n ninŋ ŋmaali yinle g la ligli waam g biɛ gaal ninfanm mɔ g pugn. G Cabl yen Agoli maad k wan ŋaa k ban

mali waam g diid. Lann i g fiil g kua b dieog n. G Cabl maad k wano bua. K u gii bu fid g gaal banm banj n ninj g pugn, k l bo bu tod'o boncienn. K Agoli maad u dɔnn Cabl k wano kan fid gii be Akra ne, k u baa ban k b cab kalaatubid o. K u danm kan gbad niimn. K b pag pag g tan suol g Cabl kua n baa be Akra g sun banj n ninj nmaali yinle. Kalaatubid bantaa nba tenn mɔ, yend kukua n bo tuo k u mɔ baa be g suun g dugn, k u doug fag, k u gii kun mɔno k u daan kan fuod. G tuona nba bil njaag g guu'ug cie banj tuonn. K wano n tie u baa bijakpel g mɔg u waali banmu k b kul dug k wan kpen g tod b baa kpaab n ninj. Wano bo nyie Sinbabuwe i g baal Akra l kalaatu po.

B bo cab kalaatubid k Agoli daa kun Naajilie g daan bu fuond u danm g fuod waam. Agoli baa nuan bo ban Cabl g dugn maam n yaan bo tien kalaatu buol k l nyuan Agoli yen Cabl po nyan, u bo baal Akra g la k u bipuo yen Cabl n taa dieog. U bie bo gbad yal nba bo tien kul. Agoli n yaan ji bo kun Naajilie nyan i k u bo dugn u naa yen u baa kul Cabl n tɔgn tɔgn nand g tan baal Akra g kua kpinkpeonj yen ligcɔdl kalaatu.

K Agoli naa maad k u bo sun g Cabl tie u bipuo. K u pal sie boncienn, ama k u g ban wan bu tien nand g tod Cabl k u fala nba k u la k l yen

g wad u pal, yen papaal nba k u mɔg g l kpaan k wan nya cicagm n ninŋ nyan n̄ kon nyan'o jinjanm kul n ninŋ.

K Agoli baa maad k b bid kul yen suun tuona bitɔa doug, g siel yaa ligli payienu g mɔg'b. K Agoli nba daa tenn g kua kalaatu ne kua i kaa. K ban diid wano yen u ŋaapuo mɔgm n ninŋ g bɔgd faal waam g te Cabl. K l gii sua k u kalaatu tan bual ligli nba k u danm g mɔg, g faal nba k b bu te'og nyan bu fid g tod'o waam. K Agoli danm joi joi k l dagd, k b nyan ligli miiliɛnŋ piig g bil g ji kpaan ban bu tien nand g te Cabl l ligli.

Cabl mɔ bo sun tuonn banŋ n ninŋ ŋmaali yinle g la ligli. L bo g tie ligbig kaa. L kul bo taan miiliɛnŋ ŋanna i. Cabl n yaan bo g maan ligbiidu nyan, u bo ŋman g g dii siel l ligli n ninŋ. U bo bil l ligli banŋ i, g maad u kua g dana g ja. K u g ban yal nba baad wonn po. Baa Kalaatu buol ban yaan bo tien'm ligli nba k ban fid gii daa b kadaad yen jied yen tied nyan, u bo g dii baa l bɔgdm. Kadaad ligli kua i k u bo nyan l kul, g nyaan jied yen tied yaa ligli bo tenn g yab. Binn bo kpe k u taan l ligjena kul k l mɔ fiil tuda miiliɛnŋ ŋanle i. U bo tug l ligli g taan yen wan bo sun banŋ g la yal nba i g tug l kul g gad g bil banŋ.

Mayula ŋanluob po: Naayiga pign Gulnbad

Kalaatu guanu ji bo tenn daa ŋanluob i, g Gulnbad kpaagl nne yiin Cabl tangalafu g maad'o g naayiga won baal g pign u baa g janm'o g bie tug yal nba be sitcug n ninŋ g tie bonmɔnn kul o. L sua g Cabl gad g bil ligli banŋ g guan g daa g nyuu nyum mɔno. K l cɔg u gbanu. Lann i k u guan g lebd banŋ k u bu gaal u ligli g kun Tanmal g diid u baa. G banŋ yab maad k wan yaan daa bil dinne nyan, k u kan fid g guan g gaal dinne. K wan ŋaa lan tien laad munle o. G Cabl yam ŋanm g ŋmad. U ji g ban wan bu tien nand. Baa ninsiid mɔno g nyie u ninbina n ninŋ. L bo cɔg'o g pend k u ji g ban wan be naan. U duan l daal k l tan fann i, u ninbinn g ŋub. Kom g mɔg'o o, nyunnyuglu g mɔg'o o, siel yaa maalŋanm g baad u yul n.

Yensiig po u tan sua Agoli yen u naa yen u baa. Agoli danm bo cien'o hal Naajilie yen b lol g tan baal Akra g dugn kalaatu guanu po. B pund b g faad Cabl. K b bual'o yal nba baal'o. U g fid g maad. U gii yed k wan yaad mɔb, wan gbal. L youg u g ninsiid ji nyie Cabl ninbina n. K Agoli baa niin'o k u nyuu nyum g dii jied mɔ waam, g ji dugn'm yal nba baal u baa Gulnbad.

K Agoli baa maad k wan daa bual, k wan di jied waam g pugn g la paalu k ban cien' o Tanmal wan daan la u danm k u pal n sɔnɔ. G Cabl yug g cii, g maad k ban daa bual jied po. G laabaal nba k b maad' o ne cie jied. K Agoli baa yie g maad, k u gii yie k u kan di jied nuan, k u kan cien' o.

G Cabl fiil g dii, g kua g wul g bob g gbenn g nyie g sed. K Agoli baa maad k wan n̄aa k lan won fann o ban gad. K wano m̄ono cɔg o. K l g n̄an wan tug lol ne yen Tanmal g g duan g fuod. Cabl g nai u maam, g kua g land u tied g guan g lie wan tu lie yal nba g tund. K Agoli naa yen u baa gad g duan Otelciɛɔnɔ nne ninɔ g n̄aa Agoli yen u dɔnn Cabl k b m̄o duan b tintaandieg n. K l fann siɔapinpan k Agoli danm tuod g baal Cabl yen Agoli n be naan, g sua k b tuod g fiil g tien jied g dii, g bob g gbenn g ji guu' b i. K b kul fiil g gad Tanmal.

Cabl yen Agoli yen Agoli danm pund Tanmal, Gulnbad n̄aa g sua g niib tigl g gbie n̄aa i mib. L niwulug n la g lol baal g sed cincann g jua nba yen u n̄aapuo nyie l n ninɔ nyan, b g bann' b. Ama b la b tieliend n ninɔ g bann k b tie nigbenna i. Lann i k b piɛn g n̄aa sɔnu k b kua n̄aa g ninɔ. Cabl n bo be liig k b n̄ua, ama sua bo g bann' o. B kul bo mali g lodaan yen u puo yen bid banle n baal k ban fuond Gulnbad. Cabl kua lijɔug n ninɔ

g bu pend g kua bad dieog n, g bad kpaaga sen'o, k wan daa kua, k wan kal yen u danm cincann k ban diid g lie bad bu fid g nya g fuond'b bii u daa kan fid i. Cabl n yaan yaad mɔb g fuond'b gulma n ninɲ yaa youg, k b kul gben tuba g fid ninbina Cabl po. L youg u k u naa san san g baal wob g suol'o g yiin'o, Cabl, Cabl, n bipuo Cabl! G jiin ninsiid. G Cabl mɔ caan bubuul. K Agoli yen u danm ji nyind g sie lijɔug sinsiig n, b g ban ban bu tien nand. G bad kpaagyend tan te k b kal kogi po bad cieɔg n ninɲ.

Gulnbad ɲaapuo Yaa-bul'n bo tug Cabl k b kua bad buol, hal bad deduadug n ninɲ, sua g ban ban maad maad yal nba. L yann waam k banm bantaa kul yeg g nyie g kal g kpien saanm nba bo yeg yen Cabl g baal nyan. Lann i g bad gaal maam g fuond fuond saanm, g tien'm balg yen Agoli baa n nyie Naajilie g baal Akra g g fuod mɔno g bie pend Tanmal ne g bu fuond'o k b yen bo g kpel g ban lieb. L youg u g niib kul bann g saan nyie Naajilie i. Cabl n bo kua dieog n nyan i k u bo maad bad yen u ɲaapuo saanm n yaan tie yab nba yen ban nyie naan buol.

Lann i g Gulnbad dugn dugn saanm naayiga n daan baal g pign'o u sitɔug n g sun yaa tuonn nba. Naayiga bo baal g mali g bad luon sitɔug g kun i. Ase u g kun. Diyena u bo tu luon sitɔug g

duan l n ninj. Ama sua bo g ban yaa daal k u dua sitcug n yen yaa daal k u kun g dua nyaag. L daal, l bo tuu k u g kun nyaag. Sitcug gana kul bo tie kudgana i. Naayiga n bo baal nyan, b bo kan fid g pua g mud gana g kua. B bo duo dieog po i, g lond cengbaonj, g jiin nyuu g ji tu suol nyuu g jol g jiid sitcug n. Yua nba bo cind g kua sitcug n nyan, Gulnbad bo suol wano nuan g tug kpalcad g dil u mab n, g lol'o g bil g ji guu g lieb n jiid i. Lieb nba tenn g be dieog po bo bual yua nba cind g jiid nyan lan tie nand. B g gbad u danml. G lua jiid g Gulnbad suol u mab. Ama wano bo mabg tuam canyiin.

Gulnbad mab bo tie japaalug nne i, g nyaan wan ji bo ciend waam nyan, wano yen naasen paalu ji bo kan fid gii ja. G naasen bie tie naayig g maan kunkona yen jad, g ban wan bu tien nand g janm nil. L po n te g Gulnbad bo g fid g lol wano. L naayig n ji bo tien g maad u lieb g bondaan be sitcug n. K b ji tug tindaad g pua. G Gulnbad maad k ban nya k wan luod gann k ban kua g tug ban bua yal nba g nya'og yen miel.

Sitcug bo mabg ganliel g naayiga g ban l po. Gulnbad bo luod sitcug g gbaa g tagn dimolliem gann i g nyie yen naayigyend g gad g kua kudolug n g ciel. Wan bo suol cincinn yua nba bo cind g jiid sitcug n nyan, u bo tug wano i g yaad yen'o.

U bo tien ninfanm g tug jug g tagh u lbunŋ n i, g maad k u gii bōnd u yul g yign k u bu kod'o i. Nnyan i k u bo fid g sonm yen'o suoo suoo g daan tie'og sijenm, g dugn'm yal nba baal'o. Sijenm bo fiil g gad sitcug buol, b g la sua. L sua g naayiga bo baal yen lol i g sen sitcug cincann g kua g baan yal nba tie bonmōnn sitcug n ninŋ kul g yaad yenn o.

Gulnbad n yaan bo suol yua nba nyan n ji bo maad sijenm ban tie yab nba. Sijenm bo mabn l naayig boncienn k u taa u lieb kul sana, g ŋɔn ban suun nand, ban kua naan. Ban bo pua Gulnbad tindaag nyan, l bo duol u dunn i, l bo g ŋanm g janm'o. Sijenm bo tug'o g gad yen'o dogda k l fann yo k b ji dugn'o naayig nba k u won baal yen'o nyan n maad yal nba kul. L buol i g Gulnbad bann g Cabl sal Yam-nyie n bo baal yen l naayiga g pign'o. L naayig bo dugn k b tie piinle yen banle i. K b canbaaciɛɔŋ be Akra i, g lieb yad g be Gaana doug n kul. G yua nba la tuonn dingbann nba wan maad lieb ban tod'o wan sun. K nnyan i g Yam-nyie bo maad'b k u mɔg u baawaal nne k u fiel wano Yam-nyie baa faal g tien sitcug g bel g yaan wano yen u waali kul. K lann n te k b cien'o k wan baal g tug u baa faal waam, g baa u gii kan fid g guan g gaal u baa faal kul mōno wan yen la waam.

L maam bo cɔg Gulnbad Yal-b-kua gbanu. Yal nba bo ŋanm g yiel'ɔ tie wan bo gaal Yam-nyie yen u ŋaapuo nand, g yen bo g kpel g ban'm, wan bo tod Cabl nand k u tan gad Akra, k b kal g guu k u sal bu guan diyenn g tug'o, g puo mɔ mind g guu k u sal bu guan, u bo mali l kul g luol wan bu jiin yal nba i. Sijenm bo tien suoo suoo g suol naayiga banluob nuan. B ninŋ Yam-nyie bo be.

Gulnbad n yaan dugn saanm l kul g gbenn, k banm yen Gulnbad kul yeg g gad g la naayiga k b be dansaldieog n. Cabl bo la Yam-nyie k u be dansaldieog n yen piedyann i. Yam-nyie n la Cabl yaa youg k u guan g tibn, g leg nunŋ siel po nyan u g la siel nyan. Cabl pal bo bie g pend, k l naan b bu cab'o wan kua g ceg u lancinŋ n ninŋ g tab g mud u kodl g fuod. Ama u g yaad mɔb g maad siel. Sua g bann mɔno maalm nba baal u yul n ninŋ l youg. Cabl bo l suol u kua i suoo, u g maad baa lanbonyenn. Agoli baa mɔ n yaan bo tie suud nyan, k u bual sijenm l laabaal n bu juod nand. K b maad g bina ŋanmu n nyan g Gaana sijenm kpaan k ban mubn l naayiga. G ne nuan, k b ji g mɔg cielu. G Gulnbad yen Cabl yen Agoli danm tien sijenm balg g guan g lebd Gulnbad ŋaag. L sua g Gulnbad ŋaapuo tien jied g ji guu'b i. K b

dii waam nne k Agoli baa maad k u bo baa bua wan pag yen Gulnbad waam.

G Gulnbad tug’o k b kua wan gaan saanm naan. K Agoli baa maad Gulnbad wan bann Cabl nand g dugn u bipuo po. G maad g Cabl tie nyan u bipuo nyan i, g Gulnbad n tuo k banm banle n gii die lieb nyan ninjann nyan. G Gulnbad maad g maam g be. G buam bo gii g be Cabl yen Agoli siign g paa, k u bo kan nya Akra g tan baal ne k u bua n fuond’o g yen tu g kpel g ban’o. K Agoli baa Akuwe bual Yal-b-kua g naayiga n yaan jan bona nba nyan, k l pann fiil yingaa i? K u maad k u daa g kal g diid l pann n fiil nand, k ama k l kan luol miilieɔnɔ nɔntaa. Lann i k Akuwe maad k b daan bil ligli g guun Cabl, k b won pag yen’o lol n ninɔ ban yaan won nyie Akra g baad, g Cabl won maad k ban tug l ligli g tod u baa. G Gulnbad bo gii bu tuo, k b bo bu tug l ligli n ninɔ miilieɔnɔ nɔntaa nba k u maad ne g te’og k wan fid g guan g fiin u sitɔug. G Gulnbad maad k u kan fid g gaal l ligli. G Cabl sun be tuonn i g la yaa ligciennɔ ne i? U yul n ninɔ u bo mali k l g kua Naajilie jua ne bua n tien suoo suoo g daa Cabl g kun yen’o g daan tien wan bua yal nba i. Lann i g tien Akuwe balg. Ama Akuwe n maad yal nba kul g bua k wan bann yen mɔni k u bua n tod’o yen papienn i, u g tuo. Akuwe yen u nɔapuo yen Cabl kul gbaa yal

kul, Gulnbad g tuo g bu gaal ligli. B tan gbal g cab Gulnbad i, g fiil g bu lebd Akra.

B kua g kaln lol n ninḡ g ji bu fiil nne i, g Cabl maad k ban ḡaa k wan maad u baa siel. Lann i k Akuwe maad k wan yen tien tonm. G Cabl nyiε lol n ninḡ g san g nagn g maad Gulnbad k ban daan bil ligli nba g guun'ο nyan, k wan yen tuo k wan gad banḡ g gaal ligli g te'og k wan daa gii dabnd o. G Gulnbad tuo. G Cabl san g gad banḡ g nyan wano mɔno ligli nba g Gulnbad bo te k b bil g guun'ο Tanmal nyan, yen wano mɔno n sun g bil ligli nba banḡ Akra nyan, g guan g tie u baa tuda kobiinle (tuda kobiinle i k b yi miiliεonḡ). Gulnbad gaal lann i, g te k b kuad naabi piig yen bantaa yen pei piinna k u taan l ligli kul g guan g fiin u sitcug k l yab g cie cincinn yal.

Cabl yen Agoli bo guan g lebd Akra g tond bina ḡanna nba bo tenn, g gbenn b kalaatu. Cabl bo g tuo g gaal ligli nba k Agoli danm bo tie'og. U bo maad k ban bil b banḡ n ninḡ, k l tan gii sua k u mɔg l ligli buam, k u bu maad'b.

Suud-nba bo jiel Yam-nyiε yen u naayiglieb buud g kuan'm dansalg bina piinmu i, g dugn ban bo jaan nyan, b bo kpil niib banmu i, g janm lieb mɔ k l duol'b boncienn g sieb ji kan fid g sun siel. Cabl-nba n gbenn b bina ḡanmu kalaatu yaa binn

i g suud-nba bo jiel l naayiga buud g te k b luon b kul. Yua nba g Gulnbad bo suol'o nyan kukua i k b bo jiel u buud k l tie k u bu tien dansalg bina piintaa. Wan bo tuo g njon sijenm u naayiglieb n yaan be naan buol nyan po n bo te k b kuod u yaa bina waam.

Mayula njanlile po: Cabl la tuonn Akra banɲciɛɔŋ n ninɲ

Cabl-nba n bu gbenn kalaatu yaa binn, b bo te k b tɔ kɔnkuul nne, k l tie g niib banmu nba bu gaal liig nyan, k b bu gad bitɔa doug g biɛ daan kua kalaatu l po g pugn. Kalaatu bo gbenn g kalaatubid kul guan g lebd ban bo nyiɛ naan g baal Akra nyan, g ji guu k ban yiin b sana g nɔn yab nba bu gad bitɔa doug. Yab nba tenn g kan gad bitɔa doug mɔ́ n kpaan tuona gii suun, sua kul u doug n.

Cabl bo guan g kun Tanmal Gulnbad Yal-b-kua njaag i. L laad munle po k b yiin'o Akra. Ban yaan bo tu cab kalaatubid wan gii suun banɲ nba ninɲ g sua k u daa be Yunifersite nyan n bo yin'o k wan baal gii suun b banɲ n ninɲ. Mɔni, binn kul, b bo tu cab kalaatubid Cabl n gad gii suun l banɲ n ninɲ i g tod'b. U bo g ped baa binyenn. L banɲ n bo tie Gaana kul banɲciɛɔŋ.

L banɲ n ninɲ tuonsunna kul yen b Canbaaciɛɔŋ bo faad Cabl tuonn hal boncienn. L po n te k b ji bo guu g Cabl n gbenn u kalaatu k ban gaal'o tuonn l buol. Cabl n gaal l laabaal yaa daal g Gulnbad yaan tien jaanm. B dii jaanm k l fann g Gulnbad Yal-b-kua yiin Cabl u dieog n g

pag'o boncienn yen wan kuan pamann nba u
 ngaag n ninj. Lann i g bual'o, k u l mali jakund po
 nuan ii? K wan yaan la tuonn ne k l ji bo bual k
 wan la jua g kun i. K wano mɔno yen ban g puo
 nuan g taa yen jua, k u gii n̄aa g jakund youg
 pend'o g big malu tan baa tie maam i u po. G
 Cabl mɔ gaal maam g tien u baa Gulnbad balg
 boncienn yen wan g tie u baa, g yen tien u po yal
 nba k u baamad bo kan fid g biɛ kan tuo g tien.
 Lann i g jiin bad jakund po, g maad k u mali l po
 youg kul. G nyaan k wan daa jie l po, g dugn k u
 daa g la bina piintaa mɔno, k u g pend yen
 jakund. G yab nba tu kua kalaatu g gad fagm tu g
 kun jab tonm, ama k b tu tan l mal bid i. G bid
 malu nuan tie Yendu yal i. G nyaan k u gbad, k u
 baa jaand g miɛd Yendu g Yendu n̄ te wan la jua
 nba k b baa gbiɛ lieb maam k lan ji daa tie nyan
 yubɔnn nba bo kpiɛ g baal'o nyan. K l g tie faaɔg
 kaa, g jua gii maad yen'o k l tie bandagl po, k u
 yam tu pud i. K u tu mali Yam-nyie po u yam kul
 n̄ yugl l youg u. G waajunkpelug n sien
 waaluounj. K l po n te k l bual k wan n̄anm g mali
 u g fid g kun jua. G Gulnbad yed k u gbad, k u mɔ
 baa jaand g miɛd Yendu u po. G Gulnbad maad k
 u mɔg buallei.

K wano yen Yam-nyie n baal ne g Yam-nyie
 yaad g n̄aa'ɔg, g yen dinne u g maad siel u naa

yen u baamad po. K u mali k wan lebd g kun g daan fuond u danm bii u g mali i? G Cabl maad k u mali u danm po, ama k u g mali k wan lebd mɔlane. G dugn, k u gii guan g lebd g kun u kua, g g yeg yen jua, g biɛ g mɔg yal nba k u daan baa di g tien baa daa nle, k u kunu baa tie nifanu kunu i. G yenm n nyan. G munle, k wan yaan nyiɛ ɲaag n ninɲ nand nyan, g mutuol daa tenn g be. K u naa yen u baa kul g bual u po yen dinne. G sua g tua k ban kpaan Cabl g liɛ u tan juod nle? K u mali u danm po, g nyaan g youg daa g pund yen wan guan g kun. Lann i g Gulnbad tien'o balg, g paan u pal, g cab'o sɔnu k wan lebd Akra g daan cil u tuonn banɲ n ninɲ.

L fann g Cabl nyiɛ Tanmal g lebd Akra. U bo saa k u yanbani tie dieog po i. Wan yaan bo be Akra nyan, gobna n bo tie'b dieog k b be l ninɲ. Wano mɔno bo tuod g ban k Akra doug n ninɲ dieog lanu paa. L daaɔg g gbiɛ, nil yul biɛ gii g man k u taan ɲaag yen nibiid, k l mɔ biɛ tie maam i. Wan yaan biɛ bo g maan wuwaad nyan, u bo g ban niib boncienn, l gii g tie wano yen yab nba bo suun banɲ i kaa. U bo g ɲanm g pag yen'm nne, g dugn sua kul bo nyuan ban bil'o tuonn nba ninɲ i. Wan yaan biɛ bo tie kalaatubig nyan, u bo jie jab, g jab mɔ jie'og g dugn u bo g sɔgd yen sua. U yam bo g dua baa waam.

Cabl bo tug lol nba bu pund Akra siŋaaɔg n ninŋ i, k u gii pund wan cind g sonm dieog nba k u baa dua ninŋ taasonma. Wan pund yaa youg, k u gad banŋ k wan la banŋ Canbaaciɛɔŋ g bann bona n bu sonm nand. U kua g fuond Canbaa, k u bual'o k u tied be ɛ? K u yed k l be cincann, k u bil sijenm nba guu banŋ buol i. G Canbaa maad k wan gad g bil u tied u ŋaag n ninŋ g duan waam g fuod o, g tan guan daajuɔg po k ban ŋanm g pag. G Cabl yed k u daa g la dieog, k l po n te k u tuod g baal k wan kpaan dieog. G Canbaa bual'o k lann k u g bua wan gii be ban tie'og ŋaag nba ninŋ ii? G Cabl yed g ŋalanŋ i, k u g ban l po.

Banŋ yab bo tie Cabl ŋaag nba ninŋ k u baa be g suun tuonn, b Canbaa mɔno n bo dien kadaɔg k ban nagn g te Cabl. Yua nba bo bu nagn nyan bo g nagn. U bo yiin Cabl tangalafu po i g maad'o k wan baal gii suun banŋ. L po n te g Cabl bo g ban k b kpaan ŋaag g tie'og. G banŋ Canbaaciɛɔŋ yiin u dɔlb g te k u tug Cabl yen u tied g gad yenn Cabl n baa be naan buol. L bo tie ŋagbenŋl i, g mɔg deduadd tintaa, g mɔg luolug nba yab g kogi yen tieba sie l n ninŋ, saanm kinkaankogi bo be l kua g jedikinkaankogi be l kua, g jetiendieog yen l jetienbona kul be, g nyunwuldied tinle yen binniiedied tinle be, nyunwuldeyeonŋ yen binniiedieog bo be Cabl

deduadug n ninṅ i, g liel be died tindle nba tenn nyan sinsiign, saanm nba baa caan'o nyan nyunwuldieog yen l binniidiog n nyan. Siel bo g pɔd l ṅaag n ninṅ.

Banṅ bo tie Cabl sije nba baa dua g guu ṅaag nyieɔg, g lua be g baa guu ṅaag yensiig n ninṅ. Cabl bo kua ṅaag n ninṅ g gɔnn gɔnn g guan g sed luolug n ninṅ k l naan danṅd i. K u lebd g kua u deduadug n, g kal u gadoug po, g tab tab u dunduanu, g fiil g sed, g pag pag yul g guan g kal, g tibn g yaan jiin ninsiid. G maad u kua n ninṅ: Cabl ii? Min Cabl dunduanu n ne ii? Min nba bo mali g nifosaalb siign ninṅ min n ji l juod, g nil g be k n mɔ yaa cicagm baa cie'og, n dunduanu n ne ii? Lann i g jiid g gbaan tinṅ n g tien Yendu balg g maad:

*Yendu, n Yendu, Yendu, n tagtua
A tie Yendu i, a l tie Yendu i yen mɔni
Fin n tag bonn kul, fin n yen bonn kul
Fin n te g nyum nya tinṅ n g do polu po
G te g nyum nya polu g baa tinṅ n ninṅ
Fin n te g jɔa sie g g miɛd yen sinsedu
Fin n te g nyunkpel dua g g miɛd yen
 dunduanu
Fin n te g nyum puub g saa ṅan bua naan
 buol
Fin n te g kpajui di bind g g yiɛl*

Fin n te g tiidi faad dien yendu g yen g yind

Fin n tie cilg, fin n tie juog

Fin n bo be, g be dinne, g biε baa be

Fin n tie kpinkpieliid, fin tie sanbienmɔŋŋ

*A bina g kuod, a bina g pugd, fin n tie
naasenkpel*

Ŋan won tie nand wonn, a tie nnyan i dinne

*Ŋan tie nand dinne, a won baa tie nnyan i
wonn*

N kan fid g tien'a balg, n waag yenn o

N Yendu, tien a kua balg, tien a kua balg

N mɔb g dagd yen lan pag'a

*Lanbona nba nya n mɔb n g dagd yen lan
pag'a*

*N tagm yen n cicili yen n ŋaal g dagd yen lan
pag'a*

*Nifosaal kan fid g ŋɔn a ŋanm kul lan bual
nand*

*L maband g be g bu maad yal nba k a tien
kul*

L yanfodaan g be g bu ŋɔn lieb a yanfuom

*L ninfandaan g be g bu ŋɔn k u fand a bona n
ninŋ*

L band g be g bu ŋɔn k u ban'a g gbenn

*A gii bil facabug, l paaludaan g be g bu lie l
faaɔg*

*A gii bil caal kunkolg po, siel kan fid g te lan
fual*

*N Yendu, fin n bo cab n naa yen n baa k b
 pul'n Cabl
 Lann, cab'n k n dond'a
 Cab'n k n pag'a
 Cab'n k n don a sann
 Cab'n k n ηɔn niib ηan tie yua
 Cab'n k n gii tien a ηanm
 Cab n tagm yen n cicili k n tien a buam
 Cab n munn kul k n gii tie a big
 Cab n titala k n gii sonm a sɔnu n
 Cab n maalm k n gii mali lieb po
 Cab n yam k n gii baad yen yanduam lieb po
 Cab n tubl k n gii cenη ηan maad'n yal nba
 Cab n mɔb k n gii gaal mɔgaalηani kukua
 N Yendu, daa cab'n k n biil'a
 N Yendu, daa cab'n k n biil sua
 N Yendu, daa cab'n k n biil n kua
 N Yendu, daa cab'n k n biil siel
 N Yendu, daa cab'n k n don n kua
 N Yendu, daa cab mutuol k lan kua n pal n
 N Yendu, te'n pasɔnηl
 N Yendu, te'n juunn
 N Yendu, siel g pɔd'a
 N Yendu, sua kan fid g te'a siel
 Fin n tie Yendu, g yen bonn kul
 Yend n munn kul.*

Cabl daa bo l gbaa tinj n g tiib g jaand i, g dɔlb nba bo baal yen'o nyan baal g sie dimɔb n g cenj u jaandi. Banj Canbaacienj n bo yiin dɔlb k wan bual'o g lie nyan siel tan baal sɔnu po yaa aa, k b gad hal youg o g ji g go i? Dɔlb bo kua g bu yiin Cabl g maad'o g Canbaa bual u po. Ama wan bo nagn dimɔb buol g gbad k u maad u kua, u bo jie yen wan bual'o k u maad yen ηmaa i. L po n te g dɔlb bo sed suoo g ji cenj Cabl jaandi. Dɔlb n yaan bo gbad Cabl lanbona nba bo siε u pal boncienn, k u gum gum yul g maad u kua g puo ne tie Yendu nil i. K u lanbona ne paan wano mɔno yaa pal hal boncienn k u yen bo g maad yen wano kaa.

Cabl bo tien Yendu balg g gbenn g fill g kua nyunwuldieog n ninj g daan faal g guan, k wano yen dɔlb lebd banj.

B pund g banj Canbaacienj tug kadaaɔg nne g tie Cabl k wan lii g lie ηmaapaɔg nba k b baa pa'ɔg dagd u po i. Cabl gaal g sua k b baa pa'ɔg ηmaalg kul tuda kobiinwai yen piinmu, g ηaag nba k u baa be l ninj nyan, u kan gii pa l po, dɔlb nba baa baad g tugd'o ηaag g baad yen'o tuonn g biε leb yen'o ηaag daajuaɔg nyan mɔ, u kan gii pa siel u po. Ama yensiign u kan gii kun ηaag. Tuonn cilg siηaɔg n kud munwai i g gbend daajuaɔg kud munna. G kuku be g baa tie u jied,

g sijenm banle be g baa guu u ɲaag, yend yensiig n, lua nyieɔg, g puob banle be g baa ɲanmi u ɲaag. B kul ne ɲmaapaɔg be banɲ nuu n ninɲ i, Cabl kan gii pa siel b po. K u gii sun binyenn k b sua k u tuonn ɲan, ban pugn u ɲmaapaɔg. Cabl lii kadaɔg g gbenn, u g jiin siel. U g yaad g diid banɲ Canbaacieɔɲɲ mɔno. Nil bo kan fid g la u nunɲ po g bann u pal n man yen lan man. K l suol Canbaacieɔɲɲ yaalidug. K u bual'o, k l g tuo u po yaa aa?

G Cabl jie g jugnd nyan u bo g maad yen wano kaa nyan. G bual Canbaa, k u yed g be ɛɛ? G Canbaa guan g bual'o, k ban mali k ban baa pa'ɔg yal n nyan, g nyaan k l gii tie k l g tuo u po, k wan kad g maad k ban diid ban bu tien nand. K b kul ban k u tuonn ɲan, k l gii bual k ban pugn u ɲmaapaɔg k l kan gbal, k wan maad wan daan baad g mali nand, k wan diid. Canbaacieɔɲɲ maad g gbenn g fai suol Cabl, g kpil u gbanu canyiin. Mɔni nuan, u bo g mali ɲmaapaɔg po kaa. U bo lii kadaɔg g gbenn k u cicili yen u tagm tug'o g lebd yen'o wan bo nyie u naa yen u baa ɲaag g tɔgn tɔgn cicagsɔni nba, wano nba bo g mali k u bu di miel mɔno g bual wan tan la tuonn, k l g tie kpaab tuonn, g g tie mɔtignu yen dikpielu tuonn kaa, g ji tan tie banɲ n ninɲ tuonn, k u ji baa mɔg niib k b tignd muad u ɲaag n, g tie

jied g senŋ'o k u di, g mɔg dɔlb k u ŋmagd u lol, g mɔg u yul po ŋaag yen sijenm k b dua g guu'ug. K l kan fid gii tie mɔni. U bo mali k l tie danŋd i. G yaan ŋminn u kua k wan lie u guand bii u l nyuan i g gbiɛ ban maad'o yal nba ne kul i? U ŋminn u kua g sua k l yiɛl, lann i k u bann k u g danŋ kaa. U ji bu tien nle i g maad banŋ Canbaaciɛɔŋŋ wan mali yal nba i? U tibn, g yaad, g tibn g yaad yul g gbaa k wan nyuand canbaa g gbal. G Canbaaciɛɔŋŋ maad'o k wan kun g daan fuod, k l g kua cɔgnd mɔ be. K u daan gii duan g mali g la yal nba, g wonn wan won guan g maad'o. K u bie gii kan fid g yaab mɔb g maad mɔ, k u bu fid g dien kadaaɔg g te'og, k l kul tie bonyenn i.

Cabl bo kan fiil nnyan g kun, g dugn Canbaaciɛɔŋŋ nuan ji bo baa mali k ban maad Cabl k u paaɔg baa ja nand nyan, k lann n g manŋ u pal. Lann i, k u ŋanm u niɛlu g yaad mɔb g yed k wan maad nne g maad nyan bidg nyan. Canbaaciɛɔŋŋ g ŋaa k u maad siɛl. U fiil l youg u, g maad Cabl, g wonn n nyan. G pugn g maad, g wonn k u won kan gii be, k u mɔg sɔnu. G tani nba ŋua k b daan bu pag l po. K wan daa jie, k l kul bu ŋanm. G fiil g baal Cabl buol g tand nuu g cab'o, g yiin dɔlb g maad'o k wan cien Cabl ŋaag k wan daan fuod.

Canbaacיעֶנְהּ nyie g Cabl mə fiil g bu nya g tug u lol g kun. U gbaa k wan sonm g nya Canbaacיעֶנְהּ tuonsundieog n, u fid yaa aa? U sonm g titala pua g lelg liel i. K u yam kul ηmad, k l tie nyan niib n maad maad u yul n nyan, g naan niib be u puol po g maad yen’o g lieb be u nunη po, k u sed, g gbeg u g la sua. K u ηnam g ligd ninbina k wan lie niib be u nunη po yaa aa? U g la sua. U yed k wan sonm, g caad g baa.

L sua g dֶלבּ mə ji bo baad g bua n gaal u kֶלּ g cien’o lol buol i. Dֶלבּ n la k u baa g kal tinη n nyan k u gbaa g san g baal g bua n yugd g fiin’o g bie jie jiwaani k l g kua nil tan baa pend g la’ֶגּ, k l daan baa mali k u bua n tien Cabl bonbiug u. Lann i g pua banη Canbaacיעֶנְהּ dimֶבּ g mali k u be l ninη i, u g gbad danml. K u lebd g san g nyie cincann g sua Canbaacיעֶנְהּ ji bua n kua u lol n ninη g kun i. G Cabl dֶלבּ san g yiin’o k wan guan i, g laafie g be Cabl po.

L youg k banm banle kul san g duo detuadug po, Cabl n bo baa g kal naan buol, g sua k u fiil g sie suoo g nyuan nyan bonpuakal n tu pua nil k u nyuan nand nyan i. G Canbaacיעֶנְהּ nagn g suol u nuu g lebd yen’o u tuonsundieog n, wan gaan saanm naan buol, g kaan’o kog po. G tie’og nyum, g maad k wan nyu, k u nyuu nyum g fuod g jiin, g bie guan g nal nyunbֶלּא nle g fuod g jiin g

ňanm g gbad yal nba, tuonn nba k b bil'a k a g ban ňan bu tien nand g sun k lan gii ňan, ňan daa wuon'n. N bu tien min bu fid g tien yal nba kul a po, g Yendu n yaan bua k ňan te yua nba nyan, ňan kon te l daan. Canbaacieuňy maad g gbenn g Cabl mō gaal maam g tien Canbaacieuňy balg g puon'o k u baa cōlm'o lan bual nand, k l gii g tie yiēlu i kaa, k u kan jie gbannyagl tuonn n ninŋ. G Yendu gii tie'og laafie, k u bu sun tuonn Canbaacieuňy pal n manŋ. B pag pag g gbenn g cab lieb, g sua kul tug u ňaag sōnu g kun.

Cabl n pund ňaag g kua dieog n yaa youg, u baa g gbaan tinŋ n ninŋ i, g tien Yendu balg yen wan ňmagd bona nand u po. Ban tien jied nba g tuan tiebl po, u g diid mōno k wan liē bē jied i? U wul kua i g kua g duan g guan nyan l tien bina nle k u g guan nyan.

U fann g sua k l tenn nyan miid piig nyan i, yen tuonn n cil. U g la yaam g wul mōno. U faal kua i, g liē u tied g nyie g sua g dōlb ji sie g guu'ug u. G dōlb maad, k u bual sije nba guu ňaag k u yed k u daa g fiil, g Canbaacieuňy won yed k u saa sōnu. K lann k u bu fid g di baa siŋaawg n jied o gii saa g dugn, u yen ban k b g buad yensiig n ninŋ. G Cabl tien'o balg g maad k u ban g Canbaacieuňy g be tuonn dinne, k ama k u g saa Canbaacieuňy po kaa. G dinne i k u cilg

tuonn, k l bo bual g yaa youg ne lan sua k u ji be tuonn n ninḡ i, k l gii bual k wan gad tuonn g sua g youg pend mɔno, g dinne kaa k l yubɔnn bu baal'o. Lann i g kua lol n ninḡ g dɔlb tug'o g baal g sua tuonn cilg tenn miid ḡanle i.

Cabl pund tuonn n ninḡ g sua Canbaaciɛɔḡḡ yen u tuonsunlieb kul be banḡ tintaann dieog n i. Niib n tu be g yab ban gaal saanm naan buol nyan. U kua k l tien miid ḡanmu nne g yab nba bo tenn g daa g kua kul nyan kua g sed. Sua g kaln kinkaanu po.

Lann i g Canbaaciɛɔḡḡ gaal maam g fuond b kul, g maad k ban kal. K b kul kal. K u maad k b kul ban g dinne k u saa sɔnu. K l bo g bual k wan baal tuonn dinne. K u baal g dugn laabaal be k u bo bua bɔgd yen'm o g fid gii saa. K b kul ban Cabl. G bina ḡanmu n nyan k wan daan kua kpinkpeonḡ yen ligcɔdl kalaatu Akra ne, k b tu cab kalaatubid wan baal gii suun banḡ ne saa yen kalaatu guanu. K b kul biɛ yen ban g bina ḡanna n nyan k b tu kpaan yua nba kua l kalaatu k wan gii tod wano Canbaaciɛɔḡḡ. K banm nba tie banḡ liig yab daan taan g kal, g suol k ban miel Cabl, k u gii bu tuo wan baal gii tod'b. G mɔni, Yendu bua, k ban yaan yiin'o tuonn, k u g nai, k wan gaal laabaal yaa daal, k u fiil g baal i. K u won pund wonn u won g fuod mɔno, k u won

baal k b pag waam l po. G dinne mɔno, u bo g mali g Cabl bu baal tuonn g dugn k u won cɔg hal boncienn. G nyaan g yen l cɔgnd kul, k wano n kal nyan.

L youg g banj tuonsunna kul tien niipuoug lob lob lob. G Canbaaciɛɔŋ maad k u g mɔg maam boncienn g bu maad l po, k u bua g tuonsunna kul ń gaal'o ŋanu nyan ŋaag yab n tu gaal sikpenj nand nyan i. G maad Cabl mɔ, k u ŋaag yab n nyan, g yab nba suun ne buol kul tie nyan puoyend bid nyan i. K b kul ń mɔnd g naataann nba tu be b ninj nyan, k l naataann ń gii be nnyan, k lan gii tie nyan tiig nba sie bɔngbienu nyan, k lan lon luangana g sua kul ń do nyuad l po. Lann i g tie yua nba tua wano Canbaaciɛɔŋ po mɔ maam, k u mɔ tie'b cegli, k b yuand g tie Cabl mɔ maam k u mɔ tien b kul balg, g sua kul fiil g kua u tuonsundieog n.

Mayula ḡanniin po: Cabl n cind g kua luopil g saa bitɔa doug.

Cabl sun banḡ n ninḡ ḡmaali yinle i, ḡmaali yintaa n ninḡ laad cincinn, l laalb daal, k wan bo tu kua kpinkpeonḡ yen ligcɔdl kalaatu naan nyan miɛda cien yiin'ɔ tangalafu po, g maad'ɔ k u mɔḡ laabamann. G Cabl yed g bɛ laabaal i? K u maad k u sann nyiɛ k l tie k u bu gad bitɔa doug g daan kua kalaatu l po g pugn nyan ban daan maad nyan. G Gaana gobna yen bitɔa doug po gobna n bu taan g pa b po ban gad l kalaatu. K banm nba daan tien l bignn nyan, g Gaana ne wano kukua n dii. K u dɔnn Naajiliɛ sipaan Agoli mɔ dii. G bijabi mɔ tie banle, yend nyiɛ Sinbaabuwe, g lua nyiɛ Keniya.

Miɛda cien pal bo manḡ g pend k u maad g g fei mɔno. U bo guu g Cabl n yign yen pamann i. Cabl g yign. Cabl bo tien'ɔ balg i, g maad g Yendu yen wano i kaa, k b bo kan fid g di l kɔnkuul g dugn k l daan g tien Gaana ne kua kaa, g buali nba k b daan bual'b nyan, k l buali k b daan bual bitɔa doug n kalaatubid mɔ. K b yed k b bua niib piig i, k ban yaan tan tie niib banna kul g nyiɛ Gaana kpinkpeonḡ yen ligcɔdl kalaatu buol ne, k l ḡɔn yen mɔni k u die kalaatu lan bual

nand. K u cie bitca doug kalaatu miɛda cienm mɔno.

Cabl bo pag'o, g maad lanbonmana boncienn k u pal n manɲ. G yuand g maad g wonn i k u won bu baal kalaatubuol ban njanm g pag wan bann bona n bu sonm nand.

Bitca doug po kalaatu gadu bo tie laabamann i, g nyaan Cabl n yaan daa bo cil tuonn banɲ n ninɲ k l daa g wai, ban yaan biɛ bo njanm g gaal'o nand l tuonn n ninɲ, nmaapaacɔg yen lol yen njaag nba g banɲ yab bo tie'og nyan, l kul bo taan g te k l laabaal ji g maad'o siɛl. U bo suol k l gii fann u bu gad g daan njanm g tien miɛda cien balg, ama k u kan gad bitca doug g njaa tuonn nba g Yendu tie'og. L daal mɔno k u miɛl banɲ Canbaaciɛnɲ sɔnu g wonn k u won baa mɔg taasonma, k u won kan baal tuonn tonm. K u bua n won gad wan daan tu kua kalaatu naan buol nyan, k b yiin'o k wan won baal g gaal laabaal nne. U bo g bua g Canbaaciɛnɲ n bann k u dii kɔnkuul k l bual k wan gad bitca doug. Canbaaciɛnɲ bo g nai u maam. U bo cab'o sɔnu k wan won sonm u taasonma.

L fann g Cabl gad kalaatu buol. U baal g sua g miɛda nba daan tu kuand'b kalaatu nyan, yen

gobna tuonsunna nba nyuan kalaatu n ninḡ kul taan g ji guu wano kukua i. U bo pund g miiniidl nba nyuan kalaatu bicieni po n gaal'ò, g fuond'ò g tien'ò balg. G yab nba tenn mɔ ji fuond'ò yend yend, g daan tii. K b tie'og kinkaanu, k u kal g kpien Akra Kumɔnda.

B bo yiin Kumɔnda g dugn wano n bo ḡanm g sonm taasonma g bitɔa gobna yen Gaana gobna tan tuo g taan ligli k ban tod Cabl k wan gad bitɔa doug. L nigbenḡa kul bo gaal maam g pag Cabl yen wan sun tuonn nand g dii kɔnkuul. Sua kul bo ban k l kɔnkuul paa. Miɛda cien n bo juod g gaal maam g tien gobna balg, g tien gobna tuonsungbenḡa nba nyuan kalaatu po balg, g tien kumɔnda balg, g tien u miɛdlieb balg, g tien politiik yab kul balg, g juod g tien Cabl balg.

U bo maad g kɔnkuul ne dinu n ninḡ, g Cabl kaa dii, k wano n dii, g dugn k l don kalaatu ḡaag ne sann i. G yal nba don kalaatu ḡaag sann mɔ, k wano n ḡanm g duo nyuad l po. G maad k l tie pamancienn i u po, g dugn, sua kul ban Cabl kalaatu n cil nand g tan pund ne. G yal nba ḡanm g manḡ u pal tie k wan yaan tie bipuobg ne i.

Lann i g tug kadaaɔḡ nba ḡɔḡḡ g Cabl dii kɔnkuul, g tug kadaaɔḡ nba ḡɔḡḡ ban yaan baa tien'ò ligli nba k wan fid gii kua l kalaatu, g tug

luopil tigd nba k u bu kua luopil g gad bitɔa doug,
g taan l kul g tie Cabl. L puol po i k b ji tie Cabl
laabaal.

G Cabl fiil g sed g gaal maam, g tien yab nba
baal kul balg yend yend g daan gbenn. G maad g
nil kan fid g kua u lua pal n ninɲ g bann lan tie'og
nand. G Yendu kukua n ban yal nba be u pal n. U
bo maad k u kan maad maam boncienn. G
lanbonyenn kua n be u mɔb n ninɲ: balg. G balg
kua i k u bu fid g tien. G pugn g maad g yab nba
ban'o kul ban k u g paa maam, k lann, k ban miel
sugl g tuo k wan maad yal nba nyan, k wan bo bu
fid g maad yal nba kul n nyan. G Yendu n yad u
yedɲanm b kul po, g te yua kul yal nba pɔd'o.
Lann i g guan g kaln, g niib kul tien niipuoug.

Cabl n bo saa kalaatu buol g mali k u daan
bu maad yal nba, u g fid g maad. U bo kan fid g
bign mɔno k wan maad k u kan fid g gad Jilnd
bitɔa doug nba k b yi Angelter nyan. Ama wan
gaal kadaad miɛda cien nuu n ninɲ yaa youg,
miɛda cien bo bann g siel be g Cabl bo bua wan
maad ama g bo g fid g maad. L jua bo mɔg
yanfuom hal boncienn. U bo maad Cabl k wan
kua u tuonsundieog n ninɲ nii k ban ɲanm g cab
lieb. G Cabl kua, k u bual'o g laabaal i? K l naan
siel be k u bo bua wan maad. K wan daa wuon'o
siel. Cabl bo jie yen wan maad miɛda cien k u kan

fid g gad bitca doug. Ama miɛda cien n yaan bo bual'o nyan, k u maad u pal n ninŋ k u ji bu l gbal g maad'o mɔni i.

Lann i g dugn miɛda cien wan la tuonn banŋ n ninŋ, k b ŋanm g gaal'o nand, u ŋmaapaacɔg n ja nand yen ban tie'og ŋaag yen lol yen bona nba kul g banŋ yab tien u po. K l kul ne n te k l paa u po waam. K u g ban wan bu tien nand.

Lann i g miɛda cien maad k u gbad. K wan daa bual, g Yendu bu tod'o wan tɔgn sɔnu nba k wano Yendu mɔno kuo g bil u po. L maam bo paan Cabl pal, g nyaan u yam yen bo g duan, k l maa, miɛda cien bo g maad'o k u bu fid g ŋaa g daa saa bitca doug, u biɛ bo g maad'o k u bu tod'o g maad gobna yal nba po te k u kan fid g gad. U bo lebd g kun ŋaag yen yanbani i.

L daal nyiɛɔg Cabl bo sonm sonm i k l tan fann, u g guan. U bo l g duan mɔno kaa yo, g bual wan guan. U bo g ban wan cil cil g mali yal nba. L fann k u bob g gad tuonn, sua g bann k u won g guan. Guam bo g be u nunŋ po i, siɛl bo g ŋɔŋŋ k u won g guan. U bo fuond fuond u lieb kul nyan wan tu l tie nand nyan i. Wan kua Canbaaciɛɔŋŋ tuonsundieog n yaa youg g bu fuond'o, g Canbaaciɛɔŋŋ liid g fuond'o g maad: N faa, n faa, n bipuo. Cabl g ban yal nba po te g Canbaaciɛɔŋŋ

G Cabl maad g mɔni nuan, k wan bua yal nba tie k wan gii suun banɲ ne i. G nyaan, k u jie, nyan wan maad g gobna pal kan manɲ u po nyan, k u ji jie lann i.

G banɲ Canbaaciɛɔŋ maad k lann kan gbal. G maad Cabl lann i, k u gii bu tuo, k u bo bu dien kadaaɔg g nyii nuu lan ɲɔn k u gii gbenn kalaatu Angelter, u bu guan g kpen gii suun Gaana ne, banɲ nba ninɲ k u suun dinne. K u gii tuo nnyan, k l kalaatu n yaan tie bina ɲantaa kalaatu nyan, g banɲ bo kan jiel u ɲmaapaɔɔg. K wano Canbaaciɛɔŋ bo bu ɲɔn gobna g Cabl tie banɲ tuonsunn i, k b gii tuo k u tan gbenn u kalaatu bitɔa doug, u bu guan g kpen g sun banɲ ne bina ntaa yo, u ji gii bua naan wan gii saa. G bual Cabl k u bu tuo lan tien nnyan ii?

G Cabl maad: Canbaa, Yendu, Yendu nba tag'ti ne kukua n bu fid g ɲmien'a a ɲanm. Min g ban min bu maad yal nba. N biɛ ji g bua lann, n bua lanbann yaa aa? Pupuaciend g mɔg bubuul. ɲan bu l fid g tien yal nba g tod'n kul ɲan daa bual'n siel, min n cab'a mɔb, tien yal nba k a bu fid g tien kul g tod'n.

Wan maad nnyan k u jiid g gbaan tinɲ n g bu tien Canbaaciɛɔŋ balg. G Canbaaciɛɔŋ fiil u kog po g baal g suol Cabl nuu g fiin'o g maad k

wan daa tie nnyan, g tuonn n bual nand i. K u cabl n man. G kuunaannyibinn g mɔg kpinkpana g bu ɲagn u bid po, g Yendu n guu kuunaannyibinn bid, nyan Yendu n naan kolg fiɛl n dii nyan.

Banɲ Canbaaciɛɲɲ n ji bo sonm taasonma nba tenn kul, g fiil mɔno g gad g la Cabl baa Gulnbad hal Tanmal g ɲɔn'o bona kul niimn, k b kul cab mɔb g Cabl ɲ gad bitɔa doug g daan kua kalaatu bina ntaa g pugɲ o, g fid g guan g kpen gii suun u tuonn Gaana banɲciɛɲɲ n ninɲ.

L bo sua g Cabl bo bobnd g bu tug u baa Gulnbad yaabuona banle g baal yen'm Akra k ban gii be u buol g kua kalaatu, k wan daa be u kua ɲaag n ninɲ. L ji bo tenn laad munle i yen l bid ɲ baal. Cabl n yaan ji bo bu yaad nyan, u bo kan fid g tug bid g tien'm ɲaag n ninɲ Akra b kukua. U biɛ bo kan fid g ɲaa g banɲ n yaan tie'og ɲaag nba nyan mɔ ɲ gii sie fam bina ɲantaa, g sua g be l n ninɲ. Banɲ Canbaaciɛɲɲ bo maad k u bu fid g ɲaa k u tied ɲ gii be l n ninɲ g sije dua g guu saa yen u kpenu. G Cabl yie g maad k l tie ligbiidu i. Lann i g te k b kpaan nil nba daa bu gaal gii be l n ninɲ g pa ɲmaalg kul tuda kobg. Cabl bo nyan u tied g daa kun yenn Tanmal i. Banɲ Canbaaciɛɲɲ bo cab'o k u bil tiɛlied u ɲaapo debig nne ninɲ i. Cabl bo bobn wan bu fid g bobn

yal nba kul, g kun g cab u danm g guan Akra g bu duan daa njanle o g fid g fiil g gad bitɔa doug.

Cabl bo g ban g kua polu po lol n ninɲ. Wano yen Yam-nyie n yaan bo nyie Togo g baal Tanmal i kaa, u bo g ban g gad dofanu n ninɲ. Yab nba bo gad bitɔa doug n bo tu maad k u gbiɛ. Wan yaan ji bo bobnd g bu gad Angelter nyan, k b maad'o g wad be l doug canyiin. L po n te k l bo bual k wan daa wadtied g guun u kua.

Ban gad Akra daaciɛnɲ n ninɲ yaa daal k u bu daa tied, banɲ Canbaaciɛɔnɲ bo te g sua n cien'o. L daan nuan bo gad bitɔa doug, g ban lan tie nand. Ama tied nba k l jua bo cegl Cabl k wan daa nyan bo njanm g kpai hal boncienn, g Cabl maad, k abaa, k l yaa wad ji tie nle i k u baa lie yaa tiekpikpiɛd ne i. K wano taan g njanm g jie wad. G baa fawaacɔg k u g maan k wan lie tied g naa nyan lieb n tu tien nand nyan.

Lann i g yua nba bo cien'o daag nyan maad g bitɔa doug po wad nuan g tie fawaacɔg yal kaa. G t nibɔna doug ne, tinm nuan n yi yal nba wad nyan, k l po tuntonbienn n nyan. U maad maad g Cabl tan gbal g daa wadtied waam g pugn.

Cabl n fiil yaa daal g bu gad bitɔa doug, l bo tie sibd daal i. L bo tie sieɔg u, ama l daal taag bo g baa. L bo tie nyan kpanyitaag n tu baa

tacincinn g yand lan gii tie nand nyan i. Doug kul bo sɔŋ i bola. Yendu bo pud yendumaasɔŋ nne i, tawalgband bo g be i, faalu bo g be. Faam nba bo pieb bo man k l naan nil baa dua g guand kukua i. Akra doug n ninɲ mɔno lola fuug yen nyɔgl bo g ŋanm g be nyan lan tu tie nand daal kul nyan. L daal bo tie daŋann i canyiin.

Cabl bo tuod g fiil g bobn g gbenn k l daa g fann. Luopil bo bu fiil daajuasɔg kud munluob i, ama Cabl nuan bo bobn g gbenn nyiɛɔg n ninɲ g sua baa siŋasɔg n kud muntaa daa g pua.

Niib bo maad maad maam boncienn luopil n ninɲ n tie nand yen bitɔa doug n binbem n paa nand, k l kuan'o jiwaani. L po n bo te k u bo g ŋanm g guan. Ama u yul n bo man k l daal ŋan nyan, yen wan yaan bo g ŋanm g guan nand kul, l bo g kuan'o cɔgnd. Pamann bo ŋmad yen yanbani k u ji g ŋanm g ban wan bu tien nand.

Wan bo nyiɛ Tanmal g guan Akra g bu tien daa ŋanle o g fid g gad bitɔa doug nyan, u bo be ban gaan saanm naan k b yi k Otɛl nyan ninɲ i. Dieog nba ninɲ k u bo dua nyan bo mɔg jetienbuol. Yaa daal nba k u bo bu fiil g gad bitɔa doug nyan, u bo tien siŋasɔg n jied l debig n ninɲ i, g dii g cand jetienbona kul g beɣn g yendu daa g duo. Kud piig po k Otɛl yab kua yen jied g

te'og jebuoli-buoli k wan di wan bu fid g di yal nba g daa saa doug kom i. K l po n te k b tien nnyan. G dinne mɔ biɛ tie Otɛl jaanm i, g saanm nba duan Otɛl l daal kul, k b tien jaanm jied g tie yua kul. K l kul ne n te k u yaa jied ji ŋanm g yab. Ama k wan daa bual, k u gii kan fid g di yal nba, k wan daa jalg u kua l po. Lann i g Cabl yam duan waam.

Taksii bo baal g tug Cabl daajuaɔg kud munle i g gad yen'o luopil yaal n ninɲ. U bo tuod g gad k wan bual g bann bona kul n bu sonm nand k l youg gii pund wan daa tɔbn tɔbn nyan yanbɔndaan nyan i. Ama wan bo baal yaa youg nba nyan, l bo sua k b daa g luod wan bu kua naan g tug Angelter luopil. Sijenm nba guu luopil yaal n bo gaal'o, g tie'og kinkaanu k u kal g guul saa yen kud munna k b tan cil tuonn g gaal u luopil tigd yen kadaad nba ŋɔnɲ k wan saa naan nyan, niib ban u baalu po g bu tuog g gaal'o g gad yen'o wan baa be naan g kua kalaatu. B bo diid diid l kadaad kul g gbenn g maad, g maam g be, k wan guul waam. L youg u k b ŋɔn'o kinkaanlieog buol, yab nba k b kadaad ŋan g dagd k ban kua luopil nyan kinkaanbuol.

Cabl gad g kal nne, u sua banɲ Canbaaciɛɔŋ yen u tuonsunlieb k b baal g kua. B kul bo baal k ban cab Cabl i. Cabl bo g ban b baalu po. U bo la'b k u pal manɲ hal boncienn yen l nigbenɲa ne kul n yaan baal g bu cab'o. Yab nba be luopil yaal luolu n ninɲ bo mali g banɲ Canbaaciɛɔŋ bipuo n saa sɔnu k u cien'o g bu cab'o. Banɲ Canbaaciɛɔŋ yen u yegni bo pag yen Cabl saa yen yaa youg nba k b tan yiin yab nba bu kua luopil i. B bo baal yen paab g tie Cabl. Canbaaciɛɔŋ bo tug ligli g pɔbn kadaaɔg n ninɲ g tie Cabl g wob'o g cab'o. G lieb kul nagn yend yend g mɔ wob'o g cab'o, k b kul nyie g ɲaa Cabl k u gad g kua luopil.

Cabl bo kua g kal luopil n ninɲ yo g pɔbd kadaaɔg nba g banɲ Canbaaciɛɔŋ bo tie'og nyan g sua ligli. L bo tie Angelter ligli i yen kadabig nne k u bo dien l po g maad: «Cabl, i ban k t kul bua'a boncienn, g dug a po. Yendu n cien'a a gadu n ninɲ yen a kpenu n ninɲ.» B bo gii bu cend l ligli Togo ligli n ninɲ, l bo baa tie tuda kobiinniin i, banɲ nba ninɲ g Cabl bo suun nyan tuonsunna yen b Canbaaciɛɔŋ paab n nyan.

Cabl la l ligli k l yaan tien'o nyan niggn n nig'o nyan, k u ji g ban wan bu maad yal. U bie g ban sua mɔ luopil n ninɲ nyan g bu pag yen'o g maad'o Yendu n ɲanm'o yaa ɲanml nba. U bo

guan g n̄uun ligli u k̄ol n nin̄g g tiib g mali l n̄anm kul po i.

Lieb kul bo kua g kal luopil n nin̄g, k b cil g n̄on̄n̄ bona n̄ bu sonm nand, lann n tie, yua kul n bu cebn u kua gbann nand g luopil gii gben, sua n̄ daa baa, g n̄on̄ binniided n be naan luopil n nin̄g, g n̄on̄ ban bu tien nand g nya luopil n nin̄g, l gii sua g luopil suol muu polu po lann i kaa g taag tien luopil k l bual k wan baa nyum n nin̄g, yub̄onn nba l baal, k l bual g niib n̄ yug g nya luopil n nin̄g kul.

B bo maad l kul g Cabl cen̄g yen tubyenn kua i. U maalm kul bo be n̄anm nba g ban̄g yab tien'o po i. Luopil n cil yuglu yaa youg u, k u ji jie g jugnd nyan u bo dan̄g nyan.

Luopil n yaan bo sien ting n nin̄g nuan, l bo g n̄anm g m̄og jiwaani g dugn u bo nyuan luopil yaal n nin̄g lola yen niib k b sonm. Ama luopil n yugl ting n nin̄g g ji do polu yaa youg nuan, l tie nyan u pal bu ciel nyan i. U tuba kul bo kpaal youg l youg u. G jiwaani kua'og k l pend. U bo kal luopil tankobonn buol i. Luopil gben k u diid g sua k b ji be m̄ogl polu po i, k l naan k b bu baa m̄ogl n nin̄g. Cabl kan fid g maad sua g jiwaani m̄og'o. Binyidi kukua n bo yign yign. Ama cegdcab yaa kul, sua bo g maad siel. G Cabl m̄o suol u kua g

kal suoo, u ji bo jie jiwaani yen wan dɔnn tankobonn g diid.

Luopil saa saa g daan pend tawalgband canyiin, g Cabl dɔnn g sua tawalgband be hal ting g tie bonnyidi-nyidi ne nyan gungund nyan. Ting nuan ji bo g nyuan palb. Yua nba bo kal g kpiɛ Cabl nyan mɔ bo g ban g kua luopil. U mɔ bo nii g mɔg i. G nyaan sua kul n bo kal suoo nyan, k u mɔ tien nyan l g maad'o siel nyan. Wan la g luopil ji saa g naan nyan u sonm ting n nyan, k u pal paag k u fuond Cabl g bual'o k u ban g kua luopil ii? G Cabl yed k u g ban g kua. K l jua fuod g jiin, g maad k lann wano kukua kaa.

L youg u, g niib ji fi yend yend g saa binniidiog n. Sieb bo kua binniinu g lieb mɔ kua g bu nyann. G puob nba bo die sanpandi mɔ kua g bu lebd bid nyaada nba k b bo nii g pɔbn l ninɔ. L tien nyan miid piig nyan, k b muand g sua kul n guan u kinkaanu n ninɔ g kal g cebn u gbann. G luopil bua n kua kankua n ninɔ. B daan baa kaal g g kaal nyan g luopil te gbid gbid gbid nyan ting n ninɔ lol n tu sien sɔnu nba po g buotuod be nyan. G binyidi ji l yign yen paalu. L yann waam k l kul te silb. G luopil guan g saa nyan wan bo saa nand nyan. G luopil dɔlb-nba muand, k b pend kankua n ninɔ o. G yua nba bua wan fiil, u bu fid g fiil g tien u buam.

Luopil n yaan bo saa g siel yaa danml ji g danm nyan, g sipaanm yen naasenm nba suun luopil n ninᅇ nyan baal yen jied g tɔgn g biid yab nba be luopil n ninᅇ kul. B gii baal yua nba buol kul, ban bual'o wan bua jied nba. Yua nba bua kolg nand ii, yua bua jani ii, yua bua mugli ii, yua bua naab nand ii, l daan n maad ban te'og. G daam be dibuoli-buoli. Dipaalm bo be, g damimalug be. Yua nba bua dimɔunᅇ, b bu te'og dimɔunᅇ kpalbl i, sua kan taan yen u lua g biid kpalbyenn n ninᅇ daam. Jied ᅇann mɔ bo g tie jebuolyenu kaa. Yua nba gaal mugli yen naanand, b biɛ bu pugn kpanu yen tiluana, yen bitɔa jemimali buoli-buoli nyan ᅇanna ᅇanmu nyan i g pugn.

B gii baal yen jied yua nba buol u tu dad u nunᅇ po i, tiebl n nya kog n ninᅇ g tand u nunᅇ po, u pana po, ban tuan jied. L tiebl mɔ biɛ mɔg bonn kul tuntuanbuol i. Jekpiegd tuntuanbuol be, g jeyuyoli tuntuanbuol be, g daam tuntuanbuol be, g nyum tuntuanbuol be, g jugi yen ban l diɛ yal nba g di jied kul be. Jedibona kua kaa bo be jeditadg nba g luopil tuonsunna bo tuand yua kul tiebl po nyan. Nunfiɛnbuoli-buoli bo be. Yal nba k b diɛ g fiɛn mɔb po be, g yal nba k b fiɛn nuu be, g yal nba k b fiɛn nunᅇ po be. Jied n bo nu g man nand nyan, yua nba g kom g mɔg'o mɔno, u bu l

gaal g di'i. Siεb bo tu nyu daam nba k b tie'b nyan g biε yuand g bual daam po. Yua nba bual k ban pugn'o daam, b bo tu pugn'o g kan maad baa siel.

Niib n dii g gbenn yaa youg, k b ji fi yend yend g kua binniidiεog n. G lieb mε kal g nyuan telefisiyεn. Yua kul bo mεg telefisiyεn k l be u nunε po. Yua kul n bua wan gii nyuan yal nba u bu lugd lann i. Siεb bo cenε yani, g lieb nyuan sinema, g lieb cenε ηanduna doi laabaal. B bo tie yua kul yal nba k u bu tien u tuba n ninε gii cenε wan bua yal nba g lieb g gbiε. Nnyan siel yaa fuug bo kan fid g mabn sua k u kan guan. Siεb mε bo kal g lii kadaad nba k b bo tie'b luopil n ninε faala nyan i. Yua nba bua u bu fid g lii g ηaa. Yua nba bua wan tug g kun yenn mε, u bu fid g tug g ηuun u kεl n ninε g kun yenn. Boncienn bo dii g gbenn g tug cincenn nba k b bo tie'b nyan g pin, g tand b kogi g duan l n g ji guand i.

L youg u g Cabl mε cebd gbann nba k u bo lol g tabn u kua yen luopil kog nyan, g fiil g ηuan lieb g gad binniidiεog po. Otεl n ninε jied nba g Cabl bo dii siηaaεnε n yen yensiig n nyan bo yabd. Wan biε bo dii yal nba luopil n ninε g pugn nyan bo taan g ji cil g mabnd'o waam.

Wan yaan bo jie yal nba g g bua k u dii jied k l yabd nyan, u maalm kul ji bo tie k wan daa fiɛg i. Luopil n ninɲ, binniided bo tie ɲanniin kukua i. Niib nba bo be l luopil n ninɲ bo cie niib kobiinle yen piinmu. Mɔni, b kul kaa bo fiil g bu kua binniinu, ama yab nba bo taan g fiil g bu kua binniinu bo yab. B bo sagn sagn i.

Cabl bo diid g sua yab nba be u liig tie niib banmu i. Yab nba bo lii'ug bo g ɲanm g yab, g nyaan wan yaan bo suol u kua k l wai nyan, l ji bo tie nyan niib kobg n lii'ug nyan. U puol bo tie nyan l piib nyan i. U kan fid g sed suoo, u biɛ kan fid g kal mɔ. U bo kan fid g yaad mɔb mɔno g maad siɛl. U bo ceg nyina i, g mubn mɔb g somm suoo suoo suoo g ɲua lieb.

L tien nyan miid piig nyan, k u la yiɛl g kua binniideog n. U kua k l tien miid ɲanle, u g fid g yied u sayied. U gii yed k wan yied nne, l tu tie nyan l baad nyan i, wan daa ɲaa g sed suoo. Wan yaan tan fid g kal binniikog po g faab u kua yaa youg k u fuod g jiin, g tien Yendu balg yen wan g fiɛg niib n ninɲ. U gbenn g tab g mali g nyum n bu baal g tug bind g jiid yenn. Nyum kaa baal. U gbad g faalu n baal yen paalu k l mɔ fuuuuu fab. K u yam pud. U gbeg g diid, u g la siɛl. L faalu bo tug bind yen nyam kul g yaad yenn, g fiɛl naan buol nba g bind ji l ninɲ nyan k l ɲan nyan siɛl bo

g tien nyan, baa nublu g be k l ɲɔŋ g nil tien siɛl
l n ninɲ. K u pag pag yul g maad u kua, k ama
Yendu pii nifosaal banm yen yanfuom!

Cabl bo guan u kinkaanu n ninɲ g sua g niib
boncienn ji guand i. K u mɔ kaln g tug cincenn
nba k b bo tie nil kul nyan, g pin, g dugn wad bo
be boncienn luopil n ninɲ. U bo pin cincenn yo, g
biɛ tug ninbinpibg g pibn u nunɲ po, g tug
tubnyali g nyal u tuba g guan.

B bo tien kud munlile i polu po, k b tan guan
g son mui luopil n ninɲ, g muand g sua kul ɲ cebn
u gbann g tabn u kua yen u kog, g luopil ji bua cil
gii ji i. G yab nba bo guand fiil g kal. G yab nba bo
kpad b kogi g tien dunduanu nyan ɲanm g sen b
kogi g kal g cebn b gbana. G luopil ji sind g caan
g ji nyan u daan bu tua u miɛni po nyan. U bo ji
nnyan i fulu-luu-luuu g daan kua tawalgband n
ninɲ, g pend tawalgband g ji. Luopil bo cil g ji k l
tien nyan kudyeonɲ yen bɔgdm nyan k u guan g
labn g saa sunsonn. G Cabl dɔnn tankobonn g
diid g sua g ɲaadi be tinɲ g tie bonnyidi-nyidi ne
nyan ligpieni nyan. L yann waam g mɔgl yen jɔa
yen dingbana nyuand. U ji bo l saa nnyan i, saa
yen miid piintaa nne k b biɛ muand g luopil ji kan
wai yen wan pund ban saa naan. G naasenm yen
sipaam nba suun luopil n ninɲ biɛ tɔgn g tie niib
sinɲaɔg n jied k b dii.

L kon ji g wai, g luopil jiid tinj n, g buan nantaal g san yen paalu k l cie wan yaan bo bua n fiil g san nand. U san nyan miid njanle nyan i, g sed, g niib nba bo be luopil n ninj tien nuupuoug lob lob lob.

Cabl bo nyie luopil n ninj g kua luopil yaal n g gad g sagn ban diid saanm kadaad naan buol, k b cab'o k u pend g sua k b nyan u tied luopil n ninj o. K u gad g tug u tied. U yed k wan yaad g diid, u sua g niib sie u nunj po g yab. Yab nba bo baal g bu gaal saanm yen yab nba bo tuog b naataani nba nyie sonu g kpen n bo sie l buol. B bo tuod g maad Cabl g nil bu tuog g gaal'o. U diid g sua puo nne sie g die kadaag k wano Cabl sann be l kadaag po. L puo i k b bo sun'o k wan tuog g tug Cabl g gad yen'o wan baa be naan buol g kua kalaatu.

Puo nba bo tuog g tug Cabl nyan bo mag yam paaa. U bo gad yen'o wan baa be dieog nba ninj g saa kalaatu nyan, g fuon yam i g njon'o jetienbona, nyunwuldieog n ninj wan tu bu njmagd naan buol nyuntonm n nya, wan fid g wul, g dugn Angelter nuan, l nil g be g bu fid g wul nyunsonga. U bie bo njon'o wan tu bu tien nand g tu tonj dieog. Lan yaan bie bo tuu k l tie wadyoug nyan, dieog gii g njanm g tonj, nil kan fid g guan. Wad bu te u som n sed i. Baa nyum

nba k b diε g cand tadi mɔno, l gii g ton, nil kan fid sii k u bua wan cand tadi.

L puo bo ηɔn Cabl yal nba k l bual k wan gii ban g fid g duan l daal nuan yo, l gii fann wan guan g ηɔn'o yal nba tenn. Lann i k b cab lieb k l puo kun g Cabl mɔ kua g duan. L sua k b bo tuod g tonη dieog k u daa g baal. G nyaan yen l kul, wan bo tug yal nba g ηagn u kua po g fid g duan nyan bo kpai g cie gunda piig kpiεgu. L daal i k u bann ban yi yal nba wad, g gbad niimn g wad be munle. Tim n diε yal nba g yi wad t nibɔunη doug nyan tie Angelter tuntonbienn faam i.

Yendu bo luod sɔnu Cabl po k u la nimɔnm k b tod'o bona boncienn n ninη. Yal nba bo pɔd'o bo tie fuondi i. Angelter yab бага g bag yen fuondi. Wano yen yab nba bo taan g kua mɔno bo g fuond'o. U daa bo mali k wano nuan n yaan tie saan, g biε tie nibɔnn po n te k b g fuond'o. U diid suoo, g tan sua k l tie b mɔ yaa yantug u. B g fuond b kunkuanlieb mɔno, g bual g nil n cend'a sɔnu po g fuond'a. Yab nba bo tie Cabl cegli k u daa g gad Angelter nyan bo sunn g g maad'o fuondi po. L po n te g cincinn laad nba k u bo tien Angelter nyan, l bo gbad'o boncienn yen niib n g fuond'o, wan fuond yab nba mɔ g gaan u fuondi.

Lan nyan fuondi buol o, siel bo g njanm g mabn'o g dugn u bo tuod g bobn bona boncienn po, k u lieb nba k b bo taan g kua kalaatu nyan mɔ biɛ bo tod'o. B ninɲ sieb bo nyiɛ nibɔna doug. Cabl n yaan bo kua kalaatu yen yab nba nyan, b ninɲ sipaanyend bo be k u pal man Cabl po boncienn. U bo mɔg u puol nne k wano yen u sal ban nibɔna doug. B bo kal Gaana bina piig, g gad Ganbi mɔ g tien bina njanmu yo g fid g guan g lebd Angelter. L sipaan puol bo pag nibɔna youg kul. L po n te g Cabl n yaan bo baal kalaatu nyan, k l sipaan suli'u suoo suoo k wan liɛ ban maad yal nba nibɔna po kon tie mɔni i.

Cabl n yaan tien njanmaali yinle, k l sipaan diid g sua g Cabl suun tuonn kalaatu buol g cie b kul, g mɔg yanfuom, g kpaan k wan gii man yen nil kul nyan, k u bann g yen mɔni nibɔna yam fo k b biɛ mɔg buam boncienn lieb po. B bo yi l Jilnd sipaan g Mari i. Mari bo tien suoo suoo g tan suol dɔnnu yen Cabl. Banm n ji bo taan g banɲ kadaad. Yaa daal nba k b mɔg yaam waam, Mari n tug Cabl ban gad doug n ninɲ. Mari bo njan Cabl Jilnd bitɔa binbem yen b njanii kul.

Diyenn g Mari tan maad u danm k u mɔg dɔnn k u tie nibɔnn. K u bua wan miel'b sugl k ban yiin'o diyenn k ban taan g di. Bitɔa doug nuan, a gii baal nil njan g sua k b di jied, b kan

baand'a g dugn b bo g tuod g ban a baalu po. A gii baal a dɔnn ɲaag mɔno g jied youg tan pund, b bu te'a kadaɔg u, ɲan gii lii g sua k b dii g gbenn. Ban mɔ n yaan ban nand n nyan. Cabl bo maad Mari g nibɔna doug nuan, k l g tie nnyan kaa, g nil gii baal u lua ɲaag jied youg, k l tie yumann i. K b tu yed k lann n ɲɔnɲ g saan ɲano g jond detieb po. Mari danm bo tuo, g Mari yiin u dɔnn jedinu u danm ɲaag. Mari danm bo mɔg yam, ama b bo g ban g nyie b doug n g gad siel buol. B bo mali g niib kul be nyan ban be nand nyan i.

Cabl baal jedinu g sua k b yiin Mari yual yen u niipuob banle nne mɔ. B bo g taan g be yen b danm. Bitɔa doug po nuan, big nba daan la bina piinle, u ji g be yen u danm. U tu gad g kpaan u dieog u kua i. U gii bu baal u danm buol mɔno u bu tuod g maad'b ban gii ban u baalu po yo. B gii g ban u baalu po, k u tan baal jediyoug u kan di ban bobn jied nba l daal. L po n te g Mari danm bo tuod g yiin b bid g maad'b k b mɔg saan k u bu baal g di yen'm. K b gii bua ban baal, b kul ɲ taan g di.

Cabl nuan bo g ban k u gii saa jedinu u mɔ baa die siel i. U bo baad g gand i, u bo g baal yen siel yaa jied. Ama u lieb n yaan bo tuod g maad'o g bitɔa pal man mɔpuum po nyan, u bo daa

mɔpuum i, g baal g tie u dɔnn Mari naa k u gaal g
tien senbolg n ninɲ.

Mayula njanwai po: Jilnd bitca njaag jedinu

Jied youg k b njon Cabl wan yaan bu kal naan buol. U kal g sua k b tuan tiebl po jeditadi yinna g tadg kul taag tadlieg n ninj. K u nuuganj po k b maan gaato-nba, ban die yal nba g nyied jied nyan, bona njanna, g maan u nuujendu po jedijugi mo jugi njanna, g maan u nunj po gaatobig, g fureset-nba, yal nba k b die g tu cog nand g fid g jiel nyan mo be. Ban bo tien jied nba nyan, b bo g nyan l kul yenm kaa, b bo cind g nyan cincinn jied g tuan tiebl po, sinzig n ninj i g maad Cabl k wan tug u yal g tien u tadg n o, g lieb mo nj jii tug.

Jilnd bitca doug nuan, b daa tu cab saan wan tug u jied g tien u jeditadg n yo, njaag yab nj yuand g mo nj tug, tuago tuago. L bo yaa g lid Cabl yen wan bu tien nand. Moni, u bo ban bitca binbem boncienn, g nyaan u daa bo g ban g dii nil njaag nne. U bo dii yen u lieb ban tie jied naan buol g kuad. Ama l bo g taa yen nil njaag jied dinu. Jugi n nyan ii, tadi n nyan. U bo g ban wan bu kpie tug jug nba, lann i kaa tadg nba g tien cincinn jied.

Jilnd bitca mo yen g bund g gbie k b tie jied kul tadg kul n ninj kaa. Jugi mo, l tie nnyan i, l

mɔg jug kul n ja jied nba i. Nil kan fid g tug nand jug g jiel jani, lann i kaa saalaad, lann i kaa kpinfraad nba k b tien tadg n ninj. Kpinfaad bo be, k b n̄aa g g jiel. L bo tie g sua kul n tug g tien u jeditadg n yo, g tu jiel waam g n̄man. L jug bo be l kua i. B kul ji bo nyuan Cabl i suoo, g guu wan bu cil yen tadg nba yen jug nba. Fai bo suol Cabl boncienn yen wan g ban wan bu tien nand. Wan yaan bo kal g tuol u d̄onn Mari nyan, g Mari bann k u g ban. Lann i g ji tien ninfanm g tug u nuujendu nuubikpadg g sii tadg nba tua tadi kul po, g gad g sii jug nba be kunj u nuujendu po, g yuand g tug u nuuganj nuubikpadg g sii gaato nba juod u nuuganj po. Nnyan i g Cabl bann wan bu cil yen tadg nba, yen gaato nba yen jug nba. U bo tug g tien u tadg n ninj, g Mari pag pag yul k wan daa di. G Cabl kal suoo g lieb kul tug jied g tien b tadi n ninj g gbenn, g Mari ji gum yul, g Cabl cil jedinu, g lieb nuan.

L jedinu bo n̄man g tie k̄onkuul i Cabl po. Jedyoug k b n̄maa'ɔg buali. Lan tien nand k u tan baal b doug ne, wan yaan daan tu di yal nba nib̄ona doug, u naa yen u baa-nba n be nand. G Cabl yam tan nyiɛ buali n ninj pai pai pai. U bo g dii bonm̄onn. U bo tu tug jied gii saa m̄ɔb po nne ban daa bual'o buali wan n̄aa i. U bo cagn cagn nnyan i k ban bo tien jebuoli yinmu nba tan

gbenn. L g tie k b bo dii g gbenn kaa. Sua kul bo tu tug g dagd wan bu di nand i. B kul gii tug g daan tii, ban yugl jied nba tenn g kua yenn jetiendieog n. Cabl bo tu tug jebuolu kul waam nne i, g dugn u lieb bo tuod g cegl'o, k u gii g ban jied nba wan daa tug lan yabd. U bo tan guan g kun yo, g tien jied g dii g fid g guan.

Mayula piig po: Gaana gobna tien jaanm g gaal Cabl

Cabl bo gbenn u kalaatu Angelter g guan g kpen Gaana. Wan pund yaa daal, Gaana banɔ Canbaaciɛɔŋ nba bo baal g cab'o luopil yaal n nyan, wano n biɛ bo baal g gaal'o luopil yaal n, u kpendaal. U bo g baal u kua kaa. Sua kul bo gbad Gaana nyan g Cabl-nba tien kɔnkuul hal bitɔa doug g Cabl n gaal b kul liig. L maam bo yad Gaana kul g Cabl daa g guan g kpen mɔno.

U kpendaal Gaana kalaatu miiniidl yen miiniidl nba nyuan puob yen bid binbem po, yen kpaann yen mɔgm miiniidl, yen nigbenɔa boncienn bo baal luopil yaal n g gaal Cabl. L bo tie nyan dougdaan n nyiɛ sɔnu g kpen nyan. Luopil nba k u bo kua g kpen mɔno bo g tie yal nba g niib kul kua kaa, Gaana gobna mɔno n bo sun dougdaan luopil k b gad g kpen yen'o.

Yal nba po bo te k l ɔanm g mɔg yudand Gaana gobna po bo tie bɛ i? Kalaatu nba g Cabl bo gad g kua nyan, yend yend i kaa, yua nba bu kua l kalaatu, binn kul b gii tien bignn wan gaal liig nyan, l yɔli. Yenm n nyan. Munle po, niib bo nyiɛ dingbana boncienn, mandg bitɔa dobuoli-buoli nba be, g baal l kalaatu. Muntaa po,

nigbenna canyiin yaa bid n bo kua l kalaatu. Munna po, bonpuobg daa bo g ban g gaal kalaatubid kul liig hal Angelter gobna n maa l kalaatu dieog, l bina kobg yen piinlile yen bina nanna po n nyan. Munmu po, miɛda n yaan bo bual buali nba l kɔnkuul n ninɔ nyan, Cabl bo g gbal baa bualyenu. B bo tug l buali g bual kalaacigbenna nba bo suun banɔ n ninɔ, sua bo g fid g jiin l buali kul.

L kul ne n bo taan g te g Cabl kalaatu dinu nann mɔg yudand boncienn Cabl po yen Gaana gobna po.

Cabl bo pund Akra k l daa nantaa daal g Gaana dougdaan gaal'o g fuond'o g pag'o yen wan sun tuonn nba k l don Gaana sann. L daal, miiniida kul yen politiik nigbenna kul bo taan g tien jaanm. L puol po yo, g kalaatu miiniidl yen puob yen bid miiniidl tien jaanm g yiin puob tintaancaga yen kalaatu tintaancaga yen bidanm tintaancaga. L jaanm i k b bo yiin Cabl danm, Gulnbad yen u njaapuo yen u kpaaga yen Tanmal yikodanm. L daal i g Gulnbad bann g Cabl ji tie nigbenɔl i canyiin. Nigbenna bo gaal maam yend yend g tien Gaana gobna balg yen wan luod sɔnu g Cabl tan te nigbenɔl g nanduna munn kul niib baa taan u sann. K b tie Cabl mɔ maam, k wan

maad yal nba njanm g manj u pal dinne yaa digbenjl ne.

G Cabl fiil g gaal maam. U ji bo g jie fai nyan wan daa bo cind g gad u lieb n ninj Tanmal kalaatucienj k l tie nand nyan. U bo fiil yaa youg nba g niib kul tien niipuoug u lob lob lob, k l wai. Ban puo puo niipuoug g song yaa youg, g Cabl gaal maam g cind g tien Yendu balg nyan miid njanmu nyan. G yuand g tien Gulnbab balg, g tien'o balg, g led led led. G gad g daan wob g suol Gulnbad g maad maad yen'o muaba n ninj. Sua ji bo g gbie wan maad yal nba, Gulnbad kukua i kaa. G Cabl yuand g tien Gaana gobna balg. G fuond nigbenja nba bo baal kul, g tien'm balg. Lann i g ji nmagd puob yen kalaatubicieni nba bo baal nyan po. Cabl bo tie b kul cegli boncienn g paan b pala g maad:

“N naa-nba, n baa-nba, n ninjanm yen n niipuob, n tiend i kul balg yen yin nja i tuona g baal ne k t kul n taan g tien Yendu balg yen wan yaan jie'ti ninbaag g njanm'ti yaa njanml nba. T kan fid g tien Yendu balg g gbenn. Tin bu tien yal nba Yendu pal n gii man t po tie k tin mond k wan pii'ti paab nba, tin daa tug g yiin fam i. Yendu pii sua kul paab jieg jieg. Ama niib boncienn g die Yendu n pii'b paab nba g suun yenn tuonn.

Sua be k u naa mal'o k u tie yupabug, g nyaan k l yupabug yen sonm. Yua nba ban g Yendu tien'o njanm nyan, u bu tug ninfanm nba g Yendu tien u yupabug n ninḡ i g sun yenn tuonn, u kan gii fabn k l tien nle i g Yendu tag wano k u yul pab kaa.

Nil be g Yendu tag'o k u ninbina g man, ama k u tuba yen gbiε, k u yam fo boncienn yani n ninḡ. L daan gii tien Yendu njanm po, u bu tug Yendu n tie'og yani yanfuom nba gii yiin yani i, k l tie u tuonn k u suun g niib pag'o, k u laad jied g di g dinḡ u niib.

Sua be k u naa yen u baa tuod g kpe g naa'og. U gii tien Yendu njanm po, u kan gii fabn k u tie kpiebg kaa, u baa tiend Yendu balg yen wan be g mɔg miel i, u bu nḡub g sun tuonn g cie yab nba mɔg naa-nba yen baa-nba, g sunn u kpiebd po.

Puo nba g Yendu g tie'og big, wan daa fabn k u tie nḡlg kaa, wan mali wan bu fid g sun yal nba bu tod'o k wan yal u kua, g tod yab nba be fala n ninḡ, g sua kul ŕ gii ban g buam cie madug.

Naasen lann i kaa sipaan nba k u kalaatu g sonm, wan daa fabn kalaatu po. Miel yen laafie cie kalaatu. Wan diid wan bu fid g sun yal nba, g

kon sun yen ninmɔnn g liε u kan do nyuad u tuonn po i?

Puo nba k u sal g bua fala, wan daa fabn k u yul g man, k u g la jamɔn g kun kaa, wan mali wan bu tien nand g ɲub u sal yen u bid. L gii g baal yen pinpagd i kaa, l kan baal yen laad u po, k u fid g din u sal g biε ɲub u bid.

T danm maad g kpaal kan baa u siεg po. G lieb mɔ yed g tuntonjena n su yen ninsiid. Yua nba ɲub g sun tuonn, Yendu n yaan sen'o naan, g g mɔg munle u lua po, g g kpaan k wan di jod, g g kpaan k wan don u kua, g g kpaan k ban gii pag'o u tuonn po youg kul, Yendu bu te l daan yal nba cie wan kpaan yal nba. Nikpela yed g yua nba gbal u yul ninnanda yabd. Yua fid u yul g ban g ninnand be. Yua gbal u yul tie yua nba g tuo g Yendu n tie'og yal nba dagd k wan yal u kua i. Yua fid u yul g tie yua nba mɔg bonn kul kaa, ama yua nba tuo g daal kul tie paab nba yab i g Yendu pii'ug. L daan n kpaan yal nba, u bu la.”

Cabl bo maad maam k l wai, g tie niib cegli nyan u tie nikpel nyan. Mandg puob yen nipaawɔŋ pala bo manɲ u po hal boncienn. Miiniida bo guan g gaal maam g tien nil kul balg, g mɔ tie nipaawɔŋ cegli. L puol po, k b tie niib nba

bo baal kul jied k b dii g yad, g sua kul kun yen
pamann.

Mayula piig yen yenn po: Cabl yen Kan-baa kuan lieb

Cabl bo guan g cil u tuonn banḡ nba ninḡ k u bo kpiε g suun nyan, g tien ḡmaali yintaa i, k b maad k b bu fiin'ο g gad yen'ο Tanmal. Cabl n bo suun banḡ nba nyan n bo tie Gaana banḡciεḡḡ. B bo kua ligli boncienn, k l bual k ban luod banḡliel Tanmal. Ban bo luod banḡ nba Tanmal nyan, b ji bo fiin Cabl k wan gad g kal l banḡ n ninḡ i gii tie l banḡ Cannaaciεḡḡ.

L sua g Cabl n yaan bo cind g baal Akra nyan, g naasen nne bo dag'ο k u yie. L naasen bo bua'ḡg boncienn, ama l youg nyan, Cabl yam daa bo g be jua n ninḡ. Yam-nyie bo ḡaa k u yam nyie jua n ninḡ canyiin. U bo maad u lieb k wano nuan ji kan kun jua palb. Ama wan yaan bo nyie Angelter g guan Akra nyan, k l jua baal banḡ g la'ḡg g fuond'ο. G Cabl bual'ο k l man u ḡaapuo yen u bid ii? K l naasen maad k u daa g kuan puo. K u bo bua Cabl i, ama g Cabl n yaan bo yie'og nyan, k u daa g la sipaan nba k b lannyum dagd. G Cabl bual'ο k u paa bandagl yaa aa? K l naasen maad k u g paa bandagl kaa, k wano mɔno ban g Cabl n yaan ji be naan ne, g miiniidl lann i kaa ligmḡgd canyiin i kaa, k u kan gbeg g diid wano talg ne.

L naasen mɔ bo suun banɲ n ninɲ i, g nyaan l banɲ bo be l kua yen Cabl n bo suun naan buol. G Cabl mɔ guan g jiin'ɔ, k u g kpaan ligli kaa g nyind g kal yen dinne, g g kun jua. G jab n ɲaa k u yam nyie, g ligli kaa pɔd'ɔ.

L naasen bo tie digbanjua i, k b yi'ug Kan-baa. U danm bo nyie Gbenkpelug u, g baal Kofilidua g ko kpaab. U bo kua kalaatu Kofilidua i, g tan gbenn g baal Akra g kua Yunifersite. L naasen bo mɔg yam boncienn. Wano yen Cabl n kal g pag nyan, l bo tie nyan b kpel g ban lieb yo, g tie nyan b maan lieb k l wai nyan. Mɔni po nuan, b bo g ɲanm g ban lieb. Ban daa bo kua kalaatu Akra yaa youg nyan, Kan-baa bo pag yen Cabl diyenn kukua i. Ama Kan-baa maam n ninɲ Cabl n yaan bo bann k u bua n dag'ɔ nyan, k u bo yie. B ji bo g ban g pag yen lieb saa yen Cabl n bo tan gad bitɔa doug g tien bina ɲantaa g guan g kpen.

To, Kan-baa n baal g fuond Cabl nyan, k b ji tied ban bo kua kalaatu Akra g bona nba tien l youg. G Cabl maad k ban be tuonn n ninɲ ne, k b kan fid g ɲanm g pag g dugn u g mɔg yaam. G wontum n tie laad daal nyan, g tuonn g be, k u gii mɔg yaam l daal wan daan baal ɲaag k ban ɲanm g pag. G Kan-baa maad g yaam nuan tie u yal i. G

nil nba mɔg yaam g pund jikpagl, k l g be. K b kul
laa laa, g cab lieb g Kan-baa fiil g kun.

Laad daal pund g Kan-baa tuod g bobn g
gbenn g youg daa g pund. U bo ban g Cabl mɔg
ligli g cie'og. U biε bo ban g Cabl g bua niib nba
mand g mɔg jipaad. Lann, u tiεlanu n ninŋ, u bo g
kpaan tiεd nba bu ŋɔn Cabl k u suun tuonn g mɔg
ligli kaa. U bo la cincenlugda liεdl i, bajigl,
muaba-nba yen digbanm n paa g liε liεda nba, g
liε. U bo g ban wan bu gad yen yal nba g fuond
Cabl u ŋaapo. U bo mali mali g tan daa
cincenlugda ŋanle i, g diε g bu pi Cabl paab.

Cabl bo te k u baal yensiig n i. Kan-baa bo
baal g sua g Cabl tien jied g gbenn o. Cabl bo g
paa g tie jied, u bo mɔg kuku k u tie u jied, ama l
daal wano mɔno n bo tien jied. U bo pɔb kalma i,
g tuon janbid g tien sankpai kpam n ninŋ yen
gabug, yen kanmi, yen bonnunubd, k l kul nu fiiii.

Kan-baa daa bo g ban Cabl n tien jied nba. U
bo gaal jied nublu k u lannyum tɔ i tiεɔg tiεɔg.
Cabl n yaan bo ŋɔgd tadg nba ninŋ g kalma bo be
i k u la g bual g bitɔa doug po jied yaa aa? G Cabl
yed g bitɔa doug po jied kaa. G muaba-nba jied i.
G Kan-baa bual Cabl, g muaba-nba jied k u tien
nle g ban l tienu i? U bo g ban g Cabl tie Muaba.
Cabl mɔ bo g ban g Kan-baa tie digbanjua. B kul

bo maad sandm lann i kaa jilnd i. Pinpaɔg n ninŋ i, g Cabl ji maad Kan-baa k u nyie Togo i. G Kan-baa maad k lann nuan b kul ŋman g nyie doyenu yaa, k u danm mɔ bo nyie Gbenkpelug u g baal g kal Kofilidua g ko kpaab.

Cabl yen Kan-baa pag pag g yendu tan baa i. Sua g duan g fuod yensiig n ninŋ. Daajuaɔg kud munluob i g Kan-baa bo cab g kun. Lan cil l daal, l ji gii fann, Kan-baa bu yiin Cabl tangalafu po yal cie taal piig. L tien nnyan g daan biin daa ŋanmu. G Cabl maad Kan-baa, k wan daa yi yensiig n ninŋ g dugn k u g mɔg yaam. K u bobnd g bu gad Tanmal g cil u tuonn l po. L laad n pend, g Kan-baa biɛ guan Cabl ŋaag, yensiig n. L daal nuan b ji pag pag g nyieɔg tan baal i.

Ban bu cab lieb yaa youg g Kan-baa wob g suol Cabl g bu cab'o, k l ji tie nyan b kan ŋaa lieb nyan. K b ji nyind g sie tanmɔb n g die lieb, g nyuan lieb nunŋ n. G Cabl tug u langbenŋ g maan Kan-baa nuuganŋ bɔpiɛɔg po, g Kan-baa mɔ tug u langbenŋ g maan Cabl nuujendu bɔpiɛɔg po. K b kul taan g fuod g jiin. G Cabl sud g sed, g Kan-baa mɔ ji g ban wan bu tien yal nba, k u mɔ sud g sed g ji nyuan Cabl nyan u g ban g la'ɔg palb nyan. K b nyuan nyuan lieb g biɛ tan wob lieb g die. Sua g maad yen u lua siɛl. G yend fuod g jiin, g lua mɔ fuod g jiin. G Cabl maad g youg pend o,

g guam mɔg'ɔ, g Kan-baa ń kun k u bu kua g daan duan. Kan-baa mɔ g nai, k u cab Cabl g nyie g kun. G Cabl nyind g sie g die u dimɔb gann g nyuan Kan-baa, k u daan legn yen u lol g yaad.

L fann g Cabl gad tuonn, u g fid g sun tuonn. U maalm kul ji bo be Kan-baa n ninɲ i. G nyaan g jiwaani bie daa l mɔg'ɔ. U bo tu mali Yam-nyie po, u yam ń yugl i. U bo maad u kua, k l g ɲan wan bie ɲaa ban bɔnd'ɔ munle. U mali yal kul, u g fid g bu nyan Kan-baa u maalm n. B tan buad tuonn, k u yiin Kan-baa k wan baal ɲaag, k u mɔg buali g bu bual'ɔ. Daajuaɔg g Kan-baa tan baal, g Cabl bual'ɔ k l tien nle i k u mɔg puo g yen wuod'ɔ i? Kan-baa g gbad l buali niimn, g mɔ guan g bual'ɔ g ɲmaa maad'ɔ k u mɔg puo i? G Cabl maad g puo mɔ ji tie liglib yaa aa k u bu ɲuun ɲundu n ninɲ g niib kan bann ii? K n tua u be yen niib yaa. G Cabl maad k u yaa kɔpendpend n tie bɔndl. K u g tie sipaanbinyidg kaa k u bu bɔnd'ɔ g tien'ɔ wan bua yal nba. G Kan-baa maad, k u maad g bua n bign'ɔ bii, u l maad mɔni i? K u gii maad mɔni i yaa wan bann g yua nba bɔnd'ɔ k wano Kan-baa mɔg puo nyan, k wan gii ban k l daan tie wano Cabl ninnand i. G baa sipaandɔnn, u g ban g mɔg baa daal nba dua g saa. K l po n te mɔno k u lieb laa'ɔg k u kukol g di dii. G baa ban bo kua kalaatu Akra yaa youg k

u bo g mɔg sipaandɔnn, k u lieb n bo laa laa'ɔg k u tan bign k wan dag wano Cabl, k u yie. K lan cil l daal yen dinne, k u g ban g saag sipaan kaa yo, g gbal i. K u gii la sipaan nba kul, k u tu mali k u ne mɔ yaan bu yie'og o.

Lann i g Cabl bual'o, k u yed k u g mɔg sipaandɔnn, u biε g mɔg puo mɔ, k l tien nle i k u baad g caan'o wano Cabl ŋaag g yen g ban g yiin'o k wan mɔ n baal g bann u ŋaag i? K u wuod bε i? G Kan-baa maad k u g wuod siel. G nyan wan maad'o nyan, k u tu jie k wano Cabl kan tuo i. Lann i g maad Cabl, k u miεd'o sugl, k wan nya k ban gad k wan daan ŋɔn'o siel nne.

Cabl mɔ g nai, k u nyiε k wano yen Kan-baa tug Kan-baa lol. Cabl bo g ban g Kan-baa kun yen'o u ŋaapo i. B pund yo, g Cabl ji bual Kan-baa, k l tien nle i k u bo g tuod g maad'o k b baad u ŋaag n ne i? G Kan-baa maad, k u tien nnyan k wan baal g pibl wano Kan-baa ŋaapuo yaa. K b kul laa laa g kua g kal. G Cabl maad g jied tien youg pund o, k u bo sunn g g maad u kuku wan bua n di yal nba. G Kan-baa maad k wan daa bual. K u bu kan jikpagsaab ban di. Nnyan i k banm banle ji bo kua Kan-baa jetiendieog n ning g taan g tien jied g dii, g kal g pag pag g yɔgsiiug tan siid. G Kan-baa maad g youg pend o, k wano mɔno yen ban b doug ne naayiga po. K wan duan

k l won gii fann wan cien'o. G Cabl yie g maad, k l g bual k wan duan ne, k u mɔg tuonn wonn. G munle po, k u gii duan ne, g niib bu cil gii maad u po yal nba g njan. G Kan-baa gii jie jiwaani yen wan nya nyieɔg, k u bu yiin u dɔlb k wan baal yen u lol g tug'o. G Kan-baa yie, g nyie g tug lol g cien Cabl k u kun.

Cabl bo miel banɲ yab k ban cab'o njaayenɲ g pugɲ Akra nyan, k wan bobn u bona kul o g fid g gad g cil tuonn Tanmal. Wan bo bann Kan-baa nyan, u yam ji bo g be k wan yaad g nja'a'ɔg. U bie bo bua wan njanm g bann'o waam g pugɲ g lie u tie nimɔn bii u bɔnd'o i. L ji bo tenn laad yenn i yen Cabl n nya Akra g gad Tanmal. Tani daal nne g Cabl kua g la banɲ Canbaacienɲ g maad'o, k u kan wuon'o, g bonsiel mabnd'o. G banɲ Canbaacienɲ tie u po nyan u baa nyan i. G banɲ Canbaacienɲ maad k wan maad g daa jie siel. Lann i g Cabl tug wano yen Kan-baa laabaal g maad'o. Cabl bo dugɲ dugɲ banɲ Canbaacienɲ yal nba bo te k u jie jab. U bo maad k u la yenm o, k l ji g bual wan la munle.

Canbaacienɲ bo nja'a k u maad g gbenn yo, k u mɔ gaal maam g maad g Cabl mɔg mɔni i. G mɔlane bijabi ne g tie l po. K ama, k l gii tie Kan-baa po nuan i yaa, k wan daa jie. G Cabl bual'o k u ban Kan-baa le i g yed k wan daa jie i? G

gad g la u baa Gulnbad Yal-b-kua g maad'o k u la naasen nne Akra. K l naasen tie digbanjua i. K u bu baal g fuond'o k ban bann lieb. G Gulnbad tien'o balg. G pugn g maad k u ji tu kal ne k u yam pu i. K u big ne tan bu kun jua bii u kan kun i. K u pal manḡ boncienn yen laabamann nba k u kpen yenn ne po.

L kon g tien daa nle, g Kan-baa baal yen u puol nne k b fuond Gulnbad. B bo guan g kun yo, g Gulnbad maad Cabl k wan ji daa biend yaam. K wan mōnd k ban tien l puobienn tonm. Cabl mō g nai, k u maad k u bu bual Kan-baa ban bu tien nand. K wano yen kan fid g ḡaa u tuonn g guan Akra, g Kan-baa mō kan ḡaa u tuonn g baal Tanmal ne. K b ji bu tien nle i. Lann i g Cabl yiin Kan-baa tangalafu po k b pag boncienn. G Kan-baa maad k u bu pua u yiε l sawal g lie u bu maad βε. Kan-baa maad u yiε banḡ Canbaaciεḡḡ k u maad k l kan gbal. K u bu fid g pag yen Kan-baa n suun banḡ nba ninḡ nyan Canbaaciεḡḡ g lie b bu tuo g fiin'o g gad yen'o Tanmal i, k b banḡ mō yen be Tanmal.

K b pag k l dagd, k b fiin Kan-baa mō g gad yen'o Tanmal. Maam ḡanm n nyan. K b sen puobienn daal. B bobn puobienn ḡmaali yinluob i. L daal, baal g diid, nigbenḡa nba nyiε Akra, yab nba nyiε Tanmal, Cabl dōnn-nba bo nyiε Angelter

məno g baal l puobienn jaanm. Jaanm po pend g niib daa l tenn g di jaanm jied g daan biin daa ŋanlile. L bo tien ŋmaalg g Cabl yen u sal daa g pɔbd paab nba g niib bo baal baal yenn nyan g gbenn.

L bo tien ŋmaali yinle yo, g Cabl gad g la u baa Gulnbad g maad k wano yen u sal bo mali k ban daa tinŋ g maa b yul po ŋaag. Lann i g Gulnbad kua g tug tinŋ kadaad g tie Cabl. G Cabl bual g ŋmaa tinŋ kadaad i? G Gulnbad maad k wan diid kadaaɔg po g liɛ ŋmaa sann n dien l po i. U kon diid g sua wano Cabl sann n dien l kadaaɔg po. L tinŋ bo yab hal boncienn g biɛ be dopienu n ninŋ, naan buol nba g tini daaɔg paa hal boncienn Tanmal doug n nyan. G Cabl maad k u g gbad niimn. G Gulnbad maad k wan yaan bo dii kɔnkuul Tanmal cienm kalaatu g niib pii'ug paab nba, k u bo g dii. K u sunn yaa aa g bonkobd bo be g ligli be i?. K u bo tug bonkobd g guun naasen nne, k u tien ii? K u yed k u tien. G Gulnbad maad k l bonkobd bo pɔl boncienn. G jel i k u bo jie naayiga g bɔgd g kuad g pugn ligli nba k b bo tie'og k u g dii nyan po, g daa tinŋ ne g guun'o, k l tan gii tie k u kpen g yed k u g bua tinŋ ban guan g kuad g te'og ligli wan tien wan bua yal nba. G Cabl maad g ne nuan, k u ji g ban wan bu

maad yal nba. Lann i g gbaan g tien Gulnbad balg boncienn.

Cabl yen u sal bo cil ngaag maanu i g Cabl suol puol g mal bijabg k b pul'o L-wai-n-be. G dugn Cabl bo maad k l wai n be k l nyind g be. K u bo g ban k u tan bu guan g la nimɔn g kun g mal big. Big bo tien nyan binn yen nmaali yintaa nne i g Cabl maad k l ji bual k wan lebd Togo g lie u naa yen u baa daa l be g mɔg miel ii?

Mayula piig yen njanle po: Cabl guan g kpen Togo g fiin u baa njaag

Diyenn Cabl danm bo kal, tuntonbienn nne, b tan sua lol k l baal g sed g g fag yen njaag. Lol bo kan fid g pund njaag g dugn lol sɔnu bo g be g saa Cabl-nba njaapo. G Cabl nyie, wano yen u sal, k b sonm sonm g tan pund njaag. U naa nuan bo la'ɔg yaa youg g bann'o, g fiil g kua dieog n. Ama yab nba tenn kul sua g bann'o. Wan pund g kal g fuond muaba n ning i k u baa nyuan suoo g tan bann lantɔug, ama g ji jie jiwaani yen wan bual g Cabl yaa aa? B bo tien'm nyum k b nyuu yo, g Cabl baa ji bual g saanm nyie le yaa aa? G Cabl maad: baabaa, a ji g bann'n ii? Min Cabl i. L youg g njaag yab kul fiil g te yanyiin g san g nja saanm. B bo mali g tinkpiil i.

Yen mɔni, Cabl n yaan bo yaad g sua g gbie u laabaal nyan, g jua nne tan nyie Gaana g kpen g maad g lol bo baa yen Cabl yen Yam-nyie k b kul kpe o. L po n te k b bo njanm Cabl kuum. Sua ji bo g mali k u tan bu guan g kpen. B bo sun g yiin jibaa k wan lie tinkpiil bii Cabl i yen mɔni i. Jibaa baal u g fid g bann mamɔni. Cabl bo la fala boncienn yo g niib tan fid g nagn'o, k u dugn dugn'm yal nba baal'o kul. Yen l kul, sieb bo l g tuo k l tie mɔni. Cabl bo tan gbal g lebd yen njaag

n ninj papaadaan nne i, k b gad hal Akra dansaldieog n g la Yam-nyie k u be dansalg. L buol i g Cabl danm ji fid g tuo Cabl maam. L puol po i k b ji bo gaal Cabl yen u sal.

Cabl bo te k b mud u baa nyaag g maa nyaapaanŋ, simind nyaag nba yab. G yuand g tie ligli k b maa kalaatudied tinmu yen dogda died tinle g tie dingbangbenja nyaantaa nba be b Kantɔn n ninj. G te k b gbiil caa nba g nyum kan fid g gbenn g tie'b, kunkuann kul yen u caal. G daa dulm kpalpied kobiinmu g boɔgd doug n yab.

Cabl bo g nya Gulnbad Yal-b-kua yen u nyaapuo Yaa-bul'n mɔ. U bo daa lociend tinle g tie u naa Yaa-bul'n k wan gii saa dingbankunkogi daabid g daa kpabda yen dii yen mugli yen tɔa yen tiina g go g kuad Tanmal daaciɛnŋ n ninj. U bo guan g pugn u baa Yal-b-kua mɔ ligli k u ji saa Dubay g daa tied l po g kpend g kuad Tanmal. Yal-b-kua bo luod situglieog mɔno Akra g tug u bijakpel g kaan'o l ninj.

Cabl sun tuonn Tanmal bina nyaanmu i k b fiin'o g gad yen'o Akra k u daan gaal Gaana banɔciɛnŋ Canbaaciɛnŋ kog. Kan-baa yie nba bo tie Canbaaciɛnŋ nyan bo gaal fuom g dugn u bo sun l banj n ninj bina piintaa yen nyaanle i.

Cabl n ji bo gaal u yiɛl. Wano n daa l tenn g tie l
banɲ Cannaaciɛɔnɲ saa yen dinne.

Achévé d'imprimer par ATAPEB
Dépôt légal N°. 136/MATDCC/nov 2024
B.P.29 Dapaong-Togo

Prix : 1.000 f cfa